# Hinisis Ka Bunsuranan

### Igpewun-a

Ka kaluwasan te lalag ne *Hinisis*, "bunsuranan". Seini ne baseen, kayi nasulat ka peggimu te langit wey te tane, ka migpuunan te etew, wey ka bunsuranan te sale wey peg-antus kayi te kalibutan. Nasulat man-e kayi ka guhuren meyitenged te keet-etawan ne inalam te Manama wey ka peg-uyan din kandan diye te inged ne insaad din kandan.

Nabaad te daruwa seini se baseen:

- 1) Ka peggimu te kalibutan wey ka guhuren meyitenged te me etew. Kayi egkabasa ka guhuren meyitenged ki Adan wey ki Iba, ka meyitenged ki Kain wey ki Abil, wey ka meyitenged ki Nuwi wey ka pegsipuk te weyig, wey ka meyitenged te matikang ne baley diye te Babil.
- 2) Ka guhuren meyitenged te an-anayan ne me kabuybuyahan te matig-Israil. Si Abraham ka an-anayan ne kabuybuyahan te matig-Israil ne neyimu ne mabantug tenged te pegpalintutuu wey pegsalig din wey te pegtuman din te suhu te Manama. Egpakasinundul degma ka guhuren meyitenged te anak din ne si Isaak, wey ka apu din ne si Hakub (ne egngaranan ded degma ki Israil), wey ka sapulu wey daruwa (12) ne anak ni Hakub ne iyan migpuunan te sapulu wey daruwa (12) ne tribu te Israil. Nahuhud degma kayi ka meyitenged te anak ni Hakub ne si Husi wey ka neyitabu kandin ne iyan impuunan te nekeendiye te Ihiptu si Hakub duma te me anak din.

Egkabasa ta man-e kayi ka guhuren meyitenged te naleinlein ne me etew ne nabuhal-buhal kayi te ampew te tane wey migmannenasud e. Labew te langun, nahuhud kayi ka dakel ne himu te Manama ne peggimu te langit wey tane wey te langun ne nakatahu kayi.

Diye te katamanan te guhuren, egkahuhud ka ware egtamanan ne saad te Manama te keet-etawan din. Kene eglingawan te Manama ka saad din wey kene din iya egbalaharen ka keet-etawan din su egpanuluen din sikandan wey egbulihan. Ne sikandin ka eggukum wey eglegpad te langun ne eggimu te mareet.

#### Ka nenasulat te seini ne baseen

Ka peggimu te Manama te langit wey te kalibutan 1:1–2:25 Ka bunsuranan te sale wey te peg-antus 3:1-24 Ka guhuren ki Adan peendiye te ki Nuwi 4:1–5:32 Si Nuwi wey ka pegsipuk te weyig 6:1–10:32 Ka matikang ne baley diye te Babil 11:1-9 Ka guhuren ki Sim peendiye te ki Abraham 11:10-32 Ka me kabuybuyahan te me Hibruwanen: si Abraham, si Isaak, si Hakub 12:1–35:29 Ka me kabuhalan ni Isaw 36:1-43 Si Husi wey ka me suled din 37:1–45:28 Ka me Hibruwanen diye te Ihiptu 46:1–50:26

1

### Ka peggimu te kalibutan

<sup>1</sup>Te an-anayan, innimu te Manama ka langit wey ka kalibutan. <sup>2</sup>Ne ware pad naay-ayari ka kalibutan dengan, wey ware pad tahu. Nabunbunan te dahat ka tane wey marusilem amana. Ne migweil-weil ka Panisingan te Manama diye te ampew te weyig. <sup>3a</sup>Ne migkahi ka Manama, "Egkeyimu ka malayag." Te sikan de, neyimu e ka malayag. <sup>4</sup>Ne natelesan ka Manama te malayag ne nakita rin. Ne impegsuwey rin ka malayag wey ka delem. <sup>5</sup>Migngaranan din ka malayag te "Maaldew" wey ka delem migngaranan din te "Marusilem." Ne nasagkup e wey napawe, ne seeye ka an-anayan ne aldew.

<sup>6b</sup>Ne migkahi ka Manama, "Egkeyimu ka eletanan te weyig eyew egkabaad te daruwa ka weyig, diye te ampew ka sabeka ne baad wey diye te diralem ka sabeka." <sup>7</sup>Te sikan de, neyimu e ka eletanan, wey nabaad e te daruwa ka weyig, diye te ampew ka sabeka ne baad wey diye te diralem ka sabeka. <sup>8</sup>Migngaranan din ka eletanan te "Aw-awangan". Ne nasagkup e wey napawe, ne seeye ka igkarangeb ne aldew.

- a. 1:3: 2Kur 4:6.
- b. 1:6-8: 2Pid 3:5.

<sup>9</sup>Ne migkahi ka Manama, "Egkalibulung de te sabeka ne inged ka weyig ne diye te diralem te aw-awangan su eyew egpakalepew ka tane ne mammara." Te sikan de, neyimu e. <sup>10</sup>Migngaranan din ka mammara te "Tane" wey ka weyig ne nalibulung, migngaranan din te "Dahat." Ne natelesan ka Manama te nakita rin. <sup>11</sup>Nataman, migkahi e man-e ka Manama, "Egtubu diye te tane ka nakalkalasi ne me pinamula, seeye se due me beni wey seeye se me kayu ne egbebehas." Te sikan de, neyimu e. <sup>12</sup>Ne nanubu te tane ka langun ne nakalkalasi ne pinamula. Ne natelesan ka Manama te nakita rin. <sup>13</sup>Ne nasagkup e wey napawe, ne seeye ka igkatelu ne aldew.

<sup>14</sup>Ne migkahi ka Manama, "Egkeyimu ka me malayag diye te langit ne iyan egpegsuwey te maaldew wey marusilem wey eyew egpeila te pegbunsud te me aldew, te me timpu, wey te me leg-un. <sup>15</sup>Eglayag sikandan diye te langit eyew egteng-ew te kalibutan." Te sikan de, neyimu e. <sup>16</sup>Sikan naa, innimu te Manama ka daruwa ne mallayag; ka aldew wey ka bulan. Ka aldew ne malmalayag, iyan eglayag te maaldew; ne ka bulan, iyan eglayag te marusilem. Ne innimu rin degma ka me bituen. <sup>17</sup>Intahu te Manama ka me malayag diye te langit eyew egtengew te kalibutan, <sup>18</sup>wey eyew eglayag te maaldew wey te marusilem, wey eyew egpegsuwey te malayag wey te delem. Ne natelesan ka Manama te nakita rin. <sup>19</sup>Ne nasagkup e wey napawe, ne seeye ka igkeep-at ne aldew.

<sup>20</sup>Ne migkahi ka Manama, "Egpekeempet kayi te weyig ka nakalkalasi ne me ngalap wey egpekeempet degma diye te aw-awangan ka nakalkalasi ne me manuk-manuk." <sup>21</sup>Sikan naa, innimu te Manama ka me bubuyahen ne me ngalap diye te dahat wey ka nakalkalasi ne me ngalap diye te weyig wey ke diye te dahat, wey ka nakalkalasi degma ne me manuk-manuk. Ne natelesan ka Manama te nakita rin. <sup>22</sup>Ne impanalanginan sikandan te Manama te migkahi, "Kabuhal kew. Sikaniyu se me ngalap te weyig, empeta niyu ka dahat, ne sikaniyu se me manuk-manuk, empeta niyu ka kalibutan." <sup>23</sup>Ne nasagkup e wey napawe, ne seeye ka igkalimma ne aldew.

 $^{24}$ Ne migkahi ka Manama, "Egkeyimu kayi te ampew te tane ka nakalkalasi ne me mananap, ka me ayam wey ka me mahintalunan, ka derakel wey mallintek ne me mananap." Te sikan de, neyimu e.  $^{25}$ Sikan naa, innimu rin ka langun ne nakalkalasi ne me ayam wey me mahintalunan. Ne natelesan ka Manama te nakita rin.

#### c. 1:26: 1Kur 11:7.

<sup>26</sup>cNe migkahi man-e ka Manama, "Eggimu ki te etew ne iling kanta. Sikandan ka egbuut te me ngalap te weyig, me manuk-manuk, me ayam, wey te langun ne mahintalunan, ka derakel wey ka mallintek ne me mananap." <sup>27de</sup>Sikan naa, innimu te Manama ka etew iling kandin. Innimu rin ka lukes wey ka malitan. <sup>28</sup>Ne impanalanginan sikandan te Manama ne migkahi, "Kabuhal kew eyew egpekeempet ka kabuhalan niyu kayi te ampew te tane wey sikandan ka egbuut te langun. Sikaniyu ka egbuut te me ngalap te weyig, me manuk-manuk wey te langun ne mananap. <sup>29</sup>Igbehey ku kaniyu ka langun ne pinamula ne egbebehas wey ka me behas te kayu, eyew egkeenen niyu. <sup>30</sup>Igbehey ku degma te langun ne me mananap, me manuk-manuk, wey te langun ne egmanggeheyinawa ka me pinamula ne meilem eyew egkeenen dan." Te sikan de, neyimu e. <sup>31</sup>Ne nakita te Manama ka langun ne innimu rin wey natelesan amana sikandin. Ne nasagkup e wey napawe, ne seeye ka igkeen-em ne aldew.

 $2^{1}$ Sikan naa, napenge e te miggimu ka langit wey ka kalibutan wey ka langun ne nakatahu due.  $^{2fg}$ Te igkapitu ne aldew, miggimeley e ka Manama su napenge e ka langun ne innimu rin.  $^{3}$ Indakelan din ka igkapitu ne aldew wey immatulus din seini, su miggimeley e sikandin te sika ne aldew te langun ne eggimuwen din.

<sup>4</sup>Iling kayi ka guhuren meyitenged te peggimu te kalibutan wey te langit.

## Ka inged ne egngaranan te Idin

Te peggimu te Magbebaye ne Manama te langun, <sup>5</sup>ware pad me pinamula wey me hilamunen ne nanubu te tane, su ware din pad peurani, wey ware pad etew ne egbasuk. <sup>6</sup>Minsan ware pad uran, piru migmakames e ka tane su duen e weyig ne migligkat diye te diralem te tane.

 $^{7h}$ Ne migkuwa ka Magbebaye ne Manama te tane wey innimu rin ne etew. Inggiyupan din ka irung te etew te egpekeuyag ne geyinawa, wey miggeheyinawe e ka etew.

- d. 1:27-28: Hin 5:1-2.
- e. 1:27: Mat 19:4; Mar 10:6.
- f. 2:2-3: Iks 20:11.
- g. 2:2: Hib 4:4,10.
- h. 2:7: 1Kur 15:45.

<sup>8</sup>Ne miggimu ka Magbebaye ne Manama te pinamulaan diye te Idin ne diye dapit te igsile, wey diye din ipeugpe ka etew. <sup>9</sup>iNe impatubuan seeye te Magbebaye ne Manama te langun ne nakalkalasi ne kayu ne mateles wey meupiya ne egkeenen se behas. Diye te taliware te pinamulaan, due kayu ne egpakabehey te umul, wey due degma kayu ne egpakabehey te katuenan ke nekey ka meupiya wey ke nekey ka mareet.

<sup>10</sup>Ne due weyig ne diye mig-ulun te Idin ne nakaweyig te seeye ne pinamulaan. Ligkat dutu, migsisiyak seeye te hep-at ne siyak. <sup>11</sup>Ka an-anayan ne siyak, egngaranan te Pisun ne migpeendiye te inged ne egngaranan te Habila ne due bulawan. <sup>12</sup>(Dutu ne inged egkakita ka neelin ne bulawan, mahal ne peemut ne egngaranan te birilyum, wey ka egpangilak-ilak ne me batu ne egngaranan te uniks.) <sup>13</sup>Ka igkarangeb ne siyak, egngaranan te Gihun ne migpeendiye te inged ne egngaranan te Kus. <sup>14</sup>Ka igkatelu ne siyak, egngaranan te Tigris ne migleus diye dapit te igsile te Asiriya. Ka igkeep-at ne siyak, egngaranan te Iyupratis.

<sup>15</sup>Ne diye ipeugpe te Magbebaye ne Manama te pinamulaan te Idin ka lukes eyew egbasuk wey egtanggu dutu. <sup>16</sup>Migkahiyan din ka lukes, "Egkaayun ka ne egpakakeen te behas te minsan nekey ne kayu kayi te pinamulaan, <sup>17</sup>piru kene ka keen te behas te kayu ne egpakabehey te katuenan ke nekey ka meupiya wey ke nekey ka mareet. Ke egkeen ka te behas te sika ne kayu, egkapatey ka iya."

<sup>18</sup>Ne migkahi ka Magbebaye ne Manama, "Kene ne meupiya ne egsabsabeka seini se etew. Keilangan ne eggimuwan ku sikandin te talagbulig ne eleg kandin."

<sup>19</sup>Sikan naa ka miggimu ligkat te tane ka Magbebaye ne Manama te langun ne me mananap wey me manuk-manuk wey impanguyan din seeye diye te etew eyew egpangngaranan sikandan. Minsan nekey ka igngaran te etew te tagse sabeka kandan, sikan e ka ngaran dan. <sup>20</sup>Ne impangngaranan e te etew ka langun ne me mananap, me ayam, me mahintalunan wey me manuk-manuk. Piru warad iya nakita te etew ne eleg ne egpakabulig kandin.

 $^{21}$ Purisu impaliplipereng te Magbebaye ne Manama ka etew. Te nakaliplipereng e sikandin, in-angey e te Manama ka gusuk din wey impakimut din ded ka pali.  $^{22}$ Ne innimu rin ne malitan ka gusuk ne in-angey rin diye te lukes, wey in-uyan din e ka malitan diye te lukes.  $^{23}$ Te pegkakita te lukes te malitan, migkahi e sikandin,

"Te! Seinid en iya ka iling keddi!

i. 2:9: Imp 2:7; 22:2,14.

Ka tul-an din, migligkat te keddi ne tul-an, wey ka sapu din, migligkat degma te keddi ne sapu.

'Malitan' ka ngaran din<sup>j</sup> su in-angey man de ligkat te lukes."

<sup>24k</sup>Sika ka egpuunan ne eg-engked ka lukes te amey wey iney rin, wey eglunggun e sikandin te asawa rin, wey egkasabeke e sikandan se daruwa.

<sup>25</sup>Ne sikandan se alunggun, migpalawas, piru ware sikandan neyilew.

3

## Migsupak ka etew te Manama

<sup>11</sup>Na, due uled ne iyan ka amana ne utekan te langun ne mananap ne innimu te Magbebaye ne Manama. Mig-insaan te uled ka malitan, "Ingkenaan kew bes te Manama ne egkeen te langun ne behas te me kayu kayi te pinamulaan?"

<sup>2</sup>Ne migtabak ka malitan, "Egkaayun key ne egkeen te behas te minsan nekey ne kayu kayi te pinamulaan <sup>3</sup>gawas te behas te kayu ne kayi te taliware. Impanpanayan key te Manama ne kene egpakeenen wey minsan egsamsam naan de te behas te sika ne kayu su eyew kene key egkapatey."

<sup>4</sup>Piru migkahi ka uled, "Kene ne malehet ne egkapatey kew. <sup>5</sup>Nakahi sika te Manama su nakataha sikandin ne emun ke egkeen kew due, egkapuwasan ka isip niyu wey egpekeiling kew kandin ne egpakataha ke nekey ka meupiya wey ke nekey ka mareet."

<sup>6</sup>Te pegkakita te malitan ne mateles ka kayu wey mananam buwa ne egkeenen ka behas, neeyaman sikandin ne egpupu eyew egpakakuwa te katuenan. Purisu, migpupu e sikandin wey ingkeen din e. Ne imbehayan din ka asawa rin wey migkeen e degma sikandin. <sup>7</sup>Te nakapenge e sikandan ka migkeen, napuwasan e ka isip dan wey nakamaan-maan e sikandan ne migpalawas bes sikandan. Tenged due, migkuwa sikandan te me dewun te kayu ne iggira wey impaneyi dan e seini eyew igbebaag dan.

- j. 2:23 Te Hibruwanen: bayew egpekegsahid ka ngaran te "malitan" wey "lukes."
- k. 2:24: Mat 19:5; Mar 10:7-8; 1Kur 6:16; Ipi 5:31.
- l. 3:1: Imp 12:9; 20:2.

<sup>8</sup>Te pegkasagkup e, nakarineg sikandan te pegderahebdeb te Magbebaye ne Manama diye te pinamulaan, ne dutu miggeles e sikandan diye te kakayuwan. <sup>9</sup>Piru in-umew te Magbebaye ne Manama ka lukes, "Hendei kad e?"

 $^{10}$ Ne migtabak ka lukes, "Nakarineg a te pegderahebdeb nu kayi te pinamulaan wey miggeles ad e su naaldek a tenged su migpalawas a."

<sup>11</sup>Ne mig-inse ka Manama, "Hentew-a ka mignangen keykew ne migpalawas ka? Migkeen ka te behas te kayu ne ingkene ku keykew?"

 $^{12}$ Ne migtabak ka lukes, "Ka malitan ne imbehey nu keddi ka migbehey keddiey te behas te kayu. Sikan naa ka nakakeen a."

 $^{13\mathrm{m}}$ Ne mig-insaan te Magbebaye ne Manama ka malitan, "Mania te innimu nu seini?"

Ne migtabak ka malitan, "In-akalan a te uled. Sikan naa ka nakakeen a te behas te kayu."

## Ka peglegpad te Manama tenged te sale

<sup>14</sup>Ne migkahiyan te Magbebaye ne Manama ka uled,

"Tenged su innimu nu sika, eglegparan ku sikeykew. Te langun ne me mananap, sikeykew re ka egdilusen. Ligkat kuntee, egdul-ug kad e wey egkeen kad te alinepung taman te egpatey ka.

 $15_{n}$ Egpegkuntereen ku sikaniyu te malitan wey ka me kabuhalan niyu degma. Egdekdeken te kabuhalan din ka ulu nu wey egkahaten nu degma ka palu rin."

<sup>16</sup>Ne migkahiyan te Manama ka malitan,

"Tenged te innimu nu sika, egtimulan ku ka peg-antus nu te peg-anak nu wey masakit ka egkaheram nu ke eglesutan ka. Piru minsan pad due, dakel red ka isip nu te asawa nu wey<sup>o</sup> sikandin ka egbuut keykew."

- m. 3:13: 2Kur 11:3; 1Tim 2:14.
- n. 3:15: Imp 12:17.
- o. 3:16 Kene ne klaru seini wey kema ke, "Egkeupian ka ne iyan egmandu te asawa nu, piru" ka malehet ne peggalin kayi.

<sup>17</sup>pNe migkahiyan te Manama ka lukes ne si Adan,

"Tenged te mig-alak ka te asawa nu wey migkeen ka te behas te kayu ne ingkene ku keykew, egdilusen ku ka tane.

Ligkat kuntee, wey re egpanubu ka pinamula nu ke egkabaybayaran ke pad ne egbasuk.

 $^{18}$ Egpanubu diye te tane ka me hilamunen wey ka me duhi, wey egkeen ka te me pinamula ne egpanubu diye te kamet.  $^{19}$ Ne wey ka egpakahaani te pinamula nu, ke egkabaybayaran ke pad ne egbasuk wey egtihis pad ka limuseng nu. Egkataman, egpakalibed ka diye te tane ne migligkatan nu. Su innimu ka ligkat te tane ne egpakalibed ke red diye te tane."

 $^{20}$ Nataman, migngaranan ni Adan ka asawa rin ki Iba $^{\rm q}$  su sikandin ma ka iney te langun ne etew.  $^{21}$ Ne innimuwan te Magbebaye ne Manama ensi Adan wey si Iba te manggad ne migligkat te Mananap wey impakumbalaan din e sikandan.

# Ka pegdeldel ki Adan wey ki Iba ligkat te pinamulaan

<sup>22</sup>rNe migkahi ka Magbebaye ne Manama, "Kuntee, nekeiling e ka etew kanta ne nakataha ke nekey ka meupiya wey ke nekey ka mareet. Keilangan ne kene egpakapupu wey egpakakeen sikandan te behas te kayu ne egpakabehey te umul, su keilangan ne kene egkeuyag sikandan te ware egtamanan." <sup>23</sup>Sikan naa ka indeldel e sikandan te Magbebaye ne Manama ligkat te pinamulaan te Idin wey egpabasuken e si Adan diye te tane ne inligkatan din.

<sup>24</sup>Ne impaawe e te Manama ka alunggun, wey intahuan din e te me talagtameng ne panalihan ne egngaranan te "kirubin" ka diye dapit te igsile te pinamulaan te Idin. Ne imparuma rin ka kampilan ne egkalegleg wey egkatileng su eyew ware etew ne egpakadani-rani te kayu ne egpakabehey te umul.

# 4

- p. 3:17-18: Hib 6:8.
- q. 3:20 Te Hibruwanen: "egkeuyag" ka kaluwasan te lalag ne "Iba."
- r. 3:22: Imp 22:14.

## Si Kain wey si Abil

<sup>1</sup>Ne migpewulirey e ka alunggun ne si Adan wey si Iba. Nataman, naberes e si Iba wey miglesutan e te lukes. Migkahi si Iba, "Nakaanak a te lukes ligkat te pegbulig te Magbebaye ne Manama." Purisu ingngaranan din ka bate ki Kain.<sup>s</sup> <sup>2</sup>Nataman, nakaanak e man-e sikandin te lukes ne ingngaranan din ki Abil. Hengkayi te migtulin e ka tahasuled, neyimu si Abil ne talagtameng te me karniru wey si Kain neyimu ne talabasukan. <sup>3</sup>Te sabeka ne aldew, mig-angey si Kain te me behas te pinamula rin ne inhalad din diye te Magbebaye ne Manama. <sup>4t</sup>Piru mig-angey mule si Abil te me panganey ne anak te me ayam din, ne impanlape din seeye wey in-alam din ka subla ne meupiya ne baad dutu wey impanubad din te Magbebaye ne Manama. Ne nahale amana ka Magbebaye ne Manama ki Abil wey te impanubad din, <sup>5</sup>piru ware sikandin nahale ki Kain wey te inhalad din. Purisu, subla ne nabelu si Kain wey migpaasemud sikandin. <sup>6</sup>Ne migkahiyan te Magbebaye ne Manama si Kain, "Mania te egkabelu ka wey migpaasemud ka? <sup>7</sup>Ke meupiya ka eggimuwen nu, egdawaten ku perem ka halad nu. Piru ke mareet ka eggimuwen nu, ka sale ka egmandu keykew. Su ka sale egpekeiling te uled ne egatang keykew eyew egkahaten ka. Purisu keilangan ne egkatalu nu ka sale."

<sup>8</sup>uNataman, migkahiyan ni Kain ka hari rin ne si Abil, "Kuwa kid e Abil. Eggendiye ki te kamet." Te diyad e sikandan te kamet, in-uney e himatayi ni Kain ka hari rin.

<sup>9</sup>Ne mig-insaan te Magbebaye ne Manama si Kain, "Hendeid e ka hari nu ne si Abil?"

Ne migtabak si Kain, "Hanew te la! Maa sikeddi ka talaggaat te hari ku su!"

<sup>10</sup>vNe migkahi ka Magbebaye ne Manama ki Kain, "Mania te neyimu nu sika se mareet ne himu? Te pegkakita ku te langesa te hari nu diye te tane, iling te egpakarineg a te laheng din ne egbuyu te pegsuli. <sup>11</sup>Tenged te innimu nu, igdilus ka. Puun kuntee, kene kad e egpakabasuk te tane ne inleneban te langesa te hari nu. <sup>12</sup>Ke egpamula ka, ka tane kenad egbehey te egkahaani. Ne eggeles-heles ka wey egkalaag-laag kad e kayi te ampew te tane."

- s. 4:1 Te Hibruwanen: "egpakakuwa" ka kaluwasan te lalag ne "Kain."
- t. 4:4: Hib 11:4.
- u. 4:8: Mat 23:35; Luk 11:51; 1Huw 3:12.
- v. 4:10: Hib 12:24.

<sup>13</sup>Ne migkahiyan ni Kain ka Magbebaye ne Manama, "Mabehat amana ka iglegpad nu keddi. <sup>14</sup>Indeldel a nikeykew ligkat te seini ne tane wey diye te tangkaan nu. Eggeles-heles ad wey egkalaag-laag ad kayi te ampew te tane, wey eggimatayan ad te minsan hentew ne egpakakita keddiey."

<sup>15</sup>Piru migtabak ka Magbebaye ne Manama kandin, "Kene, su sika se egpekeyimatey keykew, eglegparan ku degma te pitu ne lupi." Sikan naa, intahuan te Magbebaye ne Manama te tuus si Kain su eyew kene egkeyimatayan te egpakakita kandin. <sup>16</sup>Te sikan de iya, mig-awe e si Kain diye te tangkaan te Magbebaye ne Manama wey diyad e mig-ugpe te inged ne egngaranan te Nud, w ne diye dapit te igsile ligkat te Idin.

#### Ka me kabuhalan ni Kain

<sup>17</sup>Ne migpewulirey e si Kain te asawa rin, nataman, naberes e ka asawa rin wey mig-anak te lukes ne migngaranan dan ki Inuk. Ne migpasasindeg si Kain te siyudad ne migngaranan din ki Inuk, su impasangey rin te anak dan ne panganey. <sup>18</sup>Si Inuk, nakaanak ki Irad. Ne si Irad, nakaanak ki Mihuhail. Ne si Mihuhail, nakaanak ki Mitusail. Ne si Mitusail, nakaanak ki Lamik. <sup>19</sup>Ne si Lamik, migduruwey. Si Ada wey si Sila ka ngaran te me asawa rin. <sup>20</sup>Si Ada nakaanak e ki Habal. Ne si Habal ka migligkatan te talaayamen ne mig-ugpe diye te me balungbalung. <sup>21</sup>Due inggiba ni Habal ne egngaranan ki Hubal. Si Hubal ka migligkatan te langun ne egkateu ne egpanguglung wey egpamulendag. <sup>22</sup>Ne miglesutan e degma si Sila ki Tubalkain. Si Tubalkain ka an-anayan ne talagpanayab te burunsi wey me putew. Due atebey ni Tubalkain ne egngaranan ki Naama. <sup>23</sup>Ne migkahiyan ni Lamik ka daruwa ne asawa rin,

"Ada, Sila, pammineg kew keddi.

Nakapatey a te kanakan ne nakapali keddi.

 $^{24}$ Ke pitu ne lupi ka igsuli te etew ne egpakapatey ki Kain,

pitu ne pulu wey pitu (77) mule ne lupi ka igsuli te etew ne egpakapatey keddi."

w. 4:16 Te Hibruwanen: "egkalaag-laag" ka kaluwasan te lalag ne "Nud."

#### Ka me kabuhalan ni Sit.

<sup>25</sup>Ne migpewulirey e man-e si Adan wey si Iba wey nakaanak e man-e te lukes. Migkahi si Iba, "Imbehayan ad e man-e te Manama te anak ne lukes ne inliwan din ki Abil ne innimatayan ni Kain." Sikan naa, ingngaranan din ka bate ki Sit.<sup>x 26</sup>Si Sit nakaanak te lukes ne migngaranan din ki Inus. Te seeye ne timpu, migbunsud ka me etew ne mig-ampu wey migsaye te Manama, wey Magbebaye ne Manama ka ngaran din ne ig-umew ran.

5

#### Ka me kabuhalan ni Adan

(1 Kru. 1:1-4)

<sup>1</sup>ySeini ka pangguhuren meyitenged te me kabuhalan ni Adan. (Te peggimu te Manama te me etew, innimu rin sikandan ne iling kandin. <sup>2</sup>zInnimu rin sikandan ne lukes wey malitan wey impanalanginan din sikandan wey ingngaranan din te "Etew.") <sup>3</sup>Te 130 e ka idad ni Adan, nakaanak pad sikandin te lukes ne migsupu kandin ne ingngaranan din ki Sit. <sup>4</sup>Pegkeetew ni Sit, neuyag pad si Adan seled te walu (800) ne gatus ne leg-un, wey nakaanak pad man-e sikandin te me lukes wey me malitan. <sup>5</sup>Migginguma pad te 930 ka idad ni Adan ne hendue migpatey sikandin.

 $^6$ Te 105 e ka idad ni Sit, nakaanak sikandin te lukes ne si Inus.  $^7$ Pegkeetew ni Inus, neuyag pad si Sit seled te 807 ne leg-un, wey nakaanak pad man-e sikandin te me lukes wey me malitan.  $^8$ Migginguma pad te 912 ka idad ni Sit ne hendue migpatey sikandin.

<sup>9</sup>Te siyam e ne pulu (90) ka idad ni Inus, nakaanak sikandin te lukes ne si Kinan. <sup>10</sup>Pegkeetew ni Kinan, neuyag pad si Inus seled te 815 ne leg-un, wey nakaanak pad man-e sikandin te me lukes wey me malitan. <sup>11</sup>Migginguma pad te 905 ka idad ni Inus ne hendue migpatey sikandin.

- x. 4:25 Te Hibruwanen: "imbehayan" ka kaluwasan te lalag ne "Sit."
- y. 5:1-2: Hin 1:27-28.
- z. 5:2: Mat 19:4; Mar 10:6.

<sup>12</sup>Te pitu e ne pulu (70) ka idad ni Kinan, nakaanak sikandin te lukes ne si Mahalalil. <sup>13</sup>Pegkeetew ni Mahalalil, neuyag pad si Kinan seled te 840 ne leg-un, wey nakaanak pad sikandin te me lukes wey me malitan. <sup>14</sup>Migginguma pad te 910 ka idad ni Kinan ne hendue migpatey sikandin.

<sup>15</sup>Te hen-em e ne pulu wey lalimma (65) ka idad ni Mahalalil, nakaanak sikandin te lukes ne si Harid. <sup>16</sup>Pegkeetew ni Harid, neuyag pad si Mahalalil seled te 830 ne leg-un, wey nakaanak pad man-e sikandin te me lukes wey me malitan. <sup>17</sup>Migginguma pad te 895 ka idad ni Mahalalil ne hendue migpatey sikandin.

<sup>18</sup>Te 162 e ka idad ni Harid, nakaanak sikandin te lukes ne si Inuk. <sup>19</sup>Pegkeetew ni Inuk, neuyag pad si Harid seled te walu ne gatus (800) ne leg-un, wey nakaanak pad man-e sikandin te me lukes wey me malitan. <sup>20</sup>Migginguma pad te 962 ka idad ni Harid ne hendue migpatey sikandin.

<sup>21</sup>Te hen-em e ne pulu wey lalimma (65) ka idad ni Inuk, nakaanak sikandin te lukes ne si Mitusila. <sup>22</sup>Te pegkeetew ni Mitusila, amana ne talag-alukuy si Inuk te Manama seled te tatelu ne gatus (300) ne leg-un, wey nakaanak pad man-e si Inuk te me lukes wey me malitan. <sup>23</sup>Purisu migginguma te 365 ka idad din. <sup>24aa</sup>Ne amana talag-alukuy si Inuk te Manama. Nataman, warad e kitaa si Inuk su imbatun e sikandin te Manama.

<sup>25</sup>Te 187 e ka idad ni Mitusila, nakaanak sikandin te lukes ne si Lamik. <sup>26</sup>Pegkeetew ni Lamik, neuyag pad si Mitusila seled te 782 ne leg-un, wey nakaanak pad sikandin te me lukes wey me malitan. <sup>27</sup>Migginguma pad te 969 ka idad ni Mitusila ne hendue migpatey sikandin.

<sup>28</sup>Te 182 e ka idad ni Lamik, nakaanak sikandin te lukes <sup>29</sup>wey migngaranan din sikandin ki Nuwi<sup>ab</sup> su migkahi sikandin, "Seini ne bate ka egpakabulig kanta te keyirapan ta tenged te pegdilus te Magbebaye ne Manama te tane." <sup>30</sup>Pegkeetew ni Nuwi, neuyag pad si Lamik seled te 595 ne leg-un, wey nakaanak pad man-e sikandin te me lukes wey me malitan. <sup>31</sup>Migginguma pad te 777 ka idad ni Lamik ne hendue migpatey sikandin.

<sup>32</sup>Te miglalimme e ne gatus (500) ka idad ni Nuwi, nakaanak sikandin te tatelu ne lukes ne ensi Sim, si Ham, wey si Hapit.

aa. 5:24: Hib 11:5; Hud 14.

ab. 5:29 Ka "Nuwi", hendue te Hibruwanen ne lalag ne iyan igpasabut te "liwang".

# 6

#### Ka mareet ne me himu te me etew

<sup>1ac</sup>Nataman, migmasalig e ka me etew kayi te ampew te tane, wey migmasalig e degma ka anak dan ne me malitan. <sup>2</sup>Te pegkakita te me anak te Manama ne mateles amana ka me mengebay, impangasawa ran e ka igkeupii ran. <sup>3</sup>Ne migkahi ka Magbebaye ne Manama, "Kena a egkeupian ne egkeuyag ka me etew te ware egtamanan, su etew re sikandan. Egbehayan ku naan de sikandan te 120 ne leg-un, ne egkataman, egparusaan kud sikandan." <sup>4ad</sup>Te seeye ne timpu wey minsan pad te egpakasinundul ne me leg-un, due me eleggasi kayi te ampew te tane. Sikandan ka me kabuhalan te seeye se me anak te Manama ne nakapangasawa te me mengebay. Ka me eleggasi ka me bahani wey migbantug ne me etew te dengan ne timpu.

<sup>5ae</sup>Nakita te Magbebaye ne Manama ne egkanas-nasian e ka mareet ne hinimuwan te me etew kayi te ampew te tane. Mareet layun ka langun ne egsumsumanen dan wey ka igkeupii ran. <sup>6</sup>Ne dutu, nekegsendit e ka Magbebaye ne Manama te neyimu rin ka etew ne kayi te ampew te tane, wey miglungku e sikandin. <sup>7</sup>Purisu migkahi e sikandin, "Egguleen ku kayi te ampew te tane ka me etew ne innimu ku. Egguleen ku degma ka langun ne me mananap wey me manukmanuk su nekegsendit a te neyimu ku sikandan." <sup>8</sup>Piru, due sabeka ne etew ne ingkahale te Magbebaye ne Manama, sikandin si Nuwi.

#### Ka arka ne innimu ni Nuwi

<sup>9af</sup>Seini ka pangguhuren meyitenged ki Nuwi. Si Nuwi, matareng ne etew sikandin, ware igkarew-ey kandin te seeye ne timpu, wey talag-alukuy sikandan te Manama. <sup>10</sup>Ne due tatelu ne anak din ne ensi Sim, si Ham, wey si Hapit.

<sup>11</sup>Piru nakita te Manama ne mareet ka duma ne me etew, wey nekeempet e ka mareet ne hinimuwan dan kayi te ampew te tane. <sup>12</sup>Nakita rin ne mareet e ka kalibutan su subla ne malindit ka hinimuwan te langun ne etew.

- ac. 6:1-4: Hub 1:6; 2:1.
- ad. 6:4: Num 13:33.
- ae. 6:5-8: Mat 24:37; Luk 17:26; 1Pid 3:20.
- af. 6:9: 2Pid 2:5.

<sup>13</sup>Ne migkahiyan te Manama si Nuwi, "Egguleen ku ka langun ne etew su nekeempet e ka mareet ne hinimuwan dan kayi te ampew te tane. Eggukuman ku sikandan duma te kalibutan.  $^{14}$ Purisu, kuwa ka te kayu ne egngaranan te gupir wey himu ka te arka. Paninabengi nu naa ka seled, wey pamiketa nu ka seled wey ka lihawangan. <sup>15</sup>Himuwa nu seini ne 133 ne mitrus ka kalayat, daruwa ne pulu wey daruwa (22) ne mitrus ka kaluag, wey sapulu wey tatelu (13) ne mitrus ka katikang. <sup>16</sup>Atepi nu naa seini wey tukehi nu te liware te mitrus ka batang te lilliyungan. Himuwa nu seini ne tatelu ne andana wey himuwi nu te gumawan diye te kakiliran. <sup>17</sup>Egpasipukan ku ka kalibutan eyew egkahule ka langun ne miggeheyinawa. Egkammatey ka langun, <sup>18</sup>piru eggimu a te kasabutan ta te daruwa. Untud kew se alunggun te arka duma te me anak nu wey te me asawa ran. <sup>19-20</sup>Paseled ka diye te arka te tigsabeka ne lunggunan te langun ne nakalkalasi ne me mananap, me manuk-manuk, wey te langun ne egdul-ug. Eggendue sikandan keykew su eyew kene sikandan egkengamatey. <sup>21</sup>Uyan ka man-e te nakalkalasi te egkakeen wey itines nu su eyew due egkakeen niyu wey te me mananap." <sup>22ag</sup>Ne intuman ni Nuwi ka langun ne insuhu te Manama kandin.

7

# Ka pegsipuk te weyig

<sup>1</sup>Nataman, migkahiyan e te Magbebaye ne Manama si Nuwi, "Untud kew e ka taltalaanak te arka, su te langun ne me etew kayi te ampew te tane, sikeykew re ka nakita ku ne matareng. <sup>2</sup>Uyan ka te tigpitu ne lunggunan te langun ne nakalkalasi ne me mananap ne in-isip ne malinis.<sup>ah</sup> Piru ka me mananap ne in-isip ne malindit, tigsalimbeka re ne lunggunan uyana nu. <sup>3</sup>Uyan ka man-e te tigpitu ne lunggunan te langun ne nakalkalasi ne me manuk-manuk te aw-awangan, eyew egkabuhal pad sikandan kayi te ampew te tane. <sup>4</sup>Te igkapitu ne aldew kuntee, egpeuranen ku te hep-at ne pulu (40) ne aldew wey hep-at ne pulu (40) ne karusileman eyew egkengamatey ka langun ne innimu ku kayi te ampew te tane." <sup>5</sup>Ne intuman ni Nuwi ka langun ne insuhu kandin te Magbebaye ne Manama.

ag. 6:22: Hib 11:7.

ah. 7:2 Ka "mananap ne malinis" ka mananap ne eleg ne igbehey diye te Manama.

<sup>6</sup>Te impasipukan ka kalibutan, hen-em e ne gatus (600) ka idad ni Nuwi. <sup>7ai</sup>Ne mig-untud e te arka si Nuwi duma te asawa rin wey te me anak din duma te me ran eyew kene egkammatey te pegsipuk te weyig. <sup>8</sup>Seeye se in-isip ne malinis wey ke malindit naa ne me mananap, me manuk-manuk, wey ka langun ne egdulug, <sup>9</sup>nekeglunggun sikandan ka nanguntud te arka duma ki Nuwi sumale te insuhu te Manama kandin. <sup>10</sup>Pegkapenga te pitu ne aldew, migbunsud e ka weyig ne migsipuk te kalibutan.

<sup>11aj</sup>Te seeye ne timpu, hen-em e ne gatus (600) ka idad ni Nuwi. Te igkasapulu e wey pitu (17) ne aldew te igkarangeb ne bulan, naluwangan e ka langun ne sebseb wey nabusbus e ka langun ne weyig ne diye te langit. <sup>12</sup>Ne miguranan ka kalibutan seled te hep-at ne pulu (40) ne aldew wey hep-at ne pulu (40) ne karusileman. <sup>13</sup>Te aldew ne migbunsud e mig-uran, mig-untud e si Nuwi te arka duma te asawa rin wey ka tatelu ne me anak dan, ne ensi Sim, si Ham, wey si Hapit wey ka me ambey ran. <sup>14</sup>Ne nanguntud degma duma kandan ka langun ne nakalkalasi ne me mananap, ka me mahintalunan wey ka me ayam, ka me derakel wey me mallilintek, wey ka langun ne nakalkalasi ne me manuk-manuk. <sup>15</sup>Nekeglunggun ka langun ne klasi te mananap ne induma ni Nuwi te mig-untud te arka, <sup>16</sup>sumale te insuhu te Manama. Nataman, inlekeban e te Magbebaye ne Manama ka gumawan te arka.

<sup>17</sup>Ware migkerit ka uran seled te hep-at ne pulu (40) ne aldew, wey migdakel e ka weyig wey mig-antew e ka arka. <sup>18</sup>Ne migpanaman-taman migtulin ka weyig wey migduu e, wey mig-antew-antew e ka arka diye te weyig. <sup>19</sup>Tenged te nasublaan e ka pegdakel te weyig, natimpaan e ka me bubungan kayi te ampew te tane, minsan me matikang. <sup>20</sup>Natimpaan ka me iddus te bubungan te me pitu ne mitrus. <sup>21</sup>Sikan naa, nahule ka langun ne eggeheyinawa—ka langun ne me manukmanuk wey ka langun ne me mananap, mahintalunan wey ayam, wey ka langun ne etew. <sup>22</sup>Naamin nammatey ka eggeheyinawa kayi te ampew te tane. <sup>23</sup>Inggule te Magbebaye ne Manama ka langun kayi te kalibutan, ne si Nuwi naan de wey ka me duma rin ne nekeuntud te arka ka ware nammatey. <sup>24</sup>Ne nabunbunan te weyig ka kalibutan seled te 150 ne aldew.

ai. 7:7: Mat 24:38-39; Luk 17:27.

aj. 7:11: 2Pid 3:6.

8

# Ka pegtigkus te weyig

<sup>1</sup>Te seeye ne timpu, ware ded nalingawi te Manama ensi Nuwi wey ka langun ne me mananap ne duma rin diye te arka. Seeye naa, impakalamahan din ka kalibutan wey nabunsuran e degma migtigkus ka weyig. <sup>2</sup>Ne insengseng din e ka langun ne me sebseb wey ka langun ne imbayaan te weyig ne diye te langit, wey migkerit e ka uran. <sup>3</sup>Ne migpabulus migtigkus ka weyig. Te miggingume e te 150 ne aldew ka pegsipuk te weyig, <sup>4</sup>nakasanglad e ka arka diye te me bubungan diye te Ararat te igkasapulu wey pitu (17) ne aldew te igkapitu ne bulan. <sup>5</sup>Ne migpabulus migtigkus ka weyig taman te egkakite e ka iddus te me bubungan te an-anayan ne aldew te igkasapulu ne bulan.

<sup>6</sup>Te miglihad e ka hep-at ne pulu (40) ne aldew, inlukatan e ni Nuwi ka bintana te arka. <sup>7</sup>Ne dutu inlekaan din e ka sabeka ne uwak, wey miglayanglayang e seini taman te neetiyan e ka weyig. <sup>8</sup>Nataman inlekaan e man-e ni Nuwi ka sabeka ne seleppati eyew egkanengnengan din ke mababew e ka weyig. <sup>9</sup>Piru ware egkalatunan te seleppati tenged su maralem pad ka weyig, wey miglibed e sikandin diye ki Nuwi diye te arka. Ne impalatun ni Nuwi ka seleppati diye te belad din wey impaseled e diye te arka. <sup>10</sup>Ne migtetahad pad sikandin te pitu ne aldew, ne miglekaan din e man-e ka seleppati. <sup>11</sup>Te egkasagkup e, miglibed e ka seleppati ne migbange te meilem ne dewun te kayu ne ulibu! Sikan naa, nakanengneng e si Nuwi ne mababew e ka weyig. <sup>12</sup>Nataman migtetahad pad man-e si Nuwi te lein ne pitu ne aldew, ne inlekaan din e man-e ka seleppati, wey warad seini miglibed.

<sup>13</sup>Te 601 e ka idad ni Nuwi, te an-anayan ne aldew te an-anayan ne bulan, neetiyan en iya ka weyig. Ne inlekat ni Nuwi ka atep te arka wey migpamantew sikandin, ne dutu, nakita rin ne nammare e ka tane! <sup>14</sup>Te igkararuwa ne pulu wey pitu (27) ne aldew te igkarangeb ne bulan, migmammare en iya ka tane.

<sup>15</sup>Ne migkahiyan te Manama si Nuwi, <sup>16</sup>"Lihawang kew e due te arka ka taltalaanak duma te me ambey nu. <sup>17</sup>Palihawanga nud e degma ka langun ne me mananap wey me manuk-manuk eyew egkabuhal wey egpekeempet kayi te ampew te tane." <sup>18</sup>Seeye naa, miglihawang e ensi Nuwi ka taltalaanak duma te me ambey rin. <sup>19</sup>Ka langun ne me mananap, ka me mahintalunan wey me ayam, wey ka langun ne me manuk-manuk, nanlihawang e degma diye te arka sumale te kandan ne kalasiyan.

Ka pegpanubad ni Nuwi

<sup>20</sup>Ne miggimu si Nuwi te altar ne eg-unturan te egtutungen ne mananap, wey mig-angey sikandin te langun ne klasi te mananap wey manuk-manuk ne inisip ne malinis. Intutung din seeye diye te altar isip igpanubad diye te Magbebaye ne Manama. <sup>21</sup>Te naarek e te Magbebaye ne Manama ka lansi, nahale sikandin wey migkahi diye te geyinawa rin, "Kene kud en iya egdilusen ka tane tenged te neyimu te me etew, minsan ke mareet iya ka suman-suman dan ligkat te bate pad sikandan. Kene kud e egguleen ka langun ne eggeheyinawa, iling te neyimu ku.

<sup>22</sup>"Taheed te duen pad kalibutan,

Duen pad timpu ne egpakapamula wey egpakahaani,

Due timpu ne maagsil wey due timpu ne meinit,

Due degma timpu ne eggulabung wey due degma timpu ne eglengleng,

Due maaldew wey due marusilem.

Seini se langun, kene egkataman."

9

# Ka kasabutan te Manama diye ki Nuwi

<sup>1ak</sup>Impanalanginan te Manama si Nuwi wey ka me anak din wey migkahiyan, "Kabuhal kew eyew egpekeempet ka me kabuhalan niyu kayi te ampew te tane. <sup>2</sup>Egkengaaldek kaniyu ka langun ne me mananap, me manuk-manuk, wey me ngalap. Sikaniyu ka egbuut kandan, <sup>3</sup>wey egpakakeen kew e kuntee due. Dengan, iyan ku re imbehey kaniyu ka me pinamula eyew egkeenen niyu. Piru kuntee, igbehey kud degma kaniyu seini se langun eyew egkeenen niyu. <sup>4al</sup>Piru kene kew en iya keen te mananap ne ware naawe ka langesa te peggimatey, tenged

- ak. 9:1: Hin 1:28.
- al. 9:4: Lib 7:26-27; 17:10-14; 19:26; Diy 12:16,23; 15:23.

su ka langesa ka migligkatan te geyinawa. <sup>5</sup>Ke due etew ne eggimatey te etew, eglegparan ku sikandin. Ke due mananap ne eggimatey te etew, eglegparan ku degma sika. <sup>6am</sup>Minsan hentew ka egbubunu, egbunuen degma sikandin. Su innimu te Manama ka etew ne nekeiling kandin. <sup>7an</sup>Ne sikaniyu, kabuhal kew naa su eyew egpekeempet kew kayi te ampew te tane."

<sup>8</sup>Ne migkahiyan te Manama ensi Nuwi wey ka me anak din, <sup>9</sup>"Kuntee, eggimu a te kasabutan ta wey peendiye te langun ne me kabuhalan niyu, <sup>10</sup>wey peendiye man-e te langun ne eggeheyinawa—ka me manuk-manuk wey me mananap—ka langun ne nanlihawang diye te arka duma kaniyu. <sup>11</sup>Seini ka kasabutan ne eggimuwen ku diye te kaniyu: kene kud e egguleen pinaahi te pegpasipuk te weyig ka langun ne eggeheyinawa. Kene kud e eg-abayan te egdereet ka kalibutan pinaahi te pegsipuk te weyig." <sup>12</sup>Ne migkahi e man-e ka Manama, "Ka palinneu te kasabutan ta wey te langun ne me mananap, wey peendiye te egginguma ne me kabuhalan niyu, <sup>13</sup>iyan ka baluntu ne egpalepawen ku diye te me gapun. Sika ka palinneu te kasabutan ku kaniyu te nangugpe te kalibutan. <sup>14</sup>Tagse eglibulungen ku ka me gapun diye te aw-awangan ne egkakite e ka baluntu, <sup>15</sup>egsumsumanen ku ka kasabutan ta wey peendiye te langun ne me mananap, ne kenad en iya egkahule ligkat te pegsipuk te weyig ka langun ne eggeheyinawa. <sup>16</sup>Emun ke eglepew e ka baluntu diye te me gapun, egpitawen ku seini wey egsumsumanen ku ka ware egtamanan ne kasabutan ta wey peendiye te langun ne eggeheyinawa kayi te ampew te tane. <sup>17</sup>Sika ka palinneu te innimu ku ne kasabutan ta wey peendiye te langun ne eggeheyinawa kayi te ampew te tane."

#### Ka me anak ni Nuwi

<sup>18</sup>Seini ka me anak ni Nuwi ne nanlihawang diye te arka—si Sim, si Ham wey si Hapit. (Ne si Ham ka amey ni Kanaan.) <sup>19</sup>Seini se tatelu ne anak ni Nuwi, iyan migligkatan te langun ne etew kayi te ampew te tane.

 $^{20}$ Si Nuwi, talabasukan wey sikandin ka an-anayan ne migpamula te paras.  $^{21}$ Due timpu ne mig-inum sikandin te binu ne ligkat te paras, wey newubug e sikandin. Ne dutu nakalipereng e sikandin ne migpalawas diye te balungbalung din.  $^{22}$ Ne si Ham ne amey ni Kanaan, nakita rin ne migpalawas ka amey rin,

am. 9:6: Iks 20:13; Hin 1:26.

sikan naa ka migkahiyan din e ka daruwa ne suled din diye te lihawangan. <sup>23</sup>Ne migkuwa si Sim wey si Hapit te manggad wey insampey ran diye te pamanayen dan. Ne mig-isues sikandan ka migseled diye te balungbalung ne migbunbun te amey ran. Warad iya sikandan miglilingey eyew kene dan egkakita ka amey ran ne migpalawas. <sup>24</sup>Nataman, te naalipaspasan e si Nuwi wey nanengnengan din e ka innimu ni Ham, ka anak din ne igkalitan, <sup>25</sup>migkahi e sikandin,

"Egkarilus si Kanaan. Egkeyimu sikandin ne uripen te me suled din."

<sup>26</sup>Ne migkahi man-e sikandin,

"Sayeen ka Magbebaye ne Manama, ka Manama ni Sim!

Egkeyimu ne uripen ni Sim si Kanaan.

<sup>27</sup>Egbuhalen te Manama si Hapit

wey eglemung ka me kabuhalan din diye te me kabuhalan ni Sim.

Ne egkeuripen degma ni Hapit si Kanaan."

 $^{28}\mbox{Pegkapenga}$  te pegsipuk te weyig, neuyag pad si Nuwi te 350 ne leg-un.  $^{29}\mbox{Ne}$  migpatey sikandin te 950 e ka idad din.

# 10

#### Ka me kabuhalan te me anak ni Nuwi

(1 Kru. 1:5-23)

<sup>1</sup>Seini ka pangguhuren meyitenged te me kabuhalan te me anak ni Nuwi ne si Sim, si Ham, wey si Hapit. Nakaanak sikandan pegkapenga te pegsipuk te weyig.

<sup>2</sup>Ne seini ka me lukes ne anak ni Hapit—si Gumir, si Magug, si Madai, si Haban, si Tubal, si Misik, wey si Tiras. <sup>3</sup>Seini ka me kabuhalan man-e ni Gumir—si Askinas, si Ripat, wey si Tuggarma. <sup>4</sup>Seini ka me kabuhalan ni Haban—si Ilisa, si Tarsis, si Kitim, wey si Dudanim. <sup>5</sup>Sikandan ka me kaapuan te me etew ne nekeempet nangugpe diye te ilis te dahat wey diye te me pulu te dahat. Sikandan langun ka me kabuhalan ni Hapit ne nangugpe diye te nalein-lein ne me inged, wey nalein-lein e degma ka me tribu wey linalahan dan.

<sup>6</sup>Ne seini ka me lukes ne anak ni Ham—si Kus, si Ihiptu, si Put, wey si Kanaan. <sup>7</sup>Seini ka me kabuhalan man-e ni Kus—si Siba, si Habila, si Sabata, si Raama, wey si Sabtika. Ne seini degma ka kabuhalan ni Raama—si Saba wey si Dadan. <sup>8</sup>Ne duen pad man-e anak ni Kus ne egngaranan ki Nimrud, ne iyan ananayan ne bahani kayi te ampew te tane <sup>9</sup>wey subla ne meinges ne mannitingen. Purisu, ke due meinges ne mannitingen, due degma lalahen ne eggenendue, "Egpekeiling seini ne etew ki Nimrud te meinges ne mannitingen." <sup>10</sup>Ka ananayan ne me siyudad ne migmanduan ni Nimrud, iyan sika se Babil, Irak, wey Akad. Seini se tatelu ne siyudad sakup te inged ne egngaranan te Sinar. <sup>11</sup>Puun te seeye ne inged, miggendiye si Nimrud te Asiriya wey migpasasindeg sikandin te me siyudad ne Ninibi, Rihubut-ir, Kala, <sup>12</sup>wey Risin ne diye te eletanan te Ninibi wey te Kala, ka dakel ne siyudad.

 $^{13}$ Ne si Ihiptu, sikandin ka migligkatan te me etew ne matig-Ludim, matig-Anamim, matig-Lahabim, matig-Niptuhim,  $^{14}$ matig-Pitrusim, matig-Kasiluhim, wey matig-Kapturim (ne migligkatan te me Pilistihanen).

<sup>15</sup>Seini ka me anak ni Kanaan, si Sidun ka panganey ne anak din, wey si Hit. <sup>16</sup>Si Kanaan ka migligkatan man-e te me Hibusihanen, me Amurihanen, me Girgasihanen, <sup>17</sup>me Hibihanen, me Arkihanen, me Sinihanen, <sup>18</sup>me Arbadihanen, me Simarihanen, wey me Hamatihanen. Nataman, natalagtag e ka me tribu ne kabuhalan ni Kanaan, <sup>19</sup>wey nekeempet e sikandan nangugpe puun te Sidun, peendiye te Girara taman te Gasa, peendiye man-e te Suduma, Gumura, Adma wey Sibuwim taman te Lasa. <sup>20</sup>Sikandan langun ka me kabuhalan ni Ham. Ne naleinlein ne me inged ka nangugpaan dan wey nalein-lein degma ka me tribu wey linalahan dan.

<sup>21</sup>Ne ka kakey ni Hapit ne si Sim, iyan migligkatan te langun ne me Hibruwanen. <sup>22</sup>Seini ka me anak din ne lukes—si Ilam, si Asur, si Arpaksad, si Lud, wey si Aram. <sup>23</sup>Seini ka me kabuhalan man-e ni Aram—si Us, si Hul, si Gitir, wey si Mas. <sup>24</sup>Ne si Arpaksad, nakaanak ki Sila. Ne si Sila, nakaanak ki Ibir.

<sup>25</sup>Daruwa ka lukes ne anak ni Ibir—ka sabeka egngaranan ki Pilig su nabaad ka me etew kayi te ampew te tane te seeye ne timpu. Ne si Huktan ka ngaran te suled din. <sup>26</sup>Ne si Huktan ka migligkatan enni Almudad, ni Silap, ni Hasarmabit, ni Hira, <sup>27</sup>ni Haduram, ni Usal, ni Dikla, <sup>28</sup>ni Ubal, ni Abimail, ni Siba, <sup>29</sup>ni Upir, ni Habila, wey ni Hubab. Sikandan langun ka me anak ni Huktan. <sup>30</sup>Diye sikandan nangugpe te inged ligkat te Misa taman te Sipar ne diye te me bubungan ne dapit te igsile. <sup>31</sup>Sikandan langun ka me kabuhalan ni Sim. Ne nalein-lein ne me inged ka nangugpaan dan wey nalein-lein e degma ka me tribu wey linalahan dan.

<sup>32</sup>Sikandan langun ka me kabuhalan te me anak ni Nuwi ne neyimu ne nalein-lein ne me nasud sumale te me kaap-apuan dan. Te pegkeimpus te pegsipuk te weyig, natalagtag e sikandan minsan hendei.

# 11

### Ka titikangi ne baley diye te Babil

<sup>1</sup>Te an-anayan, sabeka re ka linalahan te me etew kayi te ampew te tane. <sup>2</sup>Te nangalin e ka me etew ne diye egpuun te igsile, nekeuma sikandan diye te maluag ne napu ne egngaranan te Sinar wey diyad e sikandan nangugpe. <sup>3-4</sup>Ne migpalalahey sikandan ne miggenendue, "Eggimu ki te siyudad ne due titikangi ne baley ne egpekeuma diye te langit su eyew egmabantug ka ngaran ta wey eyew kene ki egpekegsuwey-suwey kayi te ampew te tane. Egpangimu ki te tisa ne egdalapen ta te hapuy su eyew egmakehal." Sikan naa, migpangimu sikandan te me tisa wey migkuwa te piket su eyew egpegdekketen dan ka me tisa.

<sup>5</sup>Ne migpamaneug ka Magbebaye ne Manama eyew te pegleuy te siyudad wey te baley ne titikangi ne eggimuwen te me etew. <sup>6</sup>Ne migkahi ka Magbebaye ne Manama, "Pitew kew! Nasabeka ka seini ne me etew wey sabeka re ka linalahan dan. Ne seini se inggimu ran bunsuranan pad te egpangimuwen dan. Te kene egkaluhey, egpekeyimu e sikandan te langun ne igkeupii ran. <sup>7</sup>Na," kahi te Magbebaye ne Manama, "egpamaneug ki eyew egpegsewuhen ta ka kandan ne linalahan su eyew kene egpekegsabutey sikandan." <sup>8</sup>Sikan naa ka immegsuweysuwey e sikandan te Magbebaye ne Manama kayi te intiru ne kalibutan wey warad e nakabulus sikandan ka eggimu te siyudad. <sup>9</sup>Purisu Babil<sup>ao</sup> ka ngaran te siyudad su diye libeha te Magbebaye ne Manama ka langun ne linalahan, wey diye migligkat ne impegsuwey-suwey rin sikandan kayi te intiru ne kalibutan.

ao. 11:9 Te Hibruwanen: "egkalibeg" ka kaluwasan te lalag ne "Babil."

#### Ka me kabuhalan ni Sim

(1 Kru. 1:24-27)

<sup>10</sup>Ne seini ka me kabuhalan ni Sim. Te miglihad e ka daruwa ne leg-un te pegsipuk te weyig, mahatus (100) e ka idad ni Sim wey nakaanak e sikandin te lukes ne si Arpaksad. <sup>11</sup>Nataman, neuyag pad si Sim seled te lalimma pad ne gatus (500) ne leg-un, wey nakaanak pad man-e sikandin te me lukes wey me malitan.

<sup>12</sup>Te tatelu e ne pulu wey lalimma (35) ka idad ni Arpaksad, nakaanak sikandin te lukes ne si Sila. <sup>13</sup>Nataman, neuyag pad si Arpaksad seled te 403 ne leg-un, wey nakaanak pad man-e sikandin te me lukes wey me malitan.

 $^{14}$ Te tatelu e ne pulu (30) ka idad ni Sila, nakaanak sikandin te lukes ne si Ibir.  $^{15}$ Nataman, neuyag pad si Sila seled te 403 ne leg-un, wey nakaanak pad mane sikandin te me lukes wey me malitan.

 $^{16}$ Te tatelu e ne pulu wey lalimma (35) ka idad ni Ibir, nakaanak sikandin te lukes ne si Pilig.  $^{17}$ Nataman, neuyag pad si Ibir seled te 430 ne leg-un, wey nakaanak pad man-e sikandin te me lukes wey me malitan.

<sup>18</sup>Te tatelu e ne pulu (30) ka idad ni Pilig, nakaanak sikandin te lukes ne si Riyu. <sup>19</sup>Nataman, neuyag pad si Pilig seled te 209 ne leg-un, wey nakaanak pad man-e sikandin te me lukes wey me malitan.

 $^{20}$ Te tatelu e ne pulu wey daruwa (32) ka idad ni Riyu, nakaanak sikandin te lukes ne si Sirug.  $^{21}$ Nataman, neuyag pad si Riyu seled te 207 ne leg-un, wey nakaanak pad man-e sikandin te me lukes wey me malitan.

 $^{22}$ Te tatelu e ne pulu (30) ka idad ni Sirug, nakaanak sikandin te lukes ne si Nahur.  $^{23}$ Nataman, neuyag pad si Sirug seled te daruwa ne gatus (200) ne leg-un, wey nakaanak pad man-e sikandin te me lukes wey me malitan.

<sup>24</sup>Te daruwe e ne pulu wey siyam (29) ka idad ni Nahur, nakaanak sikandin te lukes ne si Tira. <sup>25</sup>Nataman, neuyag pad si Nahur seled te 119 ne leg-un, wey nakaanak pad man-e sikandin te me lukes wey me malitan.

<sup>26</sup>Te pitu e ne pulu (70) ka idad ni Tira, nakaanak sikandin te tatelu ne lukes ne ensi Abram, si Nahur, wey si Haran.

#### Ka me kabuhalan ni Tira

<sup>27</sup>Ne seini ka pangguhuren meyitenged te me kabuhalan ni Tira. Si Tira ka amey enni Abram, Nahur wey ni Haran. Si Haran ka amey ni Lut, <sup>28</sup>wey diye migpatey si Haran te siyudad ne miglesutan din ne egngaranan te Ur ne sakup te me Kaldiya. Te pegpatey rin, neuyag pad mule ka amey rin ne si Tira. <sup>29</sup>Ne nakaasawe e si Abram ki Saray wey nakaasawe e si Nahur ki Milka ne anak ni Haran. Si Haran ka amey degma ni Iska. <sup>30</sup>Ne si Saray, ware mig-anak su kene egpakaanak sikandin.

 $^{31}$ Mig-awe si Tira diye te siyudad te Ur ne sakup te me Kaldiya wey induma rin ka anak din ne si Abram wey ka ambey rin ne si Saray, wey ka apu din ne si Lut ne anak ni Haran. Eggendiye perem sikandan te inged ne Kanaan, piru te pegginguma ran diye te siyudad te Haran, diyad e sikandan mig-ugpe.  $^{32}$ Ne diye namatey si Tira te 205 ka idad din.

# 12

## Ka peg-umew te Manama ki Abram

<sup>1ap</sup>Ne migkahi ka Magbebaye ne Manama diye te ki Abram, "Engkeri nu ka inged nu wey ka me karumaan nu wey ka pamilya te amey nu, ne hendiye ka te inged ne igpakita ku keykew. <sup>2</sup>Egbehayan ku sikeykew te masalig ne me kabuhalan eyew egkeyimu sikandan ne dakel ne nasud. Egpanalanginan ku sikeykew wey egmabantug ka ngaran nu su eyew egkeyimu ka ne panalangin te langun. <sup>3aq</sup>Egpanalanginan ku ka etew ne egbulig keykew, piru ka etew ne egdilus keykew, igdilus ku degma. Pinaahi keykew, egpanalanginan ku ka langun ne me nasud kayi te ampew te tane."

<sup>4</sup>Sikan naa, mig-awe e si Abram diye te Haran sumale te insuhu te Magbebaye ne Manama kandin wey migduma kandin si Lut. Te seeye ne timpu, pitu e ne pulu wey lalimma (75) ka idad ni Abram. <sup>5</sup>Induma ni Abram si Saray ne asawa rin, wey si Lut ne anaken din, wey in-uyan din ka langun ne karatuan dan wey me uripen ne nakuwa ran diye te Haran. Ne migligkat e sikandan ka eggendiye te inged te Kanaan.

Te nekeuma ran diye te Kanaan, <sup>6</sup>migleus pad man-e ensi Abram diye te matulus ne kayu ne diye te Muri, marani te inged te Sikim. (Diye pad nangugpe ka

ap. 12:1: Him 7:2-3; Hib 11:8.

aq. 12:3: Gal 3:8.

me matig-Kanaan te seeye ne timpu.) <sup>7ar</sup>Ne nataman, migpakita ka Magbebaye ne Manama ki Abram ne migkahi, "Seini ne tane ka igbehey ku te me kabuhalan nu." Ne diye miggimu si Abram te altar ne eg-unturan te egtutungen ne igbehey te Magbebaye ne Manama. <sup>8</sup>Nataman, miggalin e man-e sikandan diye te bubungan ne diye dapit te igsile ligkat te Bitil. Ne diye sikandan migtagtaheed mig-ugpe te eletanan te inged ne Bitil wey Ay. Ka Bitil dapit te iglineb wey ka Ay dapit te igsile. Ne miggimu e man-e diye si Abram te altar te Magbebaye ne Manama wey diye sikandin mig-ampu. <sup>9</sup>Ne migpabulus pad man-e ensi Abram ka eggalin-halin peendiye te inged ne Nigib.

## Si Abram diye te Ihiptu

<sup>10</sup>Te seeye ne timpu, due masumpit ne bitil diye te Kanaan. Sikan naa ka nakaleus pad man-e ensi Abram diye te Ihiptu eyew diye pad egtagtaheed egugpe. <sup>11</sup>Te hapit e egpekeuma sikandin diye te inged te Ihiptu, migkahiyan din ka asawa rin ne si Saray, "Nakanengneng a ne mateles ka amana ne malitan. <sup>12</sup>Ke egpakakita ka me matig-Ihiptu keykew, egkahi sikandan, 'Asawa ni Abram seini.' Ne eggimatayan ad nikandan, piru kene ka mule nikandan eggimatayan. <sup>13</sup>asSikan naa, kahii nu sikandan te talaari ki eyew kena a nikandan eggimatayan, wey eyew eg-ay-ayaran a nikandan te egsagsahipe tenged keykew." <sup>14</sup>Te nekeume e si Abram diye te Ihiptu, nakita iya te me matig-Ihiptu ne mateles amana ka asawa rin. <sup>15</sup>Te pegkakita kandin te me upisyal te Hari te Ihiptu, ingkahiyan dan e ka Hari te mateles iya sikandin. Puun due, in-uyan e si Saray diye te palasyu te Hari te Ihiptu. <sup>16</sup>Tenged ki Saray, insagsahipe ay-ayari te Hari te Ihiptu si Abram wey impamehayan te me karniru, me kambing, me baka, me asnu, me kamilyu, wey me uripen.

<sup>17</sup>Piru tenged te impeuyan te Hari te Ihiptu si Saray ne asawa ni Abram, impeyingumaan te Magbebaye ne Manama te subla ne makaaldek-haldek ne dalu ka Hari wey ka me sakup din diye te palasyu. <sup>18</sup>Ne nataman, impeumew e te Hari te Ihiptu si Abram wey mig-insaan, "Nekey-a seini se innimu nu keddiey? Mania te wara a nikeykew kahii ne asawa nu bes sikandin? <sup>19</sup>Mania te migkahi ka ne talaari kew? Tenged due, impakuwa ku sikandin eyew eg-asaween ku. Na, seini red ka asawa nu, kua nu sikandin wey pangawe kew e!" <sup>20</sup>Migsuhu ka Hari te Ihiptu

ar. 12:7: Him 7:5; Gal 3:16. as. 12:13: Hin 20:2; 26:7.

te me etew rin ne igparelrel e ensi Abram duma ka asawa rin wey ka langun ne kandin. Sikan naa, impanulud dan e sikandan diye te lihawangan te Ihiptu.

# 13

## Ka pegpasuwayey ni Abram ki Lut

<sup>1</sup>Sikan naa ka miglibed e man-e ensi Abram diye te inged te Nigib duma ka asawa rin wey si Lut wey ka langun ne kandin. <sup>2</sup>Meyaman ne subla si Abram. Masalig e ka me karniru rin, me kambing, me baka, me seleppi, wey me bulawan. <sup>3</sup>Puun te Nigib, miggalin-halin e man-e sikandan ka eg-ugpe taman te nekeuma sikandan diye te intagtaheeran dan dengan te eg-ugpe ne elat-elat te Bitil wey Ay. <sup>4</sup>Seeye ka inged ne miggimuwan din dengan te altar. Diye man-e mig-ampu si Abram te Magbebaye ne Manama.

<sup>5</sup>Ne si Lut, ka migduma ki Abram, duen e degma pamilya rin wey me uripen din. Due degma me karniru rin, me kambing, wey me baka. <sup>6</sup>Tenged te suble e ne masalig ka me ayam ni Abram ki Lut, kenad e ne eleg te me ayam dan ka palayuranan ke egpekegdani sikandan ka eg-ugpe. <sup>7</sup>Sikan naa ka migpeehetey ka me talagtameng te me ayam ni Abram wey ka me talagtameng te me ayam ni Lut. Kenad ne eleg ka palayuranan te me ayam dan su te seeye ne timpu diye pad degma nangugpe ka me matig-Kanaan wey me Pirisihanen.

<sup>8</sup>Purisu, migkahiyan ni Abram si Lut, "Kene ne meupiya ne egpeeg-ehetey ka me etew nu wey ka me etew ku tenged su anaken ku sikeykew. <sup>9</sup>Meupiya pad ke egpasuwayey ki tenged su maluag pad seini se tane ne egkaayun ne egugpaan. Na, alam ka te inged ne igkeupii nu te eg-ugpe, ke igkahibang naa wey ke igkakawanan. Ke eggendiye ka te igkakawan, eggendiya a degma te igkahibang." <sup>10at</sup>Sikan naa ka migpamantew si Lut wey nakita rin ne masalig ka me weyig diye te napu te Hurdan taman te Suar, ne nekeiling te pinamulaan te Idin wey nekeiling degma te inged ne Ihiptu. (Te seeye ne timpu, ware pad dereeti te Magbebaye ne Manama ka Suduma wey Gumura). <sup>11</sup>Purisu in-alam ni Lut ka langun ne napu te Hurdan wey miggipanew e sikandin ka egpeendiye te igsile. Iling due ne paahi ne nekegsuwey si Lut ki Abram. <sup>12</sup>Si Abram, diye mig-ugpe te inged te Kanaan wey si Lut, diye mig-ugpe te marani te Suduma ne diye te me siyudad ne diye te napu. <sup>13</sup>Ne ka me etew ne nangugpe diye te Suduma, amana ne maddeet wey makasesale diye te Magbebaye ne Manama.

at. 13:10: Hin 2:10.

## Ka peggalin ni Abram diye te Hibrun

<sup>14</sup>Te nakaligkat e si Lut, migkahiyan te Magbebaye ne Manama si Abram, "Pamantawa nu ay-ayari ka langun ne inged. <sup>15au</sup>Ka langun ne tane ne egkeumaan nu te egtengteng, igbehey kud keykew wey te me kabuhalan nu wey kaniyud e te ware egtamanan. <sup>16</sup>Egpamasalihen ku ka kabuhalan nu iling kasalig te alinepung kayi te ampew te tane ne kene egkaseel. <sup>17</sup>Ne hipanew kad, panleuya nu ka langun ne tane su igbehey ku keykew seini se langun." <sup>18</sup>Nataman, miggalin e man-e si Abram ne diyad e mig-ugpe te marani te matulus ne me kayu ni Mamri diye te inged te Hibrun. Ne miggimu e man-e sikandin te altar ne eg-unturan te egtutungen ne igbehey diye te Magbebaye ne Manama.

# 14

## Ka pegpangabang ni Abram ki Lut

<sup>1</sup>Te seeye ne timpu, due hep-at ne Hari ne migpakig-ehet te lalimma ne Hari. Seini ka hep-at ne Hari—si Amrapil ka Hari ne diye te Sinar, si Aryuk ka Hari te Ilasar, si Kadurlahumur ka Hari te Ilam, wey si Tidal ka Hari te Guyim. <sup>2</sup>Seini ka lalimma ne Hari ne migpakig-ehet kandan—si Bara ne Hari te Suduma, si Birsa ne Hari te Gumura, si Sinab ne Hari te Adma, si Simibir ne Hari te Sibuwim, wey ka Hari degma te Bila (wey ke Suar). <sup>3</sup>Ne migsabeka te keseg dan ka lalimma ne Hari diye te Napu te Sidim (ne egngaranan e kuntee te Namatey ne Dahat). <sup>4</sup>Su seled te sapulu wey daruwa (12) ne leg-un, nasakup pad sikandan ni Hari Kadurlahumur, piru nataman, te igkasapulu e wey tatelu (13) ne leg-un, migsukul e sikandan kandin.

<sup>5</sup>Te seup ne leg-un, miggingume e ensi Kadurlahumur wey ka duma rin ne me Hari wey ka me sundalu ran eyew egpakig-ehet kandan. Piru te ananayan, migpakig-ehet pad ensi Kadurlahumur te lein ne me tribu wey migpanalu sikandan. Seini ka lein ne me tribu ne natalu ran—ka Ripayhanen ne diye te Astarut Karnaim, ka me Susihanen ne diye te Ham, ka me Imihanen ne diye te napu te Kiriataim, <sup>6</sup>wey ka me Hurihanen ne diye te me bubungan te Siir. Ne diyad e nataman ensi Kadurlahumur ka migpanlupug kandan te Ilparan ne diye te ilis te napu te mammara ne inged ne kene egkeugpaan. <sup>7</sup>Nataman, miglibed e

au. 13:15: Him 7:5.

ka hep-at ne Hari wey nekeendiyad te inged ne Kadis ne egngaranan dengan te Inmispat. Naahew ran ka langun ne inged te me Amalikanhun wey natalu ran ka me Amurihanen ne diye mig-ugpe te Hasasun Tamar.

<sup>8</sup>Ne impalibulung te me Hari te Suduma, Gumura, Adma, Sibuwim, wey Bila ka me sundalu ran diye te Napu te Sidim. Ne migpakig-ehet e sikandan <sup>9</sup>ki Kadurlahumur ne Hari te Ilam wey te duma rin ne me Hari te Guyim, Sinar, wey Ilasar. Lalimma ne Hari ka migpakig-ehet te hep-at ne Hari. <sup>10</sup>Ne diye te Napu te Sidim, due sesalihi ne me bitu ne napenu te ispaltu. Te egpamallahuy e ka me Hari te Suduma wey Gumura wey ka me sundalu ran, due neneulug te me bitu wey due duma ne nakapallahuy diye te me bubungan. <sup>11</sup>Ne impanguwa te hep-at ne Hari ka langun ne diye te siyudad te Suduma wey Gumura, minsan ka langun ne egkakeen, wey nangipanew e sikandan. <sup>12</sup>Ne in-uyan dan degma ka anaken ni Abram ne si Lut ne diye mig-ugpe te Suduma, wey impanguyan dan ka langun ne karatuan din.

<sup>13</sup>Ne due nakapallahuy ne migpanugtul ki Abram ne Hibruwanen ne si Lut, indakep. Te seeye ne timpu, diye mig-ugpe si Abram te marani te matulus ne me kayu ni Mamri ne Amurihanen ne suled ni Iskul wey Anir. Sikandan ki Abram ka egpepangpangabangey. <sup>14</sup>Te pegkarineg ni Abram ne indakep ka anaken din, inlibulung din e ka 138 ne talagbubunu din wey inlupug dan e ka hep-at ne Hari taman diye te inged ne Dan. <sup>15</sup>Te pegkamarusilem, imbaad-baad e ni Abram ka me etew rin wey inlusuran dan e ka me kuntere dan wey natalu ran sikandan. Ne inlupug e enni Abram ka nakapallahuy taman diye te Huba ne diye te igkahibang ne balabahan dapit te igsile te Damasku. <sup>16</sup>Ne nataman, naawi dan ded ka langun ne karatuan ne naahew te me kuntere wey naawi dan ded degma si Lut wey ka me karatuan din lagkes ka me malitan wey ka langun ne etew ne nenaddakep.

# Ka pegpanalangin ni Milkisidik ki Abram

<sup>17</sup>Te peg-uli ni Abram puun te pegpanatalu rin engki Kadurlahumur wey te duma rin ne me Hari, insinug-ung e sikandin te Hari te Suduma diye te Napu te Sabi. (Ne egngaranan degma te Napu te Hari.) <sup>18</sup>avInsinug-ung degma sikandin ni Milkisidik ne Hari te Salim wey talagpanubad degma te Amana ne Mabantug ne Manama. Mig-uyanan din te paan wey binu si Abram. <sup>19</sup>Ne impanalanginan din si Abram te migkahi,

av. 14:18-20: Hib 7:1-10.

"Egpanalanginan si Abram te Amana ne Mabantug ne Manama ne iyan miggimu te langit wey tane.

 $^{20}$ Egdayanen ka Amana ne Mabantug ne Manama ne migbehey keykew te kapanaluwan diye te kuntere nu!"

Ne imbehayan ni Abram si Milkisidik te igkasapulu ne baad te langun ne naawi din.

<sup>21</sup>Ne migkahiyan te Hari te Suduma si Abram, "Keykew e ka langun ne me karatuan ne naawi nu. Piru iuli nu re kayi te keddi ka langun ne etew ku."

<sup>22</sup>Piru migtabak si Abram, "Migsaad a diye te Magbebaye ne Manama, ka Amana ne Mabantug ne Manama ne iyan miggimu te langit wey tane, <sup>23</sup>ne kena a egkuwa te minsan nekey ne keykew, minsan bula-bula wey ke hiket naa te sandalyas. Su eyew kene ka egpakakahi ne naratu a tenged keykew. <sup>24</sup>Ware minsan nekey ne egkuen ku gawas te nakeen e te me etew ku. Piru pakua nu te me baad dan ka me duma ku ne ensi Anir, si Iskul, wey si Mamri."

# 15

## Ka saad te Manama diye te ki Abram

<sup>1</sup>Te ware naluhey, hendue te impataheinep si Abram te Magbebaye ne Manama wey migkahiyan,

"Kene ka kaaldek Abram.

Sikeddi ka kalasag nu

wey dakel ka ig-unag ku keykew."

<sup>2</sup>Piru mig-inse si Abram, "Magbebaye ne Manama, egmenuwen ku naa ka ig-unag nu keddi te ware pad anak ku? Iyan e egpakakamuney te karatuan ku ke egpatey a si Iliisir ne matig-Damasku. <sup>3</sup>Na, tenged te ware e ma behayi nikeykew te anak, seini se uripen ku ne miglesut kayi te baley ku ka egpakakamuney te karatuan ku."

<sup>4</sup>Ne migkahiyan e man-e sikandin te Magbebaye ne Manama, "Kene ne iyan egpakakamuney te karatuan nu ka uripen nu, ke kene, ka anak nu iya." <sup>5aw</sup>Ne in-uyan sikandin te Magbebaye ne Manama diye te lihawangan wey migkahiyan, "Leng-ag ka diye te langit wey seela nu ka me bituen ke egpakaseel ke naa. Iling naa degma due kasulug ka me kabuhalan nu."

 $^{6ax}$ Migpalintutuu si Abram te Magbebaye ne Manama, ne puun due, in-isip din ne matareng si Abram.

<sup>7</sup>Ne migkahiyan sikandin te Magbebaye ne Manama, "Sikeddi ka Magbebaye ne mig-uyan keykew ligkat te inged ne Ur ne sakup te me Kaldiya, eyew igbehey ku keykew ka seini ne tane."

<sup>8</sup>Piru mig-inse si Abram, "Magbebaye ne Manama, egmenuwen ku naa te pegnengneng ne egkakeddiey e seini keureme?"

<sup>9</sup>Ne migtabak ka Magbebaye ne Manama, "Uyani a te baka, wey kambing, wey karniru ne lukes, ne elin tigtatelu ne leg-un ka idad dan, wey uyan ka mane te tukmu wey seleppati." <sup>10</sup>Ne impanguyan seeye langun ni Abram diye te Manama, wey innimatayan din ka tagse sabeka ne ayam wey impanuley rin seeye gawas te tukmu wey seleppati. Ne immeg-andang din ka tagse suley. <sup>11</sup>Ne due me manuk-manuk ne miglene diye te impameri rin ne me ayam eyew egkeen perem dutu, piru in-alew seeye ni Abram.

<sup>12</sup>ayTe hapit e eglineb ka aldew, nakalipereng wey naalineknek si Abram, ne due makaaldek-haldek ne migginguma kandin.<sup>az</sup> <sup>13</sup>ba</sup>Ne migkahiyan sikandin te Magbebaye ne Manama, "Eggalin ka me kabuhalan nu diye te inged ne kene ne kandan. Diye egkeuripen sikandan wey egde-deehen seled te hep-at ne gatus (400) ne leg-un. <sup>14bb</sup>Piru eglegparan ku ka nasud ne mig-uripen te me kabuhalan nu. Nataman, egpakaawe sikandan te seeye ne inged wey egpekeuyan sikandan te dakel ne karatuan. <sup>15</sup>Ne meyitenged mule keykew, egkabuyag ke pad, wey egpatey ka keureme ne meupiya ka peglebeng keykew. <sup>16</sup>Ne ka me kabuhalan nu, wey e egpakalibed sikandan kayi ke egkatuman ka hep-at ne gatus (400) ne leg-un. Kene ku pad egdeldelen tenged te sale dan ka me Amurihanen ne mig-ugpe kayi su kene pad eleg ne timpu ne eglegparan sikandan."

- aw. 15:5: Rum 4:18; Hib 11:12.
- ax. 15:6: Rum 4:3; Gal 3:6; San 2:23.
- ay. 15:12: Hub 4:13-14.
- az. 15:12 Te Hibruwanen: due makaaldek-haldek ne durusilemi ne migginguma kandin.
- ba. 15:13: Iks 1:1-14; Him 7:6.
- bb. 15:14: Iks 12:40-41; Him 7:7.

<sup>17</sup>Te miglineb e ka aldew wey te migmarusilem e, sahuhune ne due miglepew ne kuren ne mig-eebel wey sulu ne nalegleg. Ne diye seeye migbaye te elat te impanuley rin ne me ayam. <sup>18bc</sup>Te seeye ne timpu, migsaad ka Magbebaye ne Manama diye ki Abram ne migkahi, "Igbehey ku diye te me kabuhalan nu seini se tane ligkat te weyig ne diye te Ihiptu taman te dakel ne Weyig ne Iyupratis. <sup>19</sup>Seini ka inged ne mig-ugpaan te me Kinihanen, me Kinisihanen, me Kadmunihanen, <sup>20</sup>me Hitihanen, me Pirisihanen, me Ripayhanen, <sup>21</sup>me Amurihanen, me Kanaanhun, me Girgasihanen, wey me Hibusihanen."

# 16

# Ka talaanak ne si Hagar wey si Ismail

<sup>1</sup>Ne kene egpakaanak ka asawa ni Abram ne si Saray. Due uripen din ne matig-Ihiptu ne egngaranan ki Hagar. <sup>2</sup>Ne migkahiyan ni Saray si Abram, "Tenged te ware e ma behayi te Magbebaye ne Manama te anak, hendiyei nu ka uripen ku wey huliri nu sikandin. Kema ke egligkat kandin duen ded anak ku." Ne intuman ni Abram seeye se ingkahi te asawa rin. <sup>3</sup>Purisu, te igkasapulu ne legun te peg-ugpe ni Abram diye te Kanaan, imparuwey e ni Saray ki Abram si Hagar. <sup>4</sup>Ne migguliran e ni Abram si Hagar wey nataman, naberes e sikandin. Te pegkanengnengi ni Hagar te egkaberes e sikandin, inleig-leig din e si Saray.

<sup>5</sup>Ne migkahiyan ni Saray si Abram, "Sikeykew ka eleg ne egkasenditan te pegleig-leig ni Hagar keddi. Sikeddi ka migbehey kandin diye te keykew, piru te nakanengneng din e ne egkaberes e sikandin, inleig-leig ad nikandin. Eggukum perem ka Magbebaye ne Manama ke hentew ka nakasale kayi, ke sikeykew naa wey ke sikeddi."

<sup>6</sup>Ne migtabak si Abram, "Ke iling ma rue, iyan kad balahad kandin su uripen nu ma sikandin wey himuwa nu ke nekey ka igkeupii nu diye te kandin." Nataman, in-ang-anggaan e ni Saray si Hagar, sikan naa ka migpallahuy e sikandin.

<sup>7</sup>Ne nakita si Hagar te panalihan te Magbebaye ne Manama te nekeuma rin e diye te sebseb ne diye te napu te mammara ne inged ne kene egkeugpaan. Ka seeye ne sebseb diye te dalan peendiye te Sur. <sup>8</sup>Ne mig-inse ka panalihan diye te kandin, "Hagar, uripen ni Saray, hendei ka egpuun wey hendei ka egpabulus?"

Ne migtabak si Hagar, "Impalahuyan ku ka ahalen ku ne si Saray."

bc. 15:18: Him 7:5.

 $^9$ Ne migkahi ka panalihan te Magbebaye ne Manama, "Libed ka diye te kandin wey paruma-ruma ka kandin."  $^{10}$ Ne migkahi pad man-e ka panalihan te Magbebaye ne Manama,

"Egpamasuluhen ku ne subla ka kabuhalan nu ne kenad egkaseel sikandan.

 $^{11}$ Kuntee, egkaberes ka wey te kene egkaluhey, eglesutan kad e te lukes. Ne iyan nu ingaran kandin si Ismail,  $^{\rm bd}$ 

su narineg te Magbebaye ne Manama ka pegpeyid-u-hid-u nu.

 $^{12}$ Piru ka anak nu, eg-ugpe sikandin ne egpekeiling te mahintalunan ne asnu,

eg-ehetan din ka langun, wey ka langun, eg-ehet degma kandin.

Egdiyu-diyu sikandin te me suled din."

<sup>13</sup>Ne nakakahi si Hagar diye te geyinawa rin, "Nakita ku ka Manama piru mania te wara a migpatey?" Seeye naa ingngaranan din ka Magbebaye ne Manama ne migpakiglalag kandin te, "Manama ne egpakakita."<sup>be 14</sup>Purisu ingngaranan te me etew ka belun te, "Biirlahayruy".<sup>bf</sup> Ka sika ne belun, diye te eletanan te Kadis wey Birid.

 $^{15 
m bg}$ Ne miglibed e si Hagar diye ki Saray, nataman, miglesutan e sikandin te lukes wey ingngaranan ni Abram ka bate ki Ismail.  $^{16}$ Te peglesut ni Ismail, walu e ne pulu wey hen-em (86) ka idad ni Abram.

# 17

- bd. 16:11 Te Hibruwanen: "egpakarineg ka Manama" ka kaluwasan te lalag ne "Ismail." be. 16:13 Te Hibruwanen: "ka Manama ne nakakita keddi" ka kaluwasan te lalag ne "Il
- be. 16:13 Te Hibruwanen: "ka Manama ne nakakita keddi" ka kaluwasan te lalag ne "Il Rui."
- bf. 16:14 Te Hibruwanen: "ka belun te Manama ne nakakita keddi" iyan igpasabut te lalag ne "Biirlahayruy."
- bg. 16:15: Gal 4:22.

## Ka pegtuli ka palinneu te kasabutan

<sup>1</sup>Te siyam e ne pulu wey siyam (99) ka idad ni Abram, migpakita ka Magbebaye ne Manama diye te kandin ne migkahi, "Sikeddi ka Manama ne Amana ne Maresen. Palintutuu ka keddi wey ugpe ka ne matareng. <sup>2</sup>Ne eggimuwen ku ka kasabutan ta te daruwa ne egpamasuluhen ku ka me kabuhalan nu." <sup>3</sup>Te pegkarineg dutu ni Abram, miglangkeb e sikandin diye te tane. Ne migkahiyan sikandin te Manama, <sup>4</sup>"Seini ka kasabutan ta te daruwa: egsaad a ne egkeyimu ka ne amey te masalig ne nasud. <sup>5bh</sup>Sikan naa ka kenad e ne si Abram ka ngaran nu su si Abraham<sup>bi</sup> e, su eggimuwen ku sikeykew ne amey te masalig ne nasud. <sup>6</sup>Egpamasuluhen ku ka kabuhalan nu wey egmannenasud e sikandan, wey due duma kandan ne egkeyimu ne Hari.

<sup>7bj</sup>"Egtumanen ku ka kasabutan ta wey peendiye te me kabuhalan nu, ne sikeddi ka Manama nu wey Manama te me kabuhalan nu. Kene egkataman ka seini ne kasabutan. <sup>8bk</sup>Igbehey ku keykew wey diye te me kabuhalan nu seini se tane ne intagtaheeran nu te eg-ugpe kuntee. Kaniyud e keureme seini se intiru ne tane te Kanaan te ware egtamanan, wey Manama ad nikaniyu."

<sup>9</sup>Ne migkahiyan e man-e te Manama si Abraham, "Ne iyan niyu degma katungdanan te me kabuhalan nu keureme, ka egtuman iya te kasabutan ta te daruwa. <sup>10bl</sup>Seini ka kasabutan ne egtumanen niyu, keilangan ne egtulian ka langun ne me lukes due te kaniyu. <sup>11-12</sup>Ligkat kuntee, keilangan ne egtulian niyu ka me lukes ne walu pad ne aldew ligkat te peglesut dan. Ilagkes niyu degma ka me uripen ne miglesut diye te baley niyu wey me uripen ne imbeli niyu diye te lein ne tribu. Sika ka palinneu te due kasabutan ta te daruwa wey te kabuhalan nu. <sup>13</sup>Keilangan ne egtulian ka tagse sabeka eyew due palinneu diye te lawa niyu te ware egtamanan ne kasabutan ta. <sup>14</sup>Ka ware migpatuli, keilangan ne egdeldelen su ware migtuman sikandin te kasabutan."

<sup>15</sup>Ne migkahiyan pad man-e te Manama si Abraham, "Ka asawa nu, kene nud e ngarani ki Saray, su si Sara e ka ingaran nu. <sup>16</sup>Egpanalanginan ku sikandin wey egbehayan ku sikeykew te anak ne lukes pinaahi kandin. Egkeyimu sikandin ne iney te masalig ne me nasud, wey due me kabuhalan din ne egkeyimu ne Hari."

- bh. 17:5: Rum 4:17.
- bi. 17:5 Te Hibruwanen: "amey te masalig" ka kaluwasan te lalag ne "Abraham."
- bj. 17:7: Luk 1:55.
- bk. 17:8: Him 7:5.
- bl. 17:10: Him 7:8; Rum 4:11.

<sup>17</sup>Ne mig-usengul si Abraham diye te tane. Piru nakangisi sikandin ne migkahi diye te geyinawa rin, "Egpakaanak e naan pad te mahatus (100) man-e ka idad ku? Eg-anak naan pad si Sara te siyam e ne pulu (90) ka idad din?" <sup>18</sup>Ne migkahiyan din ka Manama, "Meupiya perem ke si Ismail en iya ka egpakakuwa te karatuan ku."

<sup>19</sup>Piru migtabak ka Manama ne miggenendue, "Kene, su egpakaanak iya ka asawa nu ne si Sara te lukes wey ngarani nu sikandin ki Isaak.<sup>bm</sup> Ne ka kasabutan ta, igpabulus ku diye ki Isaak wey diye te me kabuhalan din te ware egtamanan. <sup>20</sup>Piru si Ismail, narineg ku ka pegpeyimhimenew nu meyitenged kandin. Egpanalanginan ku degma sikandin wey egbehayan ku te masalig ne anak wey egkabuhal-buhal. Egkeyimu sikandin ne amey te sapulu wey daruwa (12) ne pangulu wey eggimuwen ku degma ne dakel ne nasud ka me kabuhalan din. <sup>21</sup>Piru ka kasabutan ta mule te daruwa, diye de egkatuman te anak nu ne si Isaak ne ig-anak ni Sara te iling kayi ne timpu te seup ne leg-un." <sup>22</sup>Te nekeimpus e ka Manama ne miglalag ki Abraham, mig-awe e sikandin.

<sup>23</sup>Te seeye de iya ne aldew, intuman e ni Abraham ka insuhu te Manama kandin. Intulian din e ka anak din si Ismail wey ka langun ne uripen din—ka me lukes ne miglesut diye te baley rin wey ka impameli rin. <sup>24</sup>Te siyam e ne pulu wey siyam (99) ka idad ni Abraham ne henduen pad ne natulian sikandin, <sup>25</sup>wey sapulu e wey tatelu (13) ka idad ni Ismail ne natulian degma sikandin. <sup>26</sup>Te seeye ded ne aldew ne intulian ensi Abraham wey si Ismail <sup>27</sup>lagkes ka langun ne me uripen.

# 18

# Ka saad te Manama ne egpaanaken si Sara te lukes

<sup>1</sup>Te ware naluhey, migpakite e man-e ka Magbebaye ne Manama ki Abraham diye te matulus ne me kayu ni Mamri. Te seeye ne timpu, nekeuntud e ka aldew wey diye migpinpinnuu si Abraham te gumawan te balungbalung din. <sup>2bn</sup>Te pegpitew ni Abraham diye te kewun-an, iyan din en iya seini se tatelu ne etew ne migsasindeg diye. Te sikan de, migpallahuy e si Abraham ka migsinug-ung kandan. Ne miglangkeb sikandin diye te tane <sup>3</sup>ne migkahi, "Ahalen, ke egkaayun

bm. 17:19 Te Hibruwanen: ka lalag ne "Isaak" iyan igpasabut ka, "egpakangisi sikandin." bn. 18:2a: Hib 13:2.

ne tulan kew pa ubag kayi te kanami. <sup>4</sup>Egpaangey a te weyig eyew egpakapanlu-lu kew te me paa niyu, wey himeley kew pa kayi te egdalungan te kayu. <sup>5</sup>Eg-angey a man-e te egkeenen eyew egmanekal kew ka egpabulus te peggipanew niyu, su igkahale ku ka pegsendad kaniyu taheed te kayi kew te ugpaan te suluhuanen niyu."

Ne migtabak sikandan, "Ne uya, sikeykew e ka balahad."

<sup>6</sup>Te sikan de iya, migdagdahew si Abraham ne miglibed diye te balungbalung din wey migkahiyan din si Sara, "Apas ka kuwa te senge saku ne subla ne meupiya ne harina wey hilutu ka te paan." <sup>7</sup>Ne migdagdahew pad man-e si Abraham migleus diye te me ayam din wey mig-alam sikandin te nati ne baka ne malambu. Ne imparagdahawan din seeye ipalape wey ipeyilutu te suluhuanen din. <sup>8</sup>Nataman, migkuwa degma si Abraham te malamismis ne gatas wey iyam ne gatas. Ne insendad din e seeye diye te tatelu ne etew duma te ngalap ne impeyilutu din. Ne diye de migsesasindeg si Abraham te lenged dan taheed te egmangekeen sikandan diye te egkaralungan te kayu.

<sup>9</sup>Ne mig-insaan dan si Abraham, "Hendei ka asawa nu ne si Sara?"

Ne migtabak sikandin, "Duen ded te seled te balungbalung."

 $^{10 ext{bo}}$ Due sabeka kandan ne migkahi, "Eglibed a kayi te seup ne leg-un te iling kayi ne timpu, wey ka asawa nu ne si Sara duen e anak ne lukes."

Ne diye si Sara migpammineg te gumawan te balungbalung ne egkeinniyuhan ni Abraham. <sup>11</sup>Buyag e amana ka alunggun ne si Abraham wey si Sara, wey kenad egbulanen si Sara. <sup>12bp</sup>Sikan naa ka nakangisi si Sara ne migkahi diye te geyinawa rin, "Kuntee te buyag ad wey buyag e degma ka asawa ku, egkeupian e naan pad ne egpakiggulid kandin eyew egpakaanak key pad?"

 $^{13}$ Ne mig-insaan te Magbebaye ne Manama si Abraham, "Mania te nakangisi si Sara ne migkahi, 'Egpakaanak e naan pad minsan buyag ad?'  $^{14bq}$ Duen naa kene egkeyimu te Magbebaye ne Manama? Te peglibed ku kayi te seup ne leg-un te iling kayi ne timpu, ka asawa nu ne si Sara duen e anak ne lukes."

<sup>15</sup>Piru migpahunware si Sara tenged te naaldek sikandin ne migkahi, "Ti! Wara a nakangisi ne."

Piru migtabak ka Magbebaye ne Manama, "Ti! Nakangisi ka iya ne."

bo. 18:10: Rum 9:9.bp. 18:12: 1Pid 3:6.bq. 18:14: Luk 1:37.

## Ka pegpeyid-u-hid-u ni Abraham meyitenged te Suduma

<sup>16</sup>Nataman, miggipanew e ka tatelu ne etew. Ne impanulud sikandan ni Abraham diye te egpakapantew te inged ne Suduma eyew te pegpaligkat kandan. <sup>17</sup>Ne migkahi ka Magbebaye ne Manama diye te geyinawa rin, "Kene ku igkeeles ki Abraham ka eggimuwen ku. <sup>18</sup>Egnenasud te dakel ka me kabuhalan din wey egkeyimu ne mabantug. Ne egpanalanginan ku ka langun ne me nasud kayi te ampew te tane pinaahi kandin. <sup>19</sup>In-alam ku sikandin su eyew igpatuman din te me anak din wey te me kabuhalan din keureme ka me suhu ku ne eggimu sikandan te matareng wey eleg ne peggukum. Ne puun due, egkatuman ka langun ne insaad ku kandin."

 $^{20}$ Ne migkahiyan te Magbebaye ne Manama si Abraham, "Nasublaan e ka sumbung meyitenged te Suduma wey Gumura, wey dakel e amana ka sale dan.  $^{21}$ Sikan naa ka egtupang a eyew egleuyen ku ke malehet ka sumbung ne narineg ku."

<sup>22</sup>Ne mig-awe e mule ka daruwa ne etew ne miggendiyad te Suduma, piru ka Magbebaye ne Manama migpalunggehaat duma ki Abraham. <sup>23</sup>Migdanirani si Abraham te Magbebaye ne Manama wey mig-inse, "Egguleen nu naa te egpangimatey ka matareng duma te makasesale? <sup>24</sup>Ke due lalimma ne pulu (50) ne etew ne matareng diye te siyudad, egdereetan nu naa ka intiru ne siyudad? Kene nu naa igkeyid-u ka siyudad tenged kandan? <sup>25</sup>Kene nu iya egkeyimu ka peggule te matareng duma te makasesale. Kene egkaayun ne egpekeg-iling ka eggimuwen nu te me matareng wey te me makasesale. Su ka talaggukum te langun kayi te ampew te tane, keilangan ne eggimu ke nekey ka eleg."

 $^{26}$ Ne migkahi ka Magbebaye ne Manama, "Ke egpakakita a te lalimma ne pulu (50) ne etew ne matareng diye te Suduma, kene kud e egdereetan ka intiru ne siyudad tenged kandan."

<sup>27</sup>Ne migkahi e man-e si Abraham, "Magbebaye ne Manama, kene ke re keenendueni ne egpabulus a eg-inse keykew, minsan etew e re ne ware katenged te peg-inse keykew kayi. <sup>28</sup>Ke duen naan de hep-at ne pulu wey lalimma (45) ne etew ne matareng diye, egdereetan nu naan ded ka intiru ne siyudad minsan nasalinan de te lalimma ne etew ne matareng?"

Ne migtabak ka Magbebaye ne Manama, "Kene ku egdereetan ka siyudad ke egpakakita a te hep-at ne pulu wey lalimma (45) ne etew ne matareng."

<sup>29</sup>Ne mig-inse e man-e si Abraham, "Ke duen naan de hep-at ne pulu (40) ne etew ne matareng?"

Ne migtabak ka Magbebaye ne Manama, "Ke due hep-at ne pulu (40), kene ku egdereetan ka intiru ne siyudad tenged kandan."

<sup>30</sup>Ne migkahi e man-e si Abraham, "Magbebaye ne Manama, kene ke re egkabelu ne egpabulus a ne eg-inse. Ke duen naan de tatelu ne pulu (30) ne matareng?"

Ne migtabak sikandin, "Kene ku egdereetan ka intiru ne siyudad ke due egkakita ku ne tatelu ne pulu (30) ne etew ne matareng."

<sup>31</sup>Ne migkahi e man-e si Abraham, "Magbebaye ne Manama, kene ke re keenendueni ne egpabulus-bulus a eg-inse keykew. Ke duen naan de daruwa ne pulu (20) ne etew ne matareng ne egkakita nu?"

Ne migtabak ka Magbebaye ne Manama, "Kene ku red man-e egdereetan ka intiru ne siyudad tenged kandan te daruwa ne pulu (20)."

<sup>32</sup>Ne migkahi e man-e si Abraham, "Magbebaye ne Manama, kene ke re iya kabelu su duen pad katamanan ne inse ku keykew. Ke sapulu naan de ka egkakita nu ne etew ne matareng?"

Ne migtabak ka Magbebaye ne Manama, "Kene ku red iya man-e egdereetan ka intiru ne siyudad tenged kandan te sapulu." <sup>33</sup>Te nekeimpus e sikandan ka migpalalahey, mig-awe e ka Magbebaye ne Manama wey mig-uli e degma si Abraham.

# 19

# Makasesale amana ka me etew diye te Suduma

<sup>1</sup>Te miggingume e seeye se daruwa ne lukes ne panalihan te Manama diye te Suduma te sika ne karusileman, diye migpinpinnuu si Lut te gumawan te siyudad. Te pegkakita rin kandan, migsasindeg e sikandin ne migsinug-ung kandan wey miglangkeb diye te tangkaan dan <sup>2</sup>ne migkahi, "Me ahalen, eghangyu a kaniyu ne tulan kew pa ubag kayi te baley ku. Egpakapanlu-lu kew te paa niyu wey egpekeyirehe pad. Ne kaaselem, egpakaselem-selem kew te peggipanew niyu."

Piru migtabak sikandan, "Kene key, su diye key re eggirehe te plasa." <sup>3</sup>Piru mapahetpet ka pegginggat ni Lut kandan, sikan naa ka nabennalan ded sikandan wey miggendiyad e te baley rin. Migpeyilutu si Lut te meupiya ne iglabung ne due paan ne ware patulin. Ne nataman, miglabung e sikandan.

<sup>4</sup>Te ware pad miglipereng ka me mahaliyug ni Lut, due nanginguma ne masalig ne me kanakan wey me buyag ne matig-Suduma wey miglingkusan dan ka baley ni Lut. <sup>5br</sup>In-umew ran si Lut wey mig-insaan, "Hendei naan e ka me lukes ne migginguma kayi te baley nu? Ipalihawang nu sikandan kayi eyew eggilabetan ney sikandan."

<sup>6</sup>Ne miglihawangan ni Lut ka me etew, wey inlekeban din dagdahawi ka gumawan. <sup>7</sup>Ne migpeyid-u-hid-u sikandin te me etew ne miggenendue, "Me suled ku, kene niyu re ubag himuwa ka mareet ne nasuman-suman niyu! <sup>8</sup>Ke egkeupian kew, due daruwa ne anak ku ne mengebay. Igpalihawang ku sikandan kayi te kaniyu wey sikaniyud e ka balahad ke nekey ka eggimuwen niyu kandan. Piru kene niyu hilabeti seini se me lukes su mahaliyug ku sikandan wey keilangan ne egpangabangan ku sikandan."

<sup>9</sup>Piru migtabak sikandan, "Awe kad seini se lapu de! Kene ka ambag-ambag kanami su kema ke subla pad ne mareet ka eggimuwen ney keykew du te kandan." Nataman, intuku dan si Lut wey migdani-rani e sikandan eyew egguhusen dan e perem ka lekeb. <sup>10</sup>Piru miglulukat ka daruwa ne panalihan diye te seled wey ingganuy ran e si Lut wey inlekeban dan e ka gumawan. <sup>11bs</sup>Ne impamutud dan ka langun ne etew diye te lihawangan eyew kenad e egpakatulitu te gumawan.

# Ka peg-awe enni Lut te Suduma

<sup>12</sup>Ne mig-insaan te daruwa ne panalihan si Lut, "Due me karumaan nu, me anak wey ke mekaamung nu naa ne mig-ugpe kayi te seini ne siyudad? Ke due, dumaa nu sikandan wey pangawe kew e kayi, <sup>13</sup>su egdereetan ney ka seini ne inged. Narineg te Magbebaye ne Manama ka dakel ne sumbung meyitenged te me etew ne mig-ugpe kayi, wey impeuyan key nikandin eyew te pegdereet te seini ne siyudad."

<sup>14</sup>Te sikan de, miggendiyaan e ni Lut seeye se egpangasawa te me anak din wey migkahiyan din sikandan, "Apas kew awe kayi kuntee su egdereetan te Magbebaye ne Manama ka seini ne siyudad." Piru kahiyen dan ne kawalian de seeye ni Lut.

<sup>15</sup>Te egpamalat-palat e, indalusung te me panalihan si Lut ne migkahi, "Mahaan ka! Pangawe kew e kayi wey dumaa nu ka asawa nu wey ka daruwa

br. 19:5-8: Tal 19:22-24.

bs. 19:11: 2Har 6:18.

ne anak nu eyew kene kew egpakalagkes te pegdereet te seini ne siyudad." <sup>16bt</sup>Piru miglamu-lamu si Lut. Sikan naa ka impehes e ganuya te daruwa ne panalihan si Lut, ka asawa rin wey ka daruwa ne me anak din, wey migdumaan e sikandan te miglihawang diye te siyudad tenged su neyid-u ka Magbebaye ne Manama kandan. <sup>17</sup>Te nakalihawang e sikandan, migkahi ka sabeka ne panalihan, "Pallahuy kew e! Kene kew lilingey wey kene kew sanggel kayi te napu. Diye kew aput te me bubungan eyew kene kew egkapatey."

<sup>18</sup>Piru migtabak si Lut, "Kene de ubag ne diye, ahalen! <sup>19</sup>Neyid-u kew keddi wey migpangabangan a nikaniyu, piru kena a egpekeendiye te me bubungan su mariyu amana. Kema ke egkasapenan a te karereetan te kene e pad egpekeuma diye, ne egpatey ad. <sup>20</sup>Nakita nu sika se deisek ne lungsud sika te kewunaan? Marani re sika ne eg-aputan. Egkaayun ubag ne dutun e re eg-aput eyew egkaluwas e red?"

 $^{21}$ Ne migtabak ka panalihan, "Uya, nabennalan a te inhangyu nu keddi. Kene ku re iglagkes te egdereet ka seeye ne lungsud.  $^{22}$ Na, Pallahuy kew e! Su ware egkeyimu ku ke kene kew pad egpekeuma diye."

Purisu, ingngaranan te Suar<sup>bu</sup> ka seeye ne lungsud su migkahi ma si Lut te deisek de sika.

### Ka pegdereet te Suduma wey Gumura

<sup>23</sup>Migsile e ka aldew te nekeuma si Lut diye te Suar. <sup>24bv</sup>Ne impeuranan e te Magbebaye ne Manama te batu ne egkalegleg ne egngaranan te asupri ka Suduma wey Gumura, <sup>25</sup>wey indereetan te Magbebaye ne Manama ka langun ne diye te napu, wey inlagkes din ka me etew wey me pinamula te seeye ne inged. <sup>26bw</sup>Piru miglilingey mule ka asawa ni Lut ne migsinundul kandin, sikan naa ka migbaluy e sikandin ne sungkaleg ne asin.

<sup>27</sup>Te pegkapawe, migselem-selem si Abraham miggendiye te migsasindehan dan te Magbebaye ne Manama. <sup>28</sup>Impamantew rin ka Suduma wey Gumura wey ka intiru ne napu wey nakita rin ka ebel ne migtiptipuuk ne nekeempet te napu ne hendue te diye egpuun te dakel ne insugnuwan. <sup>29</sup>Te pegdereet te Manama te

- bt. 19:16: 2Pid 2:7.
- bu. 19:22 Te Hibruwanen: "deisek" ka kaluwasan te lalag ne "Suar."
- bv. 19:24-25: Mat 10:15; 11:23-24; Luk 10:12; 17:29; 2Pid 2:6; Hud 7.
- bw. 19:26: Luk 17:32.

me siyudad ne mig-ugpaan ni Lut, ware din lingawi ka inlalag din ki Abraham su impapallahuy rin mem pad si Lut.

### Ka migligkatan te me Muwabihanen wey me Amunihanen

<sup>30</sup>Piru naaldek si Lut ne eg-ugpe diye te Suar. Purisu, miggalin e sikandin duma te daruwa ne anak din diye te bubungan wey diye sikandan mig-ugpe te sulung. <sup>31</sup>Nataman, migkahiyan te kakey ka hari rin, "Egkabuyag e ka amey ta wey ware lukes te seini ne inged ne eg-asawa kanta iling te duma ne etew kayi te ampew te tane. <sup>32</sup>Na, egpewubuhan ta ka amey ta eyew egpekewulid ki kandin wey egpakaanak ki pinaahi kandin." <sup>33</sup>Te seeye ne karusileman, impewubuhan dan e ka amey ran wey miggulid e ka kakey. Piru ware nakanengneng si Lut su newubug amana sikandin.

<sup>34</sup>Te seup e ne aldew, migkahiyan te kakey ka hari rin, "Miggulid ad te amey ta gabii te marusilem. Kangkuwa naa te marusilem, egpewubuhan tad man-e sikandin wey sikeykew e degma ka eggulid eyew egpakaanak ki se daruwa pinaahi kandin." <sup>35</sup>Te seeye ne karusileman, impewubuhan dan e man-e ka amey ran wey miggulid e degma ka hari. Piru ware man-e nakanengneng si Lut su newubug amana sikandin. <sup>36</sup>Tenged due, naberes e sikandan se daruwa pinaahi te amey ran ne si Lut. <sup>37</sup>Nataman, nakaanak ka kakey te lukes ne migngaranan din ki Muwab. Sikandin ka migligkatan te tribu ne egngaranan e te Muwabihanen kuntee. <sup>38</sup>Ka hari, nakaanak degma te lukes ne migngaranan din ki Bin-ami. Sikandin degma ka migligkatan te tribu ne egngaranan e te Amunihanen kuntee.

# 20

# Si Abraham wey si Abimilik

<sup>1</sup>Ne mig-awe e ensi Abraham diye te Mamri wey miggalin e diye te inged te Nigib wey diye sikandan mig-ugpe te eletanan te Kadis wey Sur. Te katammanan, miggendiyad e sikandan te inged ne egngaranan te Girara. <sup>2bx</sup>Te diye dan e, ingkahiyan ni Abraham ka me mahinged te atebey rin si Sara. Sikan naa ka impaangey ni Abimilik ne Hari te Girara si Sara. <sup>3</sup>Te sabeka ne karusileman, migpakita ka Manama ki Abimilik pinaahi te taheinep ne migkahi, "Egkapatey ka su impaangey nu sika se malitan ne manggiasawe e."

bx. 20:2: Hin 12:13; 26:7.

<sup>4</sup>Piru ware pad newuliri ni Abimilik si Sara, sikan naa ka migkahi sikandin, "Magbebaye ne Manama, eggimatayan e naa nikeykew wey ka me etew ku minsan ware sale ney? <sup>5</sup>Migkahi ma nahud si Abraham ne si Sara, atebey rin wey si Sara degma migkahi ne si Abraham, maama rin. Sikan naa ka neyimu ku sika ne ware mareet ne tuyu, wey wara a nakasale."

<sup>6</sup>Ne migtabak ka Manama, "Malehet ne ware mareet ne tuyu nu te peggimu kayi. Purisu, ware ku tuhuti ne egkewuliran nu sikandin eyew kene ka egpakasale kayi te keddi. <sup>7</sup>Piru kuntee, iuli nud ka malitan diye te asawa rin su prupita sikandin ne egpangguhud te lalag ku, ig-ampu ka nikandin eyew kene ka egkapatey. Piru ke kene nu ig-uli ka malitan, egpanpanayan ku sikeykew ne egkapatey ka iya wey ka langun ne etew ne sakup nu."

<sup>8</sup>Ne migselem-selem migbangun-bangun si Abimilik wey impeumew rin e ka langun ne me suluhuanen din wey ingkahiyan din meyitenged te taheinep din wey nenaaldek amana sikandan. <sup>9</sup>Ne impeumew ni Abimilik si Abraham ne miginsaan, "Mania te innimu nu seini kayi te kanami? Nekey-a ka mareet ne neyimu ku due te keykew mania te in-uyanan a nikeykew te subla ne egpakarereet keddi wey te inged ku? Kene ne eleg ka innimu nu kayi te keddi. <sup>10</sup>Mania te innimu nu seini?"

<sup>11</sup>Ne migtabak si Abraham, "Innimu ku seini su kahiyen ku ne warad iya minsan sabeka kayi ne egkaaldek te Manama, wey nekeisip a ne kema ke eggimatayan a nikaniyu eyew egkaahew niyu ka asawa ku. <sup>12</sup>Malehet iya ne atebey ku sikandin, su sabeka re ka amey ney, piru lein ka iney rin wey lein degma ka iney ku, ne in-asawa ku sikandin. <sup>13</sup>Te impaawe ad te Manama diye te baley te amey ku, ingkahiyan ku si Sara, 'Minsan hendei ki egbaye, ikahi nu ne talaari ki. Te sika ne paahi, igpakapapitew nu ka geyinawa nu keddi.'"

<sup>14</sup>Ne in-uli e ni Abimilik si Sara diye ki Abraham wey impamehayan din pad man-e sikandin te me karniru, me baka, wey me uripen ne lukes wey malitan. <sup>15</sup>Ne ingkahiyan din e si Abraham, "Pitawa nu ka intiru ne tane ku wey egpekeugpe ka te minsan hendei ne igkeupii nu." <sup>16</sup>Ne migkahiyan din degma si Sara, "Egbehayan ku ka maama nu te sabeka ne libu (1,000) ne pelata ne mahal. Sika ka pamalehet te langun ne me duma nu ne ware ku sikeykew nalibuhi eyew egkanengnengan te langun ne ware ka nekeyimu te mareet."

17-18 Tenged te peg-angey ni Abimilik ki Sara ne asawa ni Abraham, imbuutan te Magbebaye ne Manama ne kenad eg-anak ka me malitan diye te baley ni Abimilik. Piru te in-ampuan e ni Abraham si Abimilik, imbawian e sikandin te Manama te dalu rin. Imbawian e degma te Manama ka asawa rin wey ka langun ne me uripen din ne malitan eyew eg-anak e man-e sikandan.

# 21

### Ka peglesut ni Isaak

<sup>1</sup>Ne impanalanginan te Magbebaye ne Manama si Sara sumale te insaad din. <sup>2by</sup>Ne nataman, naberes e sikandin wey nakaanak te lukes minsan buyag e si Abraham. Inlesut ka bate te timpu iya ne insaad te Manama. <sup>3</sup>Ne ingngaranan ni Abraham ka anak din ki Isaak. <sup>4bz</sup>Te nawaluwan e ka bate, intulian e ni Abraham sumale te insuhu te Manama kandin. <sup>5</sup>Mahatus (100) e ka idad ni Abraham te neetew si Isaak. <sup>6</sup>Ne migkahi si Sara, "Nahala a wey impangisi a te Manama. Egpakangisi degma ka langun ne egpakarineg meyitenged te neyitabu keddi. <sup>7</sup>Ware etew ne nakakahi ki Abraham ne egpakapasusu e pad. Piru, nakaanak e pad te lukes minsan buyag e ka asawa ku."

<sup>8</sup>Nataman, migtulin e ka bate. Te aldew ne eglutasen e ka bate, miggilutu te dakel si Abraham.

### Ka pegdeldel ki Hagar wey ki Ismail

<sup>9</sup>Sabeka ne aldew, miglimbayan ni Ismail ne anak ni Hagar ne matig-Ihiptu si Isaak ne anak ni Sara. <sup>10ca</sup>Te nakita seeye ni Sara, ingkahiyan din si Abraham, "Paawaa nu sika se malitan ne uripen duma te anak din. Kene egkaayun ne egpakakuwa te karatuan nu ka anak te sika ne uripen su si Isaak de." <sup>11</sup>Nalange amana si Abraham su anak din ma degma si Ismail. <sup>12cb</sup>Piru migkahiyan te Manama si Abraham, "Kene ka kalaggew meyitenged te bate wey te uripen nu ne si Hagar. Himuwa nu ka ingkahi ni Sara su egligkat ki Isaak ka seeye se kabuhalan ne insaad ku keykew. <sup>13</sup>Egbehayan ku degma te masalig ne me anak ka anak te uripen wey egnenasud e sikandan su anak nu ma degma sikandin."

<sup>14</sup>Te maselem-selem pad te seup ne aldew, imbehayan e ni Abraham si Hagar te egkeenen wey te weyig ne nakapenu te tahuanan ne laplap te mananap. Ne impatiang din e seini ki Hagar wey impeyipanew rin e duma te anak din. Ne

- by. 21:2: Hib 11:11.
- bz. 21:4: Hin 17:12; Him 7:8.
- ca. 21:10: Gal 4:29-30.
- cb. 21:12: Rum 9:7; Hib 11:18.

miggipanew e ensi Hagar wey migleug-leug e diye te mammara ne inged ne kene egkeugpaan ne egngaranan te Birsiba. <sup>15</sup>Te naaminan e sikandan te weyig, inengkeran din e ka bate diye te egdalungan te deisek ne kayu. <sup>16</sup>Miggendiyad e sikandin te kewun-an ne egkeumaan te egpane ka kariyu ligkat te bate. Ne diyad migpinnuu sikandin ne migsinehew wey migkahi diye te geyinawa rin, "Kena a egpakaaku ne egpipitew te anak ku ke egpatey."

<sup>17</sup>Ne narineg te Manama ka pegsinehew te bate, wey in-umew si Hagar te panalihan te Manama ne egpuun te langit, "Hagar, nekey-a ka igkalaggew nu? Kene ka kaaldek su narineg te Manama ka pegsinehew te bate. <sup>18</sup>Hendiyei nud ka anak nu wey kitkita nu sikandin, su eggimuwen ku ne dakel ne nasud ka me kabuhalan din." <sup>19</sup>Nataman, due impakita te Manama ki Hagar ne belun. Miggendiyaan din seeye wey migsakug e sikandin wey innipenu din e ka tahuanan te weyig ne laplap te mananap wey impeinum din e ka bate. <sup>20</sup>Intantanuran te Manama ka bate taman te migdakel e sikandin. Mig-ugpe sikandin diye te mammara ne inged ne egngaranan te Paran wey neyimu sikandin ne mannitingen. <sup>21</sup>Nataman, impaasawaan e sikandin te iney rin te matig-Ihiptu ne malitan.

### Ka kasabutan ni Abimilik wey ni Abraham

<sup>22cc</sup>Te seeye ne timpu, migparumeey si Abimilik te pangulu te me sundalu rin ne si Pikul peendiye ki Abraham. Ne migkahiyan ni Abimilik si Abraham, "Imbulihan ka te Manama te langun ne eggimuwen nu. <sup>23</sup>Purisu saad ka pinaahi te ngaran te Manama ne kena a nikeykew eglimbungan wey ka me anak ku peendiye te langun ne kabuhalan ku. Ipakita nu ka keupiya nu keddi wey kayi te inged ne in-ugpaan nu, iling te keupiya ne impakita ku keykew."

<sup>24</sup>Migkahi si Abraham, "Uya, igsaad ku."

<sup>25</sup>Ne insumbung ni Abraham diye ki Abimilik ka meyitenged te belun ne in-ahew te me suluhuanen din. <sup>26</sup>Migtabak si Abimilik, "Wara a nakanengneng ke hentew ka miggimu kayi. Wara a nahud nikeykew kahii wey kunteen ku pad iya narineg seini." <sup>27</sup>Ne migkuwa si Abraham te me karniru wey me baka wey imbehey rin seini ki Abimilik ne miggimu e sikandan te kasabutan. <sup>28</sup>Nataman, migkuwe e man-e si Abraham te pitu ne beyan ne nati te karniru puun te me ayam din wey impasuwey rin e seini. <sup>29</sup>Ne mig-inse si Abimilik kandin, "Mania te insuwey nu sika se pitu ne nati ne karniru?"

cc. 21:22: Hin 26:26.

 $^{30}$ Migtabak si Abraham, "Kua nu sika eyew egpakamemalehet ka ne sikeddiey ka migkekali te seini ne belun."  $^{31}$ Sikan naa ka ingngaranan te Birsiba<sup>cd</sup> ka seeye ne inged su diye ma sikandan migpasaarey.

 $^{32}$ Te napenge e ka innimu ran ne kasabutan diye te Birsiba, mig-uli e si Abimilik wey si Pikul diye te inged te me Pilistihanen.  $^{33}$ Ne migpamula si Abraham te kayu ne tamarisku diye te Birsiba, ne diye din e man-e simbaa ka Magbebaye, ka Manama ne Ware Egtamanan.  $^{34}$ Ne naluhey pad ne mig-ugpe si Abraham diye te inged te me Pilistihanen.

# 22

## Ka peg-eleg-eleg te Manama ki Abraham

<sup>1ce</sup>Te pile e ne leg-un ka miglihad, mig-el-elehan te Manama si Abraham. In-umew rin sikandin, "Abraham!" Ne migtabak si Abraham, "Seini e red."

<sup>2cf</sup>Ne migkahi ka Manama, "Uyana nu si Isaak, ka sabsabeka ne anak nu ne indakelan nu te geyinawa, wey hendiye kew te inged ne Muriya. Ne ipanubad nu naa sikandin kayi te keddi isip egtutungen ne igpanubad te diye kew e te bubungan ne igpanulu ku keykew."

<sup>3</sup>Te pegkapawe, migselem-selem migpangayu si Abraham eyew igtemeg te egtutungen ne igpanubad. Indulan din seeye te asnu rin wey induma rin si Isaak wey ka daruwa ne uripen din, wey nangendiyad sikandan te inged ne innangen te Manama kandin. <sup>4</sup>Te natateluwan e sikandan ka miggipanew, nakite e ni Abraham ka inged ne egkilem pad. <sup>5</sup>Ne migkahiyan din ka me uripen, "Kayi kew re wey ka asnu. Sikanami re ki Isaak ka eggendiye eyew egsimba. Egkataman, eglibed key red kayi."

<sup>6</sup>Impatiang ni Abraham si Isaak te kayu ne igtemeg te igpanubad ne egtutungen, wey sikandin degma ka mig-uyan te ilab wey pupud. Ne migparumeey e sikandan se daruwa ka miggipanew. <sup>7</sup>Ne migkahi si Isaak, "Ame!"

Ne migtabak si Abraham, "Nekey-a, Tatu?"

Ne mig-inse si Isaak, "Duen e pupud ta wey kayu ne igtemeg, piru hendeid naa ka igpanubad ne nati te karniru ne egtutungen?"

- cd. 21:31 Te Hibruwanen: "belun te saad" ka kaluwasan te lalag ne "Birsiba."
- ce. 22:1-13: Hib 11:17-19.
- cf. 22:2: 2Kru 3:1.

<sup>8</sup>Ne migtabak si Abraham, "Ka Manama ka egbehey due, Tatu." Ne migpabulus sikandan ka miggipanew.

<sup>9cg</sup>Te nekeume e sikandan diye te inged ne innangen te Manama kandin, miggimu e Abraham te altar ne eg-unturan te egtutungen wey diye din tapira te ampew ka me kayu ne igtemeg. Ne imbaku din e ka anak din wey impeyibat din e diye te ampew te me kayu. <sup>10</sup>Ne ingkuwa rin e ka ilab eyew eggimatayan din e perem si Isaak. <sup>11</sup>Piru sahuhune ne in-umew sikandin te panalihan te Magbebaye ne Manama ne egpuun te langit, "Abraham, Abraham!"

Ne migtabak sikandin, "Seini e red."

<sup>12</sup>Ne migkahi ka panalihan te Manama, "Kene nu dereeti ka bate wey kene nu menuwa sikandin. Nakanengneng e kuntee ka Manama ne egkaaldek ka iya kandin, su ware nu ma ikannuhun ka sabsabeka ne anak nu."

<sup>13</sup>Ne migtenggak si Abraham wey due nakita rin ne lukesan ne karniru ne nakasanggat ka sungey diye te kayu ne deisek wey kenad egpakaawe. Ingkuwa rin seini ne iyan din e intutung liwan te anak din. <sup>14</sup>Sikan naa, ingngaranan ni Abraham ka seeye ne inged, "Ka Magbebaye ne Manama ka Egbehey." Minsan kuntee, egkahi red ka me etew, "Diye te bubungan te Magbebaye ne Manama, due igbehey rin."

<sup>15</sup>Ne in-umew e man-e si Abraham te panalihan te Magbebaye ne Manama puun te langit, <sup>16ch</sup>ne migkahi, "Seini ka lalag te Magbebaye ne Manama, 'Tenged te migtuman ka keddi wey ware nu ikannuhun ka sabsabeka ne anak nu, egsaad a wey egpahunlibetan ku seini <sup>17ci</sup>ne egpanalanginan ku iya sikeykew. Egpamasalihen ku ka me kabuhalan nu ne egpekeiling kasalig te me bituen diye te langit wey lelanek diye te ilis te dahat. Egpakareeg ka me kabuhalan nu te me kuntere dan. <sup>18cj</sup>Igkarangeb, egpanalanginan te kabuhalan nu ka langun ne me nasud kayi te ampew te tane. Igbehey ku keykew seini se langun su intuman nu ka insuhu ku keykew.' " <sup>19</sup>Nataman, miglibed e ensi Abraham diye te me uripen din, ne migparumeey e sikandan ka mig-uli diye te Birsiba, wey diyad e sikandan mig-ugpe.

#### Ka me kabuhalan ni Nahur

cg. 22:9: San 2:21.

ch. 22:16-17: Hib 6:13-14.

ci. 22:17: Hib 11:12.

cj. 22:18: Him 3:25.

<sup>20</sup>Te ware naluhey, nahuhuran e si Abraham ne duen e me anak ni Milka, ka asawa te hari rin ne si Nahur. <sup>21</sup>Seini ka me anak dan ne lukes—si Us ka panganey, si Bus ka inggiba, wey si Kimuil ne amey ni Aram, ka ikatelu. <sup>22</sup>Ne duen pad man-e duma ne ensi Kasid, si Hasu, si Pildas, si Hidlap, wey si Bituil <sup>23</sup>ne amey ni Ribika. Sikandan se walu ka me anak enni Milka wey ni Nahur ne hari ni Abraham. <sup>24</sup>Due degma me anak ni Nahur te duwey rin ne egngaranan ki Riyuma. Sikandan ensi Tiba, si Gaham, si Tahas, wey si Maaka.

# 23

# Ka pegpatey wey pegsabal ki Sara

<sup>1</sup>Migginguma te 127 ne leg-un ka idad ni Sara, ne henduen pad sikandin migpatey. <sup>2</sup>Ne diye sikandin migpatey te lungsud te Kiriyat-arba (wey ke Hibrun) ne diye te inged te Kanaan. Miglungku wey migpandalawit si Abraham te pegpatey ni Sara.

<sup>3</sup>Ne mig-awe pad sikandin diye te impaley-asan te asawa rin wey miggendiye te mahinged ne me Hitihanen ne migkahi, <sup>4</sup>ck"Lapu e re ne mig-ugpe kayi te kaniyu. Purisu, belegyei a ubag nikaniyu te tane eyew eglebengan ku te asawa ku."

<sup>5</sup>Ne migtabak sikandan, <sup>6</sup>"Ahalen, pammineha key nikeykew. In-ila ney sikeykew ne mabantug ne pangulu kayi te kanami, purisu, diye nu ilebeng ka asawa nu te subla ne meupiya ne lebenganan ney kayi. Ware sabeka kanami ne eg-apul te pegbehey keykew te lebenganan eyew igpakalebeng nu ka asawa nu."

<sup>7</sup>Ne mig-unduk si Abraham diye te tangkaan te me Hitihanen te pegpasalamat kandan. <sup>8</sup>Ne migkahi sikandin, "Ke eg-uyun kew ne kayi ku igsabal ka asawa ku, hangyua niyu ubag si Iprun ka Hitihanen ne anak ni Suhar, <sup>9</sup>ne igbelegye din keddi ka sulung ne diye te ilis te kamet din diye te Makpila. Kahii niyu sikandin te egbayaran ku seeye te eleg ne kentiddad kayi te tangkaan niyu eyew egkakeddiey e sika se egkasabalan."

<sup>10</sup>Ne diye bes degma migpinnuu si Iprun te miglibulungan dan ne marani te gumawan te siyudad duma te me Hitihanen. Purisu, intabak din si Abraham wey nakarineg ka langun ne diye te gumawan te siyudad. <sup>11</sup>Kahi rin, "Ahalen, pammineha a nikeykew, kene nud bayari ka kamet su igbehey ku re seini keykew

ck. 23:4: Hib 11:9,13; Him 7:16.

wey iglagkes kud iya ka sulung ne diye te ilis kayi. Kayi te tangkaan te duma ku ne me Hitihanen, igbehey ku seini keykew eyew egkasabalan nu te asawa nu."

 $^{12}$ Piru miglangkeb e man-e si Abraham diye te tangkaan te me Hitihanen,  $^{13}$ wey ingkahiyan din si Iprun ne narineg te langun, "Pammineg ka, egbayaran ku iya ke pila ka kentidad te kamet. Dawata nu ka igbayad ku eyew igpakasabal kud ka asawa ku diye."

<sup>14</sup>Ne migtabak si Iprun, <sup>15</sup>"Ahalen, hep-at ne gatus (400) ne pelata ne mahal ka kentiddad te sika ne tane, piru nekegmenu naan de iya sika. Isabal nud e ka asawa nu." <sup>16</sup>Nabennalan e si Abraham te kentiddad ne ingkahi ni Iprun. Sikan naa ka migtitimbang e sikandin te hep-at ne gatus (400) ne pelata ne mahal, sumale te timbangan ne inggamit te me nigusyanti. Ne imbayad din seeye ki Iprun diye te tangkaan te me Hitihanen.

<sup>17</sup>Seeye naa, nakuwe e ni Abraham ka tane ni Iprun diye te Makpila ne diye dapit te igsile ligkat te Mamri. Lagkes e ka sulung wey ka langun ne me kayu ne diye te kamet. <sup>18</sup>Ne nanengnengan te langun ne me Hitihanen ne nasapen diye, ne si Abraham e ka kamuney dutu. <sup>19</sup>Ne insabal ni Abraham si Sara diye te sulung ne diye te kamet ne diye te Makpila. Ka Makpila sakup te Kanaan, wey marani seini te Mamri ne iyan ded ka Hibrun. <sup>20</sup>Sikan naa ka nakuwa ni Abraham ka kamet te me Hitihanen, lagkes ka sulung ne innimu rin e ne sabalanan.

# 24

## Ka peg-asawa ni Isaak

<sup>1</sup>Te seeye ne timpu, buyag e ne subla si Abraham wey impanalanginan sikandin te Magbebaye ne Manama te langun ne innimu rin. <sup>2-3</sup>Migkahiyan din ka igbuyag te me suluhuanen din ne impiyalan din te langun ne me karatuan din, "Ipataliware nu ka belad nu te daruwa ne bubun ku wey saad ka keddi pinaahi te ngaran te Magbebaye ne Manama, ka Manama te langit wey tane, ne kene ka egpammitew te mahinged kayi te Kanaan eyew igpaasawa te anak ku ne si Isaak. <sup>4</sup>Ke kene, hendiye ka te inged ne migligkatan ku wey diye nu pamitawi te igpaasawa ka anak ku te me karumaan ku."

<sup>5</sup>Piru mig-inse ka suluhuanen, "Ke kene egduma keddi kayi ka malitan, egpeendiyeen ku naa ka anak nu te inged ne migligkatan nu?"

<sup>6</sup>Ne migtabak si Abraham, "Kene nud en iya ipeendiye ka anak ku! <sup>7</sup>Su ka Magbebaye ne Manama ne diye te langit, ka mig-uyan keddi kayi ligkat te baley te amey ku wey ligkat te inged ne neetawan ku. Migsaad sikandin keddi ne igbehey rin seini se tane diye te me kabuhalan ku. Egsuhu sikandin te panalihan din ne eggun-a keykew su eyew diye ka egpakakuwa te malitan ne igpaasawa ki Isaak. <sup>8</sup>Piru ke egkeepes ka malitan ne egduma keykew, warad labet nu te impasaad ku keykew. Piru minsan nekey ka egkatamanan, kene nu ipeendiye ka anak ku." <sup>9</sup>Sikan naa ka impataliware te suluhuanen ka belad din diye te daruwa ne bubun ni Abraham ne ahalen din wey migsaad sikandin ne egtumanen din ka insuhu ni Abraham kandin.

<sup>10</sup>Ne migkuwa ka suluhuanen te sapulu ne kamilyu te ahalen din wey mig-uyan man-e sikandin te masalig ne mahal ne igdasag, ne miggendiyad e sikandin te siyudad ni Nahur ne diye te inged te Misuputamya. <sup>11</sup>Te nekeume e sikandin, impalangkeb din ka me kamilyu marani te belun diye te lihawangan te siyudad. Egkasagkup e seeye wey egmanakeru e ka me malitan. <sup>12</sup>Ne mig-ampu sikandin, "Magbebaye, Manama te ahalen ku ne si Abraham, bulihi a nikeykew te egpammitew te igpaasawa ki Isaak su eyew egkatuman ka insaad nu ki Abraham ne ahalen ku. <sup>13</sup>Seini a te lenged te belun wey eggendini ka me mengebay puun te siyudad eyew egpanakeru. <sup>14</sup>Ke egkahi a diye te sabeka ne mengebay, 'Isabuk nu pa ka banga nu wey peinume e pa nikeykew.' Ke egtabak perem sikandin, 'Ne, inum kad iya wey egpeinumen ku degma ka me kamilyu nu,' sikandin naa ka in-alam nu ne egkaasawa ni Isaak. Ke egkatuman seini, egkanengnengan ku ne intuman nu iya ka insaad nu diye te ahalen ku."

<sup>15</sup>Te ware pad nekeimpus sikandin ka mig-ampu, due miglepew ne egngaranan ki Ribika ne migtiang te banga. Anak sikandin ni Bituil ne anak enni Milka wey Nahur ne hari ni Abraham. <sup>16</sup>Mengebay pad sikandin wey mateles amana. Migtupang sikandin diye te belun wey innipenu din te weyig ka banga din. Ne migtakereg e sikandin. <sup>17</sup>Ne migpallahuy ka suluhuanen ne migsinug-ung kandin ne migkahi, "Peinuma a ubag te weyig nu."

<sup>18</sup>Ne migtabak sikandin, "Uya ahalen, inum ka." Indagdahew rin isabuk ka banga din wey impatalungtung din e ka suluhuanen. <sup>19</sup>Te nekeimpus e sikandin ka mig-inum, migkahi si Ribika, "Egsakug a degma te weyig para te me kamilyu nu wey igpeinum ku kandan taman te egkabulung dan." <sup>20</sup>Te sikan de, indagdahew rin e iitis ka weyig diye te egpein-inuman te me ayam. Ne miglibed-libed sikandin ka egsakug diye te belun taman te nekeinum e langun ka me kamilyu. <sup>21</sup>Mig-iipat ka suluhuanen kandin ke malehet ne sikandin ka in-alam te Magbebaye ne Manama ne eyew egkaasawa ni Isaak.

<sup>22</sup>Te nekeinum e ka me kamilyu, migkuwa ka suluhuanen te sabeka ne mahal ne sising ne bulawan wey imbitin din diye te irung ni Ribika. Migkuwa pad man-e sikandin te daruwa ne dakel ne beday ne bulawan wey insaluub din te me belad ni Ribika. <sup>23</sup>Ne mig-insaan din si Ribika, "Hentew-a ka amey nu? Duen ded egkeyirehaan diye te baley niyu?"

<sup>24</sup>Ne migtabak sikandin, "Si Bituil ka amey ku, ne anak enni Nahur wey ni Milka. <sup>25</sup>Due eggirehaan niyu diye te baley ney wey due degma dakel ne lahami wey kumpay ne igsunggud te kamilyu niyu."

<sup>26</sup>Ne mig-usengul diye te tane ka suluhuanen wey insimba rin ka Magbebaye ne Manama, <sup>27</sup>ne miggenendue, "Egsayeen ka Magbebaye ne Manama, ka Manama te ahalen ku ne si Abraham, ne malehet iya ne neyid-u wey meupiya kandin. Impanulu a nikandin kayi te anaken wey apu te ahalen ku."

<sup>28</sup>Ne mig-uli e ne migpallahuy ka mengebay wey migpangguhuran din e ka iney rin wey ka langun ne diye te baley. <sup>29</sup>Due maama ni Ribika ne egngaranan ki Laban. Migpallahuy sikandin peendiye te suluhuanen ni Abraham ne diye te lenged te belun. <sup>30</sup>Su nakita rin ka sising wey ka beday diye te me belad ni Ribika, wey narineg din ka pangguhuren ni Ribika meyitenged te innangen te etew kandin. Sikan naa ka miggendiye sikandin te suluhuanen ni Abraham ne migsasindeg diye lenged te me kamilyu rin ne marani te belun. <sup>31</sup>Migkahi si Laban, "Ew, sikeykew bes ka impanalanginan te Magbebaye ne Manama. Mania te kayi ke re egsesasindeg? Leus kad diye te baley, su intahahaan kud sikeykew te sinabeng diye te kanami, wey due egkatahuan te me kamilyu nu."

<sup>32</sup>Sikan naa ka migleus e ka suluhuanen diye te baley. Pegkeuma ran, insabuk e ni Laban ka dulan te me kamilyu wey insungguran din e seini te lahami wey kumpay. In-uyanan din degma te weyig ka suluhuanen ni Abraham wey ka me duma rin eyew egpakapanlu-lu sikandan te me paa ran. <sup>33</sup>Te migsendaran e ka suluhuanen te egkeenen, migkahi sikandin, "Kene e pad egkeen ke kene ku pad igpakapangguhud ka hipanawen ku."

Ne migkahi si Laban, "Na, ipangguhud nud e."

<sup>34</sup>Migkahi sikandin, "Suluhuanen a ni Abraham. <sup>35</sup>Impanalanginan amana te Magbebaye ne Manama ka ahalen ku wey neyimu rin ne mabantug. Impamehayan din te masalig ne karniru, me kambing, me baka, me seleppi, me bulawan, me uripen ne lukes wey malitan, me kamilyu wey me asnu. <sup>36</sup>Te buyag e si Sara ne asawa te ahalen ku, nakaanak sikandin te lukes. Ne imbehayan sikandin te ahalen ku te langun ne karatuan din. <sup>37</sup>Ne impasaad a te ahalen ku ne

egtumanen ku ka insuhu din ne kene ku egpaasawaan ka anak din te mengebay diye te Kanaan, ka inged ne mig-ugpaan ney kuntee. <sup>38</sup>Piru impeengkayi a mule nikandin te ugpaan te amey rin, wey kayi a te me karumaan din pepamitawa te igpaasawa te anak din. <sup>39</sup>Ne mig-insaan ku ka ahalen ku ke nekey-a ka eggimuwen ku ke kene egduma keddi ka malitan? <sup>40</sup>Migtabak sikandin, 'Ka Magbebaye ne Manama ne intuman ku layun ka egsuhu te panalihan din ne egduma keykew su eyew egkatuman ka hipanew nu. Sikan naa ka egpakakita ka te igpaasawa te anak ku diye te karumaan ku, wey diye te kabuhalan te amey ku. <sup>41</sup>Wey ke re egpakaawe te impasaad ku keykew ke eggendiye ka te me karumaan ku. Ne minsan eg-apul sikandan ne egdumeen nu ka malitan, egpakaawe ke red iya mane te impasaad ku keykew.'

<sup>42</sup>"Na, te nekeuma ad e diye te belun ganna, mig-ampu a, 'Magbebaye ne Manama, ka Manama te ahalen ku ne si Abraham, bulihi a ubag nikeykew ne egkatuman ka hipanawan ku. <sup>43</sup>Kayi e re egsesasindeg te marani te belun kuntee. Meyi due egpanakeru ne mengebay kayi, egbuyuan ku sikandin te weyig puun te banga din. 44Ke egpeinumen a nikandin lagkes ka me kamilyu ku, ne sikandin naan e ka in-alam nu ne igpaasawa te anak te ahalen ku.' <sup>45</sup>Na, te ware e pad nekeimpus te inggeyinawa ku re ne peg-ampu, miggingume e si Ribika ne migtiang te banga. Migtupang sikandin diye te belun eyew egsakug. Ingkahiyan ku sikandin, 'Peinuma a ubag nikeykew.' <sup>46</sup>Indagdahew rin isabuk ka sakeru ne intiang din ne migkahi sikandin, 'Uya, inum kad e wey egpeinumen ku degma ka me kamilyu nu.' Sikan naa, mig-inum a wey impeinum din e ka me kamilyu. <sup>47</sup>Ne mig-insaan ku sikandin, 'Hentew-a ka amey nu?' Migtabak sikandin, 'Si Bituil ka amey ku ne anak enni Nahur wey ni Milka.' Te sikan de, imbitinan kud te sising ka irung din wey insaluuban kud te beday ka me belad din. <sup>48</sup>Ne mig-usengul a diye te tane wey insimba ku ka Magbebaye ne Manama. Insaye ku ka Magbebaye, ka Manama te ahalen ku ne si Abraham, ka Manama ne migpanulu keddi ke hendei ku nakita ka mengebay ne anak te karumaan te ahalen ku ne egkaasawa te anak din. <sup>49</sup>Kuntee, nangeni a nikaniyu ke malehet ka keupiya niyu te ahalen ku. Ke kene, nangeni a nikaniyu eyew egpakasuman-suman a ke nekey ka eggimuwen ku."

 $^{50}$ Ne migtabak ensi Laban wey si Bituil, "Tenged su ligkat ma seini te Magbebaye ne Manama, warad igpakalalag ney.  $^{51}$ Seini red si Ribika. Dumaa nud sikandin te peg-uli niyu. Ipaasawa nud sikandin te anak te ahalen nu, sumale te ingkahi te Magbebaye ne Manama."  $^{52}$ Te pegkarineg dutu te suluhuanen ni

Abraham, mig-usengul rin e diye te tane wey insimba rin ka Magbebaye ne Manama. <sup>53</sup>Ne impamukeun din e ka inuyanan din ne me balieg ne bulawan, me sising, me eritis, wey mateles ne me manggad ne imbehey rin e seini ki Ribika. Ne impamehayan din e degma te mahal ne me dasag ka maama rin wey ka iney rin.

<sup>54</sup>Nataman, miglabung e ka suluhuanen ni Abraham wey ka me duma rin wey diyad e sikandan miggirehe. Te peg-enew ran e te maselem, migkahi e ka suluhuanen ni Abraham, "Eg-uli ad e diye te ahalen ku."

<sup>55</sup>Piru migkahi ka iney wey maama ni Ribika, "Peugpaa nu pa si Ribika kayi minsan sapulu de ne aldew, egkataman, kaayun e ne egpekeyipanew kew."

<sup>56</sup>Piru migkahi ka suluhuanen ni Abraham, "Kena ad e hawiri nikaniyu su impanalanginan te Magbebaye ne Manama ka hipanawan ku. Peulia ad nikaniyu diye te ahalen ku."

 $^{57}$ Migtabak sikandan, "Eg-umawen te pad ka mengebay wey eg-insaan ta sikandin."  $^{58}$ Sikan naa, in-umew ran e si Ribika wey mig-insaan dan, "Egkeupian ke naa ne egdume e te seini ne etew?"

Migtabak sikandin, "Uya."

 $^{59}$ Sikan naa, imparuma ran e si Ribika wey ka talagtanggu kandin te suluhuanen ni Abraham wey te me duma rin.  $^{60}$ Ne impanalanginan dan si Ribika te migkahi,

"Peyi,

egkeyimu ka ne iney

te subla ne masalig ne kabuhalan.

Egkatalu te me kabuhalan nu

ka me kuntere dan."

<sup>61</sup>Te naandam e ka langun, mig-untud e si Ribika wey ka me suluhuanen din ne malitan te me kamilyu. Ne migluyud e sikandan te suluhuanen ni Abraham.

<sup>62</sup>Ne si Isaak degma, diye sikandin mig-ugpe te Nigib wey sikan pad iya migginguma puun te Biirlahayruy. <sup>63</sup>Te sabeka ne aldew te egkasagkup e, migleug-leug sikandin diye te kamet wey due nakita rin ne me kamilyu ne diye

egpabulus te kandin.  $^{64}$ Te nakita ni Ribika si Isaak, miglegsad e sikandin te kamilyu  $^{65}$ ne mig-inse te suluhuanen ni Abraham, "Hentew-a ka seeye te kamet ne egsinug-ung kanta?"

Migtabak ka suluhuanen, "Sikandin ka ahalen ku." Te sikan de, ingkuwe e ni Ribika ka simbung din wey imbunbunan din e ka ulaula rin.

<sup>66</sup>Ne migpangguhuran te suluhuanen si Isaak meyitenged te langun ne innimu rin. <sup>67</sup>Nataman, in-uyan e ni Isaak si Ribika diye te balungbalung ne inugpaan te iney rin dengan, wey in-asawa rin e sikandin. Ne indakelan din te geyinawa si Ribika. Ne dutu, warad sikandin miglungku tenged te pegpatey te iney rin.

# 25

#### Ka duma ne me kabuhalan ni Abraham

(1 Kru. 1:32-33)

<sup>1</sup>Ne mig-asawe e man-e si Abraham te senge malitanan ne migngaranan ki Kitura. <sup>2</sup>Nakaanak sikandin ki Simran, si Huksan, si Midan, si Midiyan, si Isbak, wey si Sua. <sup>3</sup>Si Huksan ka amey ni Siba wey ni Didan, wey si Didan ka migligkatan te me tribu ne egngaranan te Asurimanen, Litusimanen, wey Liyumimanen. <sup>4</sup>Due degma me anak ni Midiyan ne egngaranan ki Ipa, si Ipir, si Hanuk, si Abida, wey si Ildaa. Sikandan langun ka me kabuhalan ni Kitura ne asawa ni Abraham.

<sup>5</sup>Ne imbehey ni Abraham diye ki Isaak ka langun ne karatuan din <sup>6</sup>te ware pad sikandin migpatey. Piru impamehayan din degma te dasag ka me anak te me duwey rin, wey impeendiye din e sikandan te igsile eyew egpakariyu-diyu te anak din ne si Isaak.

# Ka pegpatey wey ka pegsabal ki Abraham

<sup>7</sup>Migginguma te 175 ne leg-un ka idad ni Abraham, wey te seeyad e ka kabuyahi rin <sup>8</sup>migpatey e sikandin ne meupiya se peg-ugpe, wey miglemung e ka gimukud din te gimukud te me apu din ne migpatey e. <sup>9</sup>Insabal e sikandin enni Isaak wey ni Ismail diye te sulung te Makpila ne diye te igsile ligkat te Mamri.

Seeye ka sulung ne diye te kamet ni Iprun ne anak ni Suhar ne Hitihanen  $^{10\text{cl}}$ ne imbeli ni Abraham diye te me Hitihanen. Ne diye degma isabal si Sara dengan.  $^{11}$ Te namatey e si Abraham, impanalanginan te Manama si Isaak ne anak din ne diye mig-ugpe te marani te belun ne Biirlahayruy.

### Ka me kabuhalan ni Ismail

(1 Kru. 1:28-31)

<sup>12</sup>Ne seini ka me kabuhalan ni Ismail, ka anak ni Abraham ki Hagar ne matig-Ihiptu ne uripen ni Sara. <sup>13</sup>Seini ka ngaran te me anak ni Ismail ligkat te panganey peendiye te igkalitan—si Nibayut, si Kidar, si Adbiil, si Mibsam, <sup>14</sup>si Misma, si Duma, si Masa, <sup>15</sup>si Hadad, si Tima, si Hitur, si Napis, wey si Kidima. <sup>16</sup>Sikandan se langun ka me lukes ne anak ni Ismail. Neyimu sikandan ne me pangulu te sapulu wey daruwa (12) ne tribu ne nangugpe diye te nalein-lein ne me inged dan. Te ware naluhey, migngaranan ka me tribu ran sumale te ngaran te me pangulu ran. <sup>17</sup>(Ne migpatey si Ismail te 137 ka idad din, wey ka gimukud din, miglemung e degma te gimukud te me apu din ne migpatey e.) <sup>18</sup>Nangugpe ka me kabuhalan din ligkat te inged te Habila peendiye te Sur, ne diye te igsile te Ihiptu ne egpeendiye te Asiriya. Ne ingkuntere dan ka langun ne me karumaan dan ne kabuhalan ni Isaak.

## Ka pegkeetew ni Isaw wey ni Hakub

<sup>19</sup>Seini ka pangguhuren meyitenged te me anak ni Isaak, ne anak ni Abraham. <sup>20</sup>Hep-at ne pulu (40) ka idad ni Isaak te nakaasawa sikandin ki Ribika, ne anak ni Bituil wey atebey ni Laban. Matig-Aramiya ensi Bituil wey Laban wey diye sikandan mig-ugpe te Padan-aram. <sup>21</sup>Tenged te kene egpakaanak si Ribika, mig-ampu si Isaak te Magbebaye ne Manama eyew egpakaanak sikandin. Ne intabak te Manama ka peg-ampu din, sikan naa ka naberes e si Ribika. <sup>22</sup>Migseseppingan sikandin piru te ware pad miglesut ka me bate, migpakeyisey ran e diye te getek din. Migkahi si Ribika, "Mania te egkeyitabu seini kayi te keddi?" Sikan naa ka mig-insaan din ka Magbebaye ne Manama meyitenged dutu.

#### cl. 25:10: Hin 23:3-16.

<sup>23cm</sup>Ne migkahiyan sikandin te Magbebaye ne Manama,

"Daruwa ne nasud

ka due te getek nu.

Eg-anak ka te daruwa

ne egpekegkuntere.

Egkeyimu ne manekal ka sabeka

te duma rin.

wey egkeyimu ne suluhuanen ka kakey

te hari rin."

 $^{24}$ Te natuman e ka aldew ne eglesutan e si Ribika, migsesepingan iya sikandin.  $^{25}$ Ka an-anayan ne miglesut malalab wey bulbulen, sikan naa ka ingngaranan sikandin ki Isaw.  $^{cn}$   $^{26}$ Te ware pad miglesut ka sepping, miggen-genan din ka palu ni Isaw, sikan naa ka migngaranan sikandin ki Hakub.  $^{co}$  Ne hen-em ne pulu (60) ka idad ni Isaak te miglesut sikandan.

## Ka pegbelegye ni Isaw te katenged din isip panganey

<sup>27</sup>Te migtulin e ka me bate, neyimu ne meinges ne mannitingen si Isaw. Egkeupian sikandin ne egleug-leug diye te me kamet, piru si Hakub, maleman wey diye de eg-uugpe te baley. <sup>28</sup>Pinalangge ni Isaak si Isaw su egkeupian sikandin ne egkeen te keingesan din, piru pinalangge degma si Hakub ni Ribika.

cm. 25:23: Rum 9:12.

cn. 25:25 Te Hibruwanen: "bulbulen" ka kaluwasan te lalag ne "Isaw."

co. 25:26 Te Hibruwanen: "inggen-genan din ka palu" ka kaluwasan te lalag dan ne "Hakub."

<sup>29</sup>Sabeka ne aldew, mig-uli si Isaw ka migpanitingen ne amane e eggutasi, wey nakasalengan sikandin te migsusuba si Hakub te malalab ne bengag ne insabawan. <sup>30</sup>Migkahiyan din si Hakub, "Pakeena a nikeykew te sika se malalab ne insabawan nu su amana ad eggutasan." (Purisu in-immuan si Isaw ki Idum.<sup>cp</sup>)

<sup>31</sup>Piru migtabak si Hakub, "Wey ku re egpakeena sikeykew ke igbehey nu keddi ka katenged nu isip panganey."

<sup>32</sup>Ne migkahi si Isaw, "Uya, igbehey ku! Nekey-a ka karuan te katenged ku isip panganey ke egkapatey a te gutas kuntee?"

 $^{33\text{cq}}$ Migtabak si Hakub, "Pahunlibet ke pa ne igbehey nu keddi ka katenged nu."

Sikan naa ka nakapahunlibet si Isaw ne igbehey rin e diye ki Hakub ka katenged din isip panganey. <sup>34</sup>Ne imbehayan e sikandin ni Hakub te paan wey te insabawan din ne bengag. Te nakakeen e wey nekeinum e si Isaw, miggipanew e sikandin. Iling due ka pegbalahad ni Isaw te katenged din isip panganey.

# 26

### Ka peggalin ni Isaak diye te Girara

<sup>1</sup>Te seeye ne timpu, due bitil te seeye ne inged, iling te neyitabu te timpu pad ni Abraham. Sikan naa ka miggendiye si Isaak te Girara ne mig-ugpaan ni Abimilik ne Hari te me Pilistihanen. <sup>2</sup>Ne migpakita ka Magbebaye ne Manama ki Isaak ne migkahi, "Kene ka eggendiye te Ihiptu. Palunggehaat ka te inged ne egpeugpaan ku keykew. <sup>3cr</sup>Kayi ke pa ugpe su egdumaan ku sikeykew wey egpanalanginan. Igbehey ku keykew wey diye te me kabuhalan nu ka seini ne tane ne insaad ku diye te amey nu ne si Abraham. <sup>4</sup>Egpamasalihen ku ka me kabuhalan nu ne iling kasalig te me bituen diye te langit, wey igbehey ku kandan ka seini se intiru ne inged. Pinaahi te kabuhalan nu, egpanalanginan ku ka langun ne me nasud kayi te ampew te tane. <sup>5</sup>Su migtuman si Abraham te me balaud ku wey te langun ne insuhu ku kandin."

- cp. 25:30 Te Hibruwanen: "malalab" ka kaluwasan te lalag ne "Idum."
- cq. 25:33: Hib 12:16.
- cr. 26:3-4: Hin 22:16-18.

<sup>6</sup>Purisu, diye mig-ugpe si Isaak te Girara. <sup>7cs</sup>Te mig-insaan sikandin te me lukes ne mahinged te seeye ne inged meyitenged te asawa rin, ware sikandin migpangguhud te malehet su naaldek sikandin. Migkahi sikandin te atebey rin si Ribika su nekeisip sikandin ne kema ke eggimatayan din eyew eg-ahawen ka asawa rin, su mateles sikandin ne malitan. <sup>8</sup>Ne mig-ugpe si Isaak diye te bayew e naluhey ne timpu. Due sabeka ne aldew ne migpamintana si Abimilik ne Hari te me Pilistihanen, wey nakita rin ne migpaleglehengey si Isaak wey si Ribika. <sup>9</sup>Purisu, impeumew rin si Isaak wey migkahiyan, "Asawa nu bes sikandin! Mania te migkahi ka ne atebey nu sikandin?"

Ne migtabak si Isaak, "Uya su naaldek a ne eggimatayan a nikaniyu eyew egahawen niyu sikandin."

<sup>10</sup>Migkahi si Abimilik, "Mania te neyimu nu seini kayi te kanami? Etuwey ke migguliran sikandin te sakup ku, nakasale key e perem ligkat ded keykew."
<sup>11</sup>Nataman, impanpanayan ni Abimilik ka langun ne etew ne migkahi, "Minsan hentew ne egdereet te seini ne lukes wey te asawa rin, eggimatayan sikandin."

<sup>12</sup>Ne migpamula si Isaak te seeye ne inged wey mahatus (100) ne lupi ka nahaani rin te seeye ne leg-un, su impanalanginan sikandin te Magbebaye ne Manama. <sup>13</sup>Naratu sikandin wey natimtimulan pad ka karatuan din taman te suble e sikandin ne meyaman. <sup>14</sup>Migmasalig e ka me karniru rin, me kambing, me baka, wey me uripen din. Tenged due, nasekel ka me Pilistihanen ki Isaak, <sup>15</sup>wey imbunbunan dan te tane ka me belun ne ingkali re dengan te me uripen te amey rin ne si Abraham.

<sup>16</sup>Ne ingkahiyan ni Abimilik si Isaak, "Awe kew e kayi su madmaresen kew e kanami." <sup>17</sup>Sikan naa ka mig-awe e si Isaak diye wey diyad e mig-ugpe te Napu te Girara. <sup>18</sup>Due degma me belun diye ne impakaliyan te amey rin dengan ne imbunbunan e te me Pilistihanen. Ne impakaliyan din ded man-e seeye wey impeiling din ded ka me ngaran te me belun te ingngaran dengan te amey rin.

 $^{19}$ Te nangekali e ka me suluhuanen ni Isaak diye te napu, nakakita sikandan te sebseb.  $^{20}$ Piru in-ehetan sikandan te me talagtameng ne me matig-Girara wey migkahiyan te kandan kun ka seeye ne weyig. Purisu, migngaranan ni Isaak ka belun te Isik $^{\rm ct}$  su in-ehetan sikandin te me matig-Girara.

<sup>21</sup>Ne migkekali e man-e ka me suluhuanen ni Isaak te lein ne belun. Piru migpaap-apuley red man-e sikandan meyitenged te belun. Purisu, migngaranan

- cs. 26:7: Hin 12:13; 20:2.
- ct. 26:20 Te Hibruwanen: "pegpaap-apuley" ka kaluwasan te lalag ne "Isik."

ni Isaak ka belun te Sitna.<sup>cu 22</sup>Ne miggalin e man-e ensi Isaak wey migpakekali e man-e sikandan te lein ne belun. Nataman, warad sikandan eheti te me mahinged meyitenged te seeye ne belun. Purisu, migngaranan ni Isaak ka belun te Rihubut<sup>cv</sup> su migkahi sikandin, "Kuntee, imbehayan kid e te kaligwangan te Magbebaye ne Manama ne eg-ugpe kayi te seini ne inged, wey meupiye e ka peg-ugpe ta kayi."

<sup>23</sup>Ne miggalin e man-e ensi Isaak diye te Birsiba. <sup>24</sup>Te pegginguma rin diye te seeye ne karusileman, migpakita ka Magbebaye ne Manama kandin ne migkahi,

"Sikeddi ka Manama te amey nu ne si Abraham.

Kene ka kaaldek su egdumaan ku sikeykew.

Egpanalanginan ku sikeykew wey egpamasuluhen ku ka

me kabuhalan nu

tenged te suluhuanen ku ne si Abraham."

<sup>25</sup>Nataman, miggimu si Isaak te altar ne eg-unturan te egtutungen wey diye din e man-e sayaa ka Magbebaye ne Manama. Ne migpasasindeg sikandin te balungbalung diye wey impakekali rin e man-e ka me suluhuanen din te belun.

#### Ka kasabutan enni Isaak ki Abimilik

<sup>26cw</sup>Sabeka ne aldew, miggendiye ki Isaak si Hari Abimilik puun te Girara ne migparumeey ki Ahusa ne talagtambag kandin wey si Pikul ne pangulu te me sundalu rin. <sup>27</sup>Ne mig-inse si Isaak diye te kandan, "Mania te miggendini kew keddi kuntee te egdumut kew ma keddiey wey indeldel e pad man-e nikaniyu?"

<sup>28</sup>Migtabak sikandan, "Napamalehetan ney e kuntee ne egdumaan ka te Magbebaye ne Manama. Sikan naa ka nakasuman-suman key ne eggimu te kasabutan kayi te keykew. Egkeupian key ne egsaad ka <sup>29</sup>ne kene key nikeykew

- cu. 26:21 Te Hibruwanen: "pegkasilag" ka kaluwasan te lalag ne "Sitna."
- cv. 26:22 Te Hibruwanen: "kaligwangan" ka kaluwasan te lalag ne "Rihubut."
- cw. 26:26: Hin 21:22.

egdereetan, su ware ney ma degma sikeykew dereeti. Layun ne meupiya ka innimu ney keykew wey meupiya ka peg-awe nu. Ne kuntee, impanalanginan kad te Magbebaye ne Manama!" <sup>30</sup>Seeye naa ka miggilutuan sikandan ni Isaak te dakel, ne nangekeen e wey nangiinum e sikandan. <sup>31</sup>Te seup ne aldew, te maselem-selem pad, migpeyimuwey e sikandan te kasabutan. Nataman, impaligkat e sikandan ni Isaak ne meupiye e se me geyinawa.

 $^{32}$ Te sikan de iya ne aldew, migginguma ka me suluhuanen ni Isaak eyew egkahi kandin te due weyig te belun ne ingkaliyan dan.  $^{33}$ Ne migngaranan ni Isaak ka belun te Siba. $^{cx}$  Purisu, ingngaranan ded te Birsiba ka seeye ne inged taman kuntee.

# Ka peg-asawa ni Isaw te daruwa ne Hitihanen

<sup>34</sup>Te hep-at e ne pulu (40) ka idad ni Isaw, nakaasawa sikandin te daruwa ne Hitihanen, si Hudita ne anak ni Biiri wey si Basimat ne anak ni Ilun. <sup>35</sup>Piru meyirap ka peg-ugpe enni Isaak wey ni Ribika tenged te me asawa ni Isaw.

# 27

### Ka pegpanalangin ni Isaak ki Hakub

<sup>1</sup>Ne nabuyag e si Isaak wey kenad e egpakakita sikandin. Sabeka ne aldew, impeumew rin ka panganey ne anak din ne si Isaw wey migkahiyan din, "Tatu!" Ne migtabak si Isaw, "Nekey, Ame?"

<sup>2</sup>Ne migkahi si Isaak, "Kuntee, buyag ad e wey te kene egkaluhey, egpatey ad. <sup>3</sup>Kua nu ka panganiban nu, ka piet wey me busug. Hendiye ka te mabbenes wey panitingini e pa. <sup>4</sup>Pegkapenga ne hilutui ad te mananam ne sere ne igkatelesi ku te egkeen, wey uyana nu kayi su egkeen a. Egkataman, egpanalanginan ku sikeykew te kene e pad egkapatey."

<sup>5</sup>Piru migpammineg bes si Ribika te peglalag ni Isaak ki Isaw. Sikan naa, te nekeyipanew e si Isaw ka egpanitingen, <sup>6</sup>migkahiyan ni Ribika ka anak din ne si Hakub, "Nakarineg a te amey nu ne migkahiyan din ka kakey nu ne si Isaw <sup>7</sup>te egpepanitingen wey egpeyilutuan sikandin te mananam ne sere su egkeenen din. Egkataman, egpanalanginan din e si Isaw diye te tangkaan te Magbebaye ne

cx. 26:33 Te Hibruwanen: "saad" ka kaluwasan te lalag ne "Siba."

Manama te kene pad sikandin egpatey. <sup>8</sup>Purisu, Tatu, tumana nu ka igsuhu ku keykew. <sup>9</sup>Hendiye ka te me kambing wey angey ka te daruwa ne mallambeg ne nati su eggilutuan ku ka amey nu te mananam ne keenen ne igkatelesi rin te egkeen. <sup>10</sup>Egkataman, uyana nu seini diye te amey nu. Ke egkakeen din e seini, egkapanalanginan kad nikandin te kene din pad egpatey."

 $^{11}$ Piru migtabak si Hakub te iney rin, "Bulbulen si Isaw piru malurung a mule.  $^{12}$ Kema ke egsamsamen a ni Ame ne egkanengnengan din ne eg-akalan ku sikandin, wey egdilusen ad nasi nikandin."

<sup>13</sup>Ne migkahi ka iney rin, "Tatu, sikeddi ka egparilus ke egdilusen ka nikandin, tumana nu re iya ka inlalag ku. Na, hipanew kad wey angey kad te kambing." <sup>14</sup>Sikan naa ka mig-angey e si Hakub te daruwa ne kambing wey miggilutu e ka iney rin te mananam ne pegkeen ne igkatelesi te amey rin te egkeen. <sup>15</sup>Ne ingkuwa ni Ribika ka subla ne mateles ne kumbale ni Isaw ne intines diye te baley wey impasaluub din e ki Hakub. <sup>16</sup>Imbukusan din te laplap te kambing ka me belad ni Hakub wey ka lieg din ne malurung. <sup>17</sup>Ne imbehey rin e ki Hakub ka mananam ne pegkeen wey paan ne inggilutu din.

<sup>18</sup>Seeye naa, miggendiyad e si Hakub te amey rin ne migkahi, "Ame!"

Ne migkahi si Isaak, "Seini e red. Hentew kaa, Tatu?" <sup>19</sup>Migtabak si Hakub, "Si Isaw a, ka panganey ne anak nu. Natuman ku ka insuhu nu keddi. Na Ame, enew kad wey keen kad e kayi te mahintalunan ne ngalap su eyew egpanalanginan ad nikeykew." <sup>20</sup>Piru mig-inse si Isaak, "Mania te mahaan ke re nekeutel, Tatu?"

Ne migtabak si Hakub, "Inbulihan a te Magbebaye ne Manama nu."

<sup>21</sup>Ne migkahiyan ni Isaak si Hakub, "Hendini ka eyew egpakasamsam a keykew, su eyew egkanengnengan ku ke si Isaw ke naa iya." <sup>22</sup>Sikan naa ka migdani-rani si Hakub diye te amey rin wey insamsam e sikandin te amey rin te migkahi, "Iling te laheng ni Hakub ka laheng nu, piru ka belad nu, iling te belad ni Isaw." <sup>23</sup>Ware neileyi ni Isaak si Hakub su bulbulen ka belad din iling te belad ni Isaw. Ne egpanalanginan din e perem si Hakub <sup>24</sup>piru mig-inse pad mane sikandin, "Si Isaw ka iya?"

Ne migtabak si Hakub, "Uya, sikeddi iya."

<sup>25</sup>Ne migkahi si Isaak, "Sendari ad e te ngalap ne inggilutu nu. Ke egkakeen kud e sika, egpanalanginan kud sikeykew." Ne insendad e seeye ni Hakub wey insendaran din pad man-e te binu, ne migkeen e sikandin wey mig-inum. <sup>26</sup>Nataman, migkahi si Isaak, "Hendini ka, Tatu, wey hareki a." <sup>27cy</sup>Sikan naa ka

cy. 27:27-29: Hib 11:20.

migdani-rani si Hakub ne miggarek ki Isaak. Te nakaarek e si Isaak te ngareg te kumbale din, henduen pad ne impanalanginan din si Hakub te migkahi,

"Ka ngareg te anak ku

nekeiling te ngareg te kabenesan

ne impanalanginan te Magbebaye ne Manama.

<sup>28</sup>Egbehayan ka te Manama te demmug ne egligkat diye te langit,

wey egkeuyahan te pinamula ka kamet nu kayi te ampew te tane,

wey egmatubung ka te keenen wey binu.

<sup>29</sup>czEgkeyimu ne suluhuanen nu ka me nasud,

wey egpamakey sikandan keykew.

Egpakabuut ka te karumaan nu,

wey egpeiluk-iluk sikandan keykew.

Egdilusen seeye se egdilus keykew,

wey egpanalanginan seeye se egpanalangin keykew."

### Ka pegpeyimmimenew ni Isaw te panalangin ni Isaak

 $^{30}$ Te nekeimpus e si Isaak ka egpanalangin ki Hakub, mig-awe e si Hakub diye te amey rin. Ne neiyuhan de iya sikandin ni Isaw te migpanitingen.  $^{31}$ Miggilutu degma sikandin te mananam ne pegkeen wey in-uyan din e seeye

cz. 27:29: Hin 12:3.

te amey rin. Ne migkahi sikandin, "Ame, enew kad wey keen kad e kayi te mahintalunan ne sere su eyew egpanalanginan ad nikeykew."

<sup>32</sup>Piru mig-insaan sikandin ni Isaak, "Hentew kaa?"

Migtabak sikandin, "Si Isaw a, ka panganey ne anak nu."

<sup>33</sup>Te sikan de, ingkelkel amana si Isaak ne migkahi, "Hentew naa ka migsendad e keddi te neutel rin ne mahintalunan? Nakabusan e re iya nikeykew ka migkeen dutu, wey napanalanginan kud sikandin. Ne kene kud seeye egkaawi."

<sup>34</sup>Te pegkarineg dutu ni Isaw, migpanaman e sikandin migpandalawit ne migkahi, "Ame! Panalangini e red degma nikeykew!"

 $^{35}$ Piru migtabak si Isaak, "Ka hari nu bes ka miggendini ne mig-akal keddiey. In-ahew rin e ka panalangin nu perem."

<sup>36da</sup>Migkahi si Isaw, "Malehet iya ne egngaranan sikandin ki Hakub,<sup>db</sup> su kararuwa ad nikandin ahawi. In-ahew rin ka katenged ku isip panganey wey kuntee, in-ahew rin e man-e ka panalangin ku perem. Menua, warad nasame ne panalangin nu keddi?"

<sup>37</sup>Ne migtabak si Isaak, "Kuntee, neyimu kud sikandin ne ahalen nu wey egkeyimu ne suluhuanen din ka langun ne karumaan din. Egmatubung layun sikandin te keenen wey binu. Na, nekey bu naan de ka nasame ne igpakabehey ku keykew, Tatu?"

<sup>38dc</sup>Piru migpabulus si Isaw ka migpeyimmimenew te amey rin ne migkahi, "Warad iya panalangin nu keddi ne nasame, minsan deisek? Ame, panalangini e red degma nikeykew!" Ne migpanaman pad man-e si Isaw migpandalawit.

<sup>39dd</sup>Ne intabak sikandin te amey rin,

"Mariyu te egkeuyahan te pinamula ka egkeugpaan nu,

## wey mariyu degma seini te demmug

ne egligkat diye te langit.

- da. 27:36: Hin 25:29-34.
- db. 27:36 Te Hibruwanen: "mig-eakal" ka maralem ne kaluwasan te lalag dan ne "Hakub."
- dc. 27:38: Hib 12:17.
- dd. 27:39-40: Hib 11:20.

 $40 \mathrm{de}$ Egkeuyag ka pinaahi te panganiban nu ne kampilan,

wey egpamakey ka te hari nu.

Piru ke eg-apul ka,

egpakaawe ka te pegmandu din."

 $^{41}$ Ne indumutan ni Isaw si Hakub su sikandin ka napanalanginan te amey rin. Migkahi sikandin diye te geyinawa rin, "Te kene egkaluhey, egpatey e si Ame. Ne due, eggimatayan ku si Hakub."

<sup>42</sup>Piru nahuhuran si Ribika meyitenged te peglelalis ni Isaw, sikan naa ka impeumew rin e si Hakub wey migkahiyan, "Eglelalisan ka te eggimatey te kakey nu ne si Isaw eyew egkabewu ka langet din keykew. <sup>43</sup>Purisu, Tatu, tumana nu ka lalag ku. Pallahuy ka diye te maama ku ne si Laban ne diye mig-ugpe te Haran. <sup>44</sup>Diye ke pa tagtaheed ugpe te kandin taman te egkabewu e ka langet te kakey nu keykew. <sup>45</sup>Ke egkalingawan din e ka innimu nu kandin, igpaangey ku re sikeykew. Su kene ne meupiya keddi ne egpekeglegse kew egkaawe kayi te keddi."

## Ka pegpeyipanew ni Isaak ki Hakub peendiye ki Laban

<sup>46</sup>Ne migkahiyan ni Ribika si Isaak, "Kena ad perem egpakaantus te me Hitihanen ne in-asawa ni Isaw. Ke egpakaasawa pad man-e si Hakub te Hitihanen ne mahinged ded kayi, meupiya pad ke egpatey ad."

<sup>1</sup>Ne impeumew ni Isaak si Hakub wey impanalanginan din. Ne impanpanayan din sikandin te migkahi, "Kene ka asawa te malitan ne kayi ne mahinged te Kanaan. <sup>2</sup>Hendiye ka te Padan-aram, diye te baley te apu nu ne si Bituil ne amey te iney nu. Ne diye ka mule asawa te sabeka ne anak te anggam nu ne si Laban. <sup>3</sup>Egpanalanginan ka te Amana ne Maresen ne Manama wey egbehayan ka nikandin te masalig ne anak su eyew egkeyimu ka ne amey te masalig ne nasud.

de. 27:40: Hin 36:8; 2Har 8:20.

<sup>4df</sup>Iggalin perem te Manama diye te keykew wey peendiye te me kabuhalan nu ka panalangin ne imbehey rin ki Abraham eyew sikeykew ka egpakakamuney te seini se migtagtaheeran nu te eg-ugpe, ne imbehey te Manama diye ki Abraham." <sup>5</sup>Nataman, impeyipanew e ni Isaak si Hakub diye te Padan-aram ne mig-ugpaan te anggam din ne si Laban ne anak ni Bituil ne matig-Aramiya. Si Laban maama ni Ribika ne iney enni Hakub wey Isaw.

#### Ka peg-asawe e man-e ni Isaw

<sup>6</sup>Nakarineg si Isaw ne impanalanginan ni Isaak si Hakub wey impeendiye te Padan-aram eyew diye egpaasawaa. Nakarineg degma sikandin ne impanpanayan si Hakub te pegpanalangin kandin ne kene eg-asawa te malitan ne matig-Kanaan. <sup>7</sup>Nanengnengan man-e ni Isaw ne migtuman si Hakub te ingkahi te amey wey iney rin kandin wey miggendiyad e te Padan-aram. <sup>8</sup>Ligkat dutu, nanengnengan e ni Isaw ne egkeepes ka amey rin te me malitan ne matig-Kanaan. <sup>9</sup>Purisu, miggendiyad e si Isaw te anggam din ne si Ismail wey migduruwey e man-e ki Mahalat. Talaari si Mahalat wey si Nibayut ne me anak ni Ismail ne anak ni Abraham.

## Ka taheinep ni Hakub diye te Bitil

<sup>10</sup>Ne mig-awe e si Hakub diye te Birsiba wey miggendiyad te Haran. <sup>11</sup>Te peglineb te aldew, nekeume e sikandin diye te sabeka ne inged wey diye pad sikandin miggirehe. Migkuwa si Hakub te batu ne eg-ulunanan din wey miggibat e su eglipereng e. <sup>12dg</sup>Ne nakataheinep sikandin ne due haheran ne nakapabunsud diye te tane ne nekeuma diye te langit. Nakita rin ne due me panalihan te Manama ne migmamaneyik wey migmamaneug te seeye ne haheran. <sup>13dh</sup>Nakita rin degma ka Magbebaye ne Manama ne migsasindeg diye te lenged din ne migkahi, "Sikeddi ka Magbebaye, ka Manama te apu nu ne si Abraham wey Manama degma te amey nu ne si Isaak. Igbehey ku keykew wey peendiye te me kabuhalan nu ka seini ne tane ne miggibatan nu. <sup>14di</sup>Keureme, masulug ka me kabuhalan nu ne egpekeiling

- df. 28:4: Hin 17:4-8.
- dg. 28:12: Huw 1:51.
- dh. 28:13: Hin 13:14-15.
- di. 28:14: Hin 12:3; 22:18.

te alinepung kayi te tane. Egpekeempet sikandan diye te igsile wey iglineb, wey diye te igkahibang wey igkakawanan ne balabahan dapit te igsile. Pinaahi keykew wey te me kabuhalan nu, egpanalanginan ku ka langun ne me nasud kayi te ampew te tane. <sup>15</sup>Tantanuri nu ne egdumaan ku sikeykew wey egbantayan ku sikeykew minsan hendei ka egbaye. Keureme, igpalibed ku red sikeykew te seini ne tane. Kene ku sikeykew eg-engkeran taman te egkatuman e ka langun ne insaad ku keykew."

<sup>16</sup>Ne nekeyimate e si Hakub wey nakakahi, "Kayi bes ka Magbebaye ne Manama te seini ne inged, piru wara a mule nakanengneng." <sup>17</sup>Naaldek sikandin ne migkahi, "Egkaaldekan ka seini ne inged! Ugpaan bes iya seini te Manama wey gumawan peendiye te langit."

<sup>18</sup>Ne migselem-selem mig-enew si Hakub wey ingkuwa rin ka batu ne inulunanan din wey impasasindeg din eyew egkeyimu ne eglimlimuan. In-itisan din seeye te lana te ulibu su eyew egkeyimu ne matulus. <sup>19</sup>Ne migngaranan din ka seeye ne inged te Bitil,<sup>dj</sup> piru Lus dengan ka ngaran dutu. <sup>20</sup>Ne migsaad si Hakub ne migkahi, "Ke egdumaan a nikeykew Manama wey egbantayan a nikeykew te seini ne peggipanew ku, wey ke egbehayan a nikeykew te egkeenen, manggad, <sup>21</sup>wey ke meupiya ka peg-uli ku diye te baley te amey ku, eg-ileen kud sikeykew Magbebaye ne Manama ne keddiey ne Manama. <sup>22</sup>Ne seini se batu ne impasasindeg ku, iyan tuus ne kayi ka ugpaan nu. Ne igbehey ku keykew ka igkasapulu ne baad te langun ne igbehey nu keddiey."

# 29

### Ka pegginguma ni Hakub diye te baley ni Laban

<sup>1</sup>Ne migpabulus si Hakub ka miggipanew taman te nekeuma rin e diye te inged te matig-igsile. <sup>2</sup>Te diyad e sikandin, due nakita rin ne tatelu ne punduk te karniru ne migbuluku diye te lenged te belun ne egsaksakuhan te igpeinum te me ayam. Ne ka belun, intel-eban te dakel ne batu. <sup>3</sup>Due batasan dan ne emun egkalibulung e ka langun ne me karniru, human pad egbekaren te me talagtameng te karniru ka batu ne intel-eb te belun. Ke egpekeimpus e sikandan ka egpeinum te me karniru, iglibed dan ded man-e igtel-eb ka batu diye te belun.

<sup>4</sup>Mig-insaan ni Hakub ka me talagtameng, "Me suled, hendei kew ne mahinged?" Migtabak sikandan, "Matig-Haran key."

dj. 28:19 Te Hibruwanen: "baley te Manama" ka kaluwasan te lalag ne "Bitil."

<sup>5</sup>Mig-insaan din e man-e sikandan, "Nekeila kew naa te etew ne egngaranan ki Laban ne apu ni Nahur?"

Migtabak sikandan, "Uya."

<sup>6</sup>Mig-insaan din e man-e sikandan, "Menua sikandin?" Ne migtabak sikandan, "Meupiya ma. Pitew ka, sikan bes en iya ka anak din ne si Rakil ka eguyan te karniru te amey rin."

<sup>7</sup>Migkahi si Hakub, "Kene pad ne eleg ne timpu ne eglibulungen ka me karniru su maaldew pad, meupiya pad ke egpeinumen niyud kuntee wey egpepanabtaben pad man-e."

<sup>8</sup>Piru migtabak sikandan, "Kene ney pad egpeinumen ka me karniru ke kene pad egkalibulung langun. Ke egkalibulung e langun, henduen pad ne egbekaren ney ka batu ne intel-eb te belun eyew te pegpeinum te me karniru."

<sup>9</sup>Te sasangan pad ne egpalalahey sikandan, nekeume e si Rakil ka miguyan te me karniru te amey rin, su sikandin ma ka talagtameng te karniru. <sup>10</sup>Te pegkakita ni Hakub te atebey rin ne si Rakil ne anak te anggam din ne si Laban, wey te me karniru rin, miggendiyad sikandin te belun wey imbekad din e ka batu ne intel-eb dutu wey impeinum din e ka me karniru te anggam din. <sup>11</sup>Nataman, miggarekan din si Rakil wey nakasinehew sikandin ka neyinghingesa. <sup>12</sup>Ne migkahiyan din si Rakil, "Maama a nikeykew su anak a ni Ribika ne atebey te amey nu."

Sikan naa ka mig-uli e si Rakil ne migpallahuy wey migpangguhuran din e ka amey rin. <sup>13</sup>Te pegkarineg ni Laban meyitenged te peglepew ni Hakub, migpallahuy e degma sikandin ka egsinug-ung te anaken din. Migkepkepan din si Hakub wey miggarekan, wey induma rin e diye te baley. Te nekeuma a ran e diye, migpanugtulan e ni Hakub si Laban te langun ne neula-ula rin. <sup>14</sup>Nataman, migkahi si Laban, "Ew, amana ki bes pad iya!"

### Ka peg-asawa ni Hakub engki Liya wey ki Rakil

Te senge bulan e si Hakub ka mig-ugpe diye, <sup>15</sup>migkahiyan sikandin ni Laban, "Minsan anaken ku sikeykew, kene egkaayun ne ware igbayad ku te peggimu nu kayi. Na, kahii a ke nekey ka igkeupii nu ne igbayad ku keykew?"

 $^{16}$ Ne due daruwa ne anak ni Laban ne mengebay; si Liya ka kakey wey si Rakil ka hari.  $^{17}$ Mateles ka mata ni Liya, piru si Rakil, pangngawakan wey subla pad ne mateles.

<sup>18</sup>Tenged te due geyinawa ni Hakub ki Rakil, migtabak sikandin, "Eggimu a kayi te keykew seled te pitu ne leg-un ke igpaasawa nu keddi si Rakil."

<sup>19</sup>Ne mig-uyun si Laban ne migkahi, "Meupiya pad ke sikeykew ka igpaasawa ku kandin du te duma ne lukes. Purisu, uugpe kad iya kayi te keddiey." <sup>20</sup>Sikan naa ka migpanganuhang e si Hakub seled te pitu ne leg-un eyew egkaasawa rin si Rakil. Piru tenged te dakel ka geyinawa rin diye te ki Rakil, iling te pila re ne aldew ka kaluhayan diye te isip ni Hakub.

<sup>21</sup>Nataman, migkahiyan ni Hakub si Laban, "Ibehey nud keddi ka anak nu su eyew egpekeg-asawa key e, su natuman e ka pitu ne leg-un." <sup>22</sup>Sikan naa ka migsahakeen si Laban wey ingginggat din ka langun ne mig-ugpe te seeye ne inged. <sup>23</sup>Piru te seeye ne marusilem, si Liya ka in-uyan ni Laban eyew egpewuliran ki Hakub, wey kene ne si Rakil. <sup>24</sup>(Ne imbehayan ni Laban si Liya te uripen din ne malitan ne si Silpa ne igpeuripen kandin.) <sup>25</sup>Te pegkamaselem e, iyan igkateu-teu ni Hakub te si Liya bes ka newuliran din. Ne migkahiyan din si Laban, "Mania te neyimu nu seini kayi te keddi? Si Rakil ka impanganuhangan ku keykew. Mania te inlimbungan a nikeykew?"

<sup>26</sup>Ne migtabak si Laban, "Ware batasan ney kayi ne eggun-aan egpaasawei ka hari du te kakey. <sup>27</sup>Tahad ke pa ne egkeimpusan ka senge simana ne sahakeen te seini ne kasal su igpaasawa ku red iya keykew si Rakil. Piru wey re ke eg-uyun ka ne egpanganuhang ke pad man-e seled te pitu red ne leg-un."

<sup>28</sup>Ne mig-uyun si Hakub ne egpanganuhang pad man-e sikandin seled te pitu ne leg-un. Te neimpusan e ka senge simana ne pegsahakeen te kasal ran ki Liya, impaasawe e man-e ni Laban ki Hakub si Rakil. <sup>29</sup>(Imbehayan ni Laban si Rakil te malitan ne uripen din ne si Bilha eyew igpeuripen kandin.)

<sup>30</sup>Sikan naa ka migpewulirey e degma si Hakub ki Rakil, wey subla pad ka geyinawa rin ki Rakil du te geyinawa rin ki Liya. Migpabulus sikandin ka migpanganuhang ki Laban seled te pitu pad man-e ne leg-un.

#### Ka me anak ni Hakub

<sup>31</sup>Nakita te Magbebaye ne Manama ne ware geyinawei ni Hakub si Liya, sikan naa ka impaanak din si Liya. Piru ware din paanaka si Rakil. <sup>32</sup>Ne naberes si Liya wey nakaanak te lukes. Migngaranan din ka bate ki Rubin<sup>dk</sup> su migkahi sikandin, "Nakakita ka Magbebaye ne Manama te keyirapan ku, wey kuntee, eggeyinawaan ad te asawa ku." <sup>33</sup>Nataman, naberes e man-e si Liya wey nakaanak

dk. 29:32 Te Hibruwanen: "nakakita sikandin te keyirapan ku" ka kaluwasan te lalag ne "Rubin."

ded man-e te lukes. Migngaranan din ka bate ki Simyun<sup>dl</sup> su migkahi sikandin, "Tenged te narineg te Magbebaye ne Manama ne ware e pad geyinawei te asawa ku, imbehayan e red nikandin te igkarangeb ne anak ne lukes." <sup>34</sup>Nataman, naberes e man-e si Liya wey lukes ded man-e ka anak din. Migngaranan din ka bate ki Libi<sup>dm</sup> su migkahi sikandin, "Kuntee, egkasabeka key e ka alunggun, su nakaanak key e te tatelu ne lukes." <sup>35</sup>Nataman, naberes e man-e si Liya wey lukes ded man-e ka anak din. Migngaranan din ka bate ki Huda<sup>dn</sup> su migkahi sikandin, "Kuntee, egsayeen ku ka Magbebaye ne Manama." Nataman, ware pad man-e miganak sikandin.

 $30\,^{1}$ Te pegkanengnengi ni Rakil ne kene iya sikandin eg-anak, neimme e sikandin te kakey rin. Ne migkahiyan din si Hakub, "Paanaka a nikeykew. Ke kene, egpatey a iya."

<sup>2</sup>Nabelu si Hakub ki Rakil ne migkahi, "Manama a? Sikandin ka ware migpaanak keykew!"

<sup>3</sup>Ne migkahi si Rakil, "Seini red ka uripen ku ne si Bilha. Huliri nu sikandin su eyew ligkat kandin duen ded anak ku." <sup>4</sup>Sikan naa ka impaasawe e ni Rakil si Bilha ki Hakub wey ingguliran din e si Bilha. <sup>5</sup>Ne naberes si Bilha wey nakaanak sikandin te lukes ne anak dan ki Hakub. <sup>6</sup>Ne migngaranan ni Rakil ka bate ki Dan<sup>do</sup> su migkahi sikandin, "Neyid-u red ka Manama keddiey! Narineg din ka peg-ampu ku su imbehayan a nikandin te lukes ne anak." <sup>7</sup>Nataman, naberes e man-e si Bilha wey nakaanak ded man-e te igkarangeb ne lukes ne anak dan ki Hakub. <sup>8</sup>Ne migngaranan ni Rakil ka bate ki Naptali<sup>dp</sup> su migkahi sikandin, "Nekeg-ehet key amana te kakey ku piru migpanalu a."

 $^9$ Te pegkanengnengi ni Liya ne kene pad man-e sikandin eg-anak, impaasawa rin e degma ka uripen din ne si Silpa ki Hakub.  $^{10}$ Nataman, nakaanak si Silpa te lukes ne anak dan ki Hakub.  $^{11}$ Ne migngaranan ni Liya ka bate ki Gad $^{dq}$  su migkahi sikandin, "Meupiya se kulis ku."  $^{12}$ Nataman, nakaanak e man-e si Silpa

- dl. 29:33 Te Hibruwanen: "ka egpakarineg" ka kaluwasan te lalag ne "Simyun."
- dm. 29:34 Te Hibruwanen: "egkasabeka sikandan" ka kaluwasan te lalag ne "Libi."
- dn. 29:35 Te Hibruwanen: "pegsaye" ka kaluwasan te lalag ne "Huda."
- do. 30:6 Te Hibruwanen: "eggukum" ka kaluwasan te lalag ne "Dan."
- dp. 30:8 Te Hibruwanen: "samuk ku" ka kaluwasan te lalag ne "Naptali."
- dq. 30:11 Te Hibruwanen: "meupiya se kulis" ka kaluwasan te lalag ne "Gad."

te igkarangeb ne lukes ne anak dan ki Hakub.  $^{13}$ Ne migngaranan ni Liya ka bate ki Asir $^{dr}$  su migkahi sikandin, "Subla a ne nahale! Kuntee, egngengaranan a te me malitan te mahalew."

<sup>14</sup>Te tinggaani e te trigu, miggendiye si Rubin te kamet wey nakakita rin te palisel ne hilamunen ne egngaranan te "mandragura" diye, wey in-uyan din e seini diye te iney rin ne si Liya. Te pegkakita dutu ni Rakil migkahiyan din e si Liya, "Egbuyu a te mandragura te anak nu."

<sup>15</sup>Piru migtabak si Liya, "Kene bes pad ne eleg ka peg-ahew nu te asawa ku? Kuntee egkuen nud e man-e ka mandragura te anak ku?"

Ne migkahi si Rakil, "Ke egbehayan a nikeykew te mandragura, egkaayun ne egpekewulid ka ki Hakub kangkuwa ne karusileman." <sup>16</sup>Te maapun e, insinug-ung de ni Liya si Hakub te peg-uli din puun te kamet. Ne migkahiyan ni Liya si Hakub, "Keilangan ne diye ka eggirehe te keddi te seini ne karusileman su migbayaran kud e sikeykew te mandragura ne nakita te anak ku." Purisu, si Liya ka migguliran ni Hakub te seeye ne karusileman.

<sup>17</sup>Ne intabak te Manama ka peg-ampu ni Liya wey naberes e man-e sikandin wey nakaanak e te igkalimma ne lukes ne anak dan ki Hakub. <sup>18</sup>Ne migngaranan ni Liya ka bate ki Isakar<sup>ds</sup> su migkahi sikandin, "In-unahan a te Manama su imbehey ku ma ka uripen ku diye te asawa ku." <sup>19</sup>Nataman, naberes e man-e si Liya wey miglesutan e te igkeen-em ne lukes ne anak dan ki Hakub. <sup>20</sup>Ne migngaranan ni Liya ka bate ki Sabulun<sup>dt</sup> su migkahi sikandin, "Imbehayan a te Manama te meupiya ne dasag. Kuntee eggeyinawaan ad e te asawa ku su hen-em man-e ka anak ney ne neelin ne me lukes." <sup>21</sup>Nataman, nakaanak e si Liya te malitan ne migngaranan din ki Dina.

<sup>22</sup>Ne ware nalingawi te Manama si Rakil. Purisu, intabak din ka peg-ampu ni Rakil wey nakaanak e sikandin. <sup>23</sup>Nataman, naberes e sikandin wey nakaanak sikandin te lukes wey migkahi, "In-awe e te Manama ka pegkeyilew ku." <sup>24</sup>Ne migngaranan din ka bate ki Husi<sup>du</sup> su migkahi sikandin, "Egbehayan e pad perem te Magbebaye ne Manama te duma ne anak ne lukes."

```
dr. 30:13 Te Hibruwanen: "egkahale" ka kaluwasan te lalag ne "Asir."
```

ds. 30:18 Te Hibruwanen: "unag" ka kaluwasan te lalag ne "Isakar."

dt. 30:20 Te Hibruwanen: "dasag" ka kaluwasan te lalag ne "Sabulun."

du. 30:24 Te Hibruwanen: "egtimul pad perem sikandin" ka kaluwasan te lalag ne "Husi."

## Ka pegpasabutey ni Hakub ki Laban

<sup>25</sup>Te ware pad naluhey si Rakil ka miglesutan ki Husi, migkahiyan e ni Hakub si Laban, "Peulia ad nikeykew diye te keddi ne inged. <sup>26</sup>Ibehey nud keddi ka me asawa ku wey me anak ku ne nabayaran kud te pegpanganuhang ku keykew su eg-uli ad e. Su nakanengneng ka ke immenu ku te pegtrabahu kayi te keykew."

<sup>27</sup>Piru migtabak si Laban, "Ke egkaayun ne kene ke pa ubag awe kayi te keddi, su naantukan ku ne impanalanginan a te Magbebaye ne Manama tenged keykew. <sup>28</sup>Na, buyu ke re te igkeupii nu ne bayad su igbehey ku keykew."

<sup>29</sup>Ne migtabak si Hakub, "Nakanengneng ka ke immenu ku te peggimu kayi te keykew wey nabuhal ka me ayam nu tenged te pegtanggu ku. <sup>30</sup>Su dengan, te ware e pad miggendini, deisek de ka karatuan nu, ne kuntee, migdakel e ne subla. Su impanalanginan ka te Manama pinaahi te langun ne neyimu ku. Piru kuntee, keilangan ne iyan kud egtangguwen ka me asawa ku wey ka me anak ney."

<sup>31</sup>Ne mig-inse man-e si Laban, "Nekey-a ka igbayad ku keykew?"

Ne migtabak si Hakub, "Kene ne seleppi. Wey e re egpabulus ne egtanggu te ayam nu ke egkabennalan ka te igkahi ku keykew. <sup>32</sup>Peendiyaa a nikeykew te me ayam nu kuntee eyew igsuwey kud ka langun ne me kambing ne balangbangan wey ka langun ne me karniru ne meitem. Sikan e ka ibayad nu keddi. <sup>33</sup>Te mewuri ne me aldew, egkanengnengan nu ke egkasalihan e naa wey se kene. Ke due egkiteen nu diye te me kambing ku ne kene ne balangbangan, wey ke due karniru ne kene ne meitem, egpakakahi ke naa te intakew ku sika diye te keykew."

<sup>34</sup>Ne migtabak si Laban, "Uya. Eg-uyun a te ingkahi nu." <sup>35</sup>Piru te seeye ded ne aldew, insuwey ni Laban ka tagse kambing ne balangbangan ne lukes wey beyan, lagkes ka me karniru ne meitem. Ne impatamengan din e seeye te me anak din ne lukes. <sup>36</sup>Impanguyan dan seeye te kariyuan ne tatelu ne aldew ka peggipanew ligkat te ki Hakub. Ne si Hakub ka migtanggu te duma ne me ayam ni Laban ne nasame.

<sup>37</sup>Ne migkuwa si Hakub te meyilew ne me sugpang te kayu ne egngaranan te alamu, almindras, wey platanu, wey impanluwitan din ka kakiliran te me sugpang eyew due egpekeepus ne me maangkag diye te me sugpang. <sup>38</sup>Ne diye din itahu ka me sugpang ne inluwitan din te lenged te me tahuanan te igpeinum te me ayam eyew egkiteen te me ayam ni Laban. Su egpaaharey ma sikandan ke eginum. <sup>39</sup>Sikan naa, ka me ayam ne naaharan diye te lenged te me sugpang ne due nekeepus ne maangkag, nakaanak sikandan te me balangbangan.

<sup>40</sup>Te pegpaaharey te me karniru, insuwey ni Hakub ka me maangkag wey diye din ipatangke te me balangbangan wey me meitem ne ayam ni Laban. Sikan naa ka migmasalig ka ayam ni Hakub wey insuwey rin diye te me ayam ni Laban.

<sup>41</sup>Ne emun egmaaharey e ka me manekal-nekal ne me ayam, egkuen ni Hakub ka me sugpang ne diye igtahu te tangkaan dan eyew egkiteen dan. <sup>42</sup>Piru ware din tahui te me sugpang ka tangkaan te mahuye-guye ne me ayam. Te ware naluhey, neelin e ne mahuye-guye ka me ayam ni Laban, piru ka me ayam ni Hakub, neelin ne manekal-nekal. <sup>43</sup>Purisu, naratu e ne subla si Hakub. Migmasalig amana ka me uripen din, me karniru, me kambing, me kamilyu, wey me asnu.

# 31

### Ka pegpallahuy enni Hakub puun ki Laban

 $^1$ Ne due narineg ni Hakub ne lalag te me lukes ne anak ni Laban ne migkahi, "Impanakawan ni Hakub ka amey ta wey naratu sikandin ligkat te impanakew rin diye te amey ta."  $^2$ Ne nakita degma ni Hakub ne kenad ne meupiya ka pegsahipe ni Laban kandin, iling te dengan.  $^3$ Ne migkahiyan sikandin te Magbebaye ne Manama, "Uli kad e diye te inged te amey nu, te apu nu wey karumaan nu, wey egdumaan ku sikeykew."

<sup>4</sup>Sikan naa ka impeumew ni Hakub si Rakil wey si Liya ne egpeendiyeen te kandin diye te egpanpanabtaban te me ayam din. <sup>5</sup>Migkahiyan din sikandan, "Nakita ku ne kenad ne meupiya ka pegsahipe te amey niyu keddi, iling te dengan. Piru indumaan a te Manama te amey ku. <sup>6</sup>Nakanengneng kew te migpakannekal a ka miggimu diye te amey niyu. <sup>7</sup>Piru in-akalan a nikandin su kasapulu din balbalawi ka bayad ku. Piru wara a balahara te Manama ne egde-deehen e re te amey niyu. <sup>8</sup>Te pegkahi rin ne ka balangbangan ka igbayad din keddi, mig-anak degma ka langun ne kambing te balangbangan. <sup>9</sup>Sikan naa ka in-angey te Manama ka ayam te amey niyu ne imbehey rin e keddi.

10"Te timpu ne migpallebag ka me beyan, nakataheinep a te due me balangbangan wey buling ne me kambing ne mig-ahad te me beyan ne kambing. <sup>11</sup>Ne migkahiyan a te panalihan te Manama diye te taheinep ku, 'Hakub!' Ne migtabak a, 'Seini e red!' <sup>12</sup>Ne migkahi sikandin, 'Pitawa nu, me balangbangan wey buling ne me kambing ka mig-ahad te me beyan. Innimu ku sika su nakita ku ka langun ne innimu ni Laban diye te keykew. <sup>13</sup>Sikeddi ka Manama ne

migpakita keykew diye te Bitil, ka inged ne in-itisan nu te lana te ulibu ka batu ne impasasindeg nu wey migsesaad ka degma keddi diye. Na, awe kad kayi wey uli kad e diye te inged ne migligkatan nu.'"

 $^{14}$ Ne migtabak ensi Rakil wey si Liya, "Uya, su warad egkakuwa ney diye te amey ney ke egpatey sikandin.  $^{15}$ Kuntee, lapu key naan de diye te isip din. Su impabayaran key e nikandin wey naamin din e ka imbayad kanami.  $^{16}$ Kante e wey peendiye te me anak ta ka langun ne karatuan ne ingkuwa te Manama diye te amey ney. Purisu, himuwa nu ka innangen te Manama keykew."

<sup>17</sup>Nataman, impeuntud e ni Hakub te me kamilyu rin ka me asawa rin wey me anak din. <sup>18</sup>Impewun-a rin ipaalew ka me ayam din ne nakuwa rin diye te Padan-aram. Migligkat e sikandin ka eg-uli diye te inged te Kanaan, ne migugpaan te amey rin ne si Isaak. <sup>19</sup>Te seeye ne timpu, intakew ni Rakil ka me diyusdiyus ne egsimbeen te amey rin te iyug din te migpanabulug te me karniru rin. <sup>20</sup>Naakalan ni Hakub si Laban ne matig-Aramiya su ware din kahii ne eg-awe e sikandan. <sup>21</sup>Migpallahuy e ensi Hakub ne migpanguyan te langun ne karatuan din. Miglapas sikandan te Weyig ne Iyupratis ne miggendiyad te inged te Giliad.

### Ka peglupug ni Laban ki Hakub

<sup>22</sup>Te tatelu e ne aldew ka miglihad, nahuhuran e si Laban te migpallahuy ensi Hakub. <sup>23</sup>Te sikan de, impanlibulung din e ka me suled din wey inlupug dan e ensi Hakub. Napituwan sikandan ne aldew human dan neumaan ensi Hakub diye te bubungan te Giliad. <sup>24</sup>Piru te seeye ne karusileman, migpakita ka Manama ki Laban diye te taheinep ne migkahi, "Ayad-ayad ka te iglalag nu ki Hakub." <sup>25</sup>Ne neumaan enni Laban ensi Hakub ka egpasasindeg te balungbalung dan diye te bubungan te Giliad, wey diyad iya degma sikandan migpasasindeg te balungbalung dan.

<sup>26</sup>Ne migkahiyan ni Laban si Hakub, "Mania te mig-akalan a nikeykew? Mania te in-ahew nu ka me anak ku iling te egkarakep te me etew ne egpabunbunuey wey eg-uripenen? <sup>27</sup>Mania te mig-akalan a nikaniyu wey miglunus kew migpallahuy? Ke migpataha kew pa, meupiya perem ka pegpaligkat ku kaniyu wey due perem peg-ulahing ne egkabales te tehunggu wey salurey. <sup>28</sup>Mania te wara a nikeykew pahareka te me anak ku wey te me apu ku? Keungelan seini se innimu nu! <sup>29</sup>Egkaayun ne egdereetan ku sikeykew kuntee, piru gabii te marusilem, migpakita keddi ka Manama te amey nu wey migkahiyan a nikandin,

'Ayad-ayad ka te iglalag nu ki Hakub.' <sup>30</sup>Nakanengneng a te mig-awe ka su naalimengawan kad amana diye te kaniyu, piru mania te impanakew nu ka me diyus-diyus ne egsimbeen ku?"

<sup>31</sup>Migtabak si Hakub, "Iyan ku impallahuy su naaldek a ne kema ke egpehesen nu te eggawi ka me anak nu. <sup>32</sup>Piru meyitenged te nalaag ne me diyusdiyus nu, ka minsan hentew kayi te kanami ne egkitaan nu dutu, egkaayun ne eggimatayan sikandin. Kayi te tangkaan te me suled ta, tinurua nu ka minsan nekey ne keykew wey hawia nu." Piru ware nakanengneng si Hakub ne si Rakil bes ka migtakew te diyus-diyus te amey rin.

<sup>33</sup>Ne migseled si Laban ka egpammitew te diyus-diyus din diye te balungbalung ni Hakub, balungbalung ni Liya, wey diye te balungbalung te daruwa ne uripen ne duwey ni Hakub, piru ware din nakita ka me diyus-diyus din. Nataman, migseled e man-e sikandin diye te balungbalung ni Rakil. <sup>34</sup>Ne inggeles bes ni Rakil ka me diyus-diyus diye te sakang te kamilyu rin, wey migpinnuuwan din seini. Purisu, ware nakita ni Laban seeye minsan neempet din e te migpammitew ka diye te seled te me balungbalung. <sup>35</sup>Ne migkahiyan ni Rakil ka amey rin, "Ame, kene ka egkabelu ne kena a egpakasasindeg kayi te tangkaan nu, su egbulanen a." Ne migpabulus-bulus pad si Laban ka egpammitew piru ware din iya nakita ka diyus-diyus din.

<sup>36</sup>Ne nabelu e si Hakub ne migkahiyan si Laban, "Nekey bes ka seyyup ne neyimu ku? Nekey bes ka sale ku mania te inlupug a nikeykew? <sup>37</sup>Impanlekis nud e ka langun ne kasangkapan ku, duen naa nakita nu ne keykew? Na, ipapitew nu kayi te tangkaan te me suled ta ke due nakita nu ne keykew eyew egpekewukum sikandan ke hentew ka malehet kanta! <sup>38</sup>Seled te daruwa ne pulu (20) ne leg-un ne mig-uugpa a diye te keykew, warad iya sabeka ne kambing wey ke karniru naa ne naawaan. Ne wara a iya degma nakahilang te minsan sabeka ne lukesan ne karniru nu. <sup>39</sup>Ka miggimatayan te me mahintalunan, imbullasan ku. Ware ku uyana diye te keykew eyew igpapitew ku ne kene ne keddi ne seyyup, su imbullasan ku red. Impabayaran nu keddi ka langun ne ayam nu ne impanakew te maaldew wey marusilem. <sup>40</sup>Dengan, in-antus ku ka meinit emun ke maaldew, wey ka maagsil emun ke marusilem, wey kene ne meupiya ka peglipereng ku. <sup>41</sup>Mig-uugpa a diye te keykew seled te daruwa ne pulu (20) ne leg-un. Sapulu wey hep-at (14) ne legun ka imbayad ku te daruwa ne anak nu, wey hen-em ne leg-un ka imbayad ku te me ayam nu. Piru sikeykew, kasapulu nu mule balbalawi ka bayad ku! <sup>42</sup>Ke wara a bulihi te Manama, ka Manama te apu ku ne si Abraham wey ka Manama te amey

ku ne si Isaak, kema ke impaawa ad nikeykew ne ware inuyanan. Piru nakita te Manama ka keyirapan ku wey ka meupiya ne himu ku, purisu gabii te marusilem insaparan ka nikandin."

### Ka kasabutan enni Hakub wey ki Laban

<sup>43</sup>Ne migtabak si Laban ki Hakub, "Seini se me malitan, me anak ku sikandan, wey seini se me bate, me apu ku. Ne ka me ayam, keddi ded degma. Ka langun ne egkakita nu, keddiey. Piru nekey naan pad kuntee ka egkeyimu ku te me anak ku wey te me apu ku? <sup>44</sup>Meupiya buwa ne eggimu ki naan de se daruwa te kasabutan. Ne egtetambu ki te me batu ne eglimlimuan ta ne pamalehet te kasabutan ta." <sup>45</sup>Sikan naa ka migkuwa si Hakub te batu wey impes-ek din eyew egkeyimu ne eglimlimuan. <sup>46</sup>Ne insuhu ni Hakub ka karumaan din ne me lukes ne egpakuen te me batu ne igpatambu kandan. Ne nangeen e sikandan diye te lenged te me batu ne intambu. <sup>47</sup>Ne migngaranan ni Laban seeye te Higarsahaduta, <sup>dv</sup> piru Galiid<sup>dw</sup> mule ka ingngaran ni Hakub. <sup>48</sup>Migkahi si Laban, "Seini ne me batu ne intambu ne limlimuan ta iyan pamalehet te kasabutan ta." Purisu, Galiid ka ingngaran dutu ne inged. <sup>49</sup>Migngaranan degma ka seeye ne inged te Mispa<sup>dx</sup> su migkahi si Laban, "Egtanud-tanud ka Magbebaye ne Manama te kasabutan ta ke egpekegsuwey kid e.  $^{50}$ Ke eg-ay-ayuwen nu ka me anak ku wey ke egduruwey ke pad man-e, minsan kena a egpakanengneng, piru ka Manama ka egpakanengneng su sikandin ka egpakakita kanta. 51-52 Seini se me batu ne impatambu ku wey ka sabeka ne batu ne impes-ek ka eglimlimuan ta ne pamalehet te kasabutan ta. Kena a egpakaliyu kayi eyew te pegdereet keykew, wey kene ka degma egpakaliyu kayi eyew te pegdereet keddiey. <sup>53</sup>Ka Manama te apu nu ne si Abraham wey te amey ku ne si Nahur, ne iyan degma Manama te amey ran ne si Tira, iyan eggukum ke hentew kanta ka egpakasale." Ne migpahunlibet si Hakub te ngaran te Manama ne insimba te amey rin ne si Isaak. <sup>54</sup>Ne migpanubad si Hakub diye te bubungan wey impanginggat din ka langun ne karumaan din ne egkeen. Te nakakeen e sikandan, warad sikandan migweil diye te bubungan wey diyad nangirehe. 55Te maselem-

dv. 31:47 "Ka intambu ne eglimlimuan" ka kaluwasan te Aramayik ne lalag ne "Higarsahaduta."

dw. 31:47 "Ka intambu ne eglimlimuan" ka kaluwasan te Hibruwanen ne lalag ne "Galiid."

dx. 31:49 Te Hibruwanen: "sungkaleg te tamenganan" ka kaluwasan te lalag ne "Mispa."

selem pad, napukew e si Laban wey migpangarekan din e ka me anak din wey me apu din wey impanalanginan din e sikandan. Nataman, mig-uli e sikandin.

### 32

### Ka pegpeuyan ni Hakub te iggusey rin ki Isaw

<sup>1</sup>Migpabulus si Hakub ka miggipanew wey insinug-ung sikandin te me panalihan te Manama. <sup>2</sup>Te pegkakita ni Hakub kandan, migkahi sikandin, "Seini ka me sundalu te Manama!" Purisu, migngaranan din ka inged te Mahanaim.<sup>dy</sup>

<sup>3</sup>Ne due me suluhuanen ni Hakub ne impeendiye din ki Isaw ne kakey rin ne diye mig-ugpe te Siir, ka inged ne egngaranan degma te Idumiya. <sup>4</sup>Igpahuhud din kandan ki Isaw ka lalag din. Migkahi sikandin, "Kahii niyu ka kakey ku te sikeddiey si Hakub, ka suluhuanen din ne diye mig-uugpe ki Anggam Laban wey ware pad nekeuli taman kuntee. <sup>5</sup>Duen e me baka ku, me asnu, me karniru, me kambing, wey me uripen. Ne kahii niyu sikandin te insuhu ku iya sikaniyu diye te kandin eyew te peghangyu ne perem meupiye e ka pegsahipe din keddi."

<sup>6</sup>Nataman, miglibed e ka me suluhuanen din ne migkahi, "Migkahiyan ney e ka kakey nu ne si Isaw wey eggendinid e sikandin ka egsinug-ung keykew. Due hep-at ne gatus (400) ne duma rin ne me lukes." <sup>7</sup>Te sikan de, naaldek amana si Hakub wey napanseb. Purisu, imbaad din te daruwa ne punduk ka me etew rin wey me karniru rin, me kambing, me baka, wey me kamilyu. <sup>8</sup>Su migsuman-suman sikandin ne emun ke egginguma si Isaw wey egdereetan din ka senge punduk, egpakapallahuy pad degma ka senge punduk.

<sup>9</sup>Ne mig-ampu si Hakub, "Manama te apu ku ne si Abraham wey te amey ku ne si Isaak, Magbebaye ne Manama, migsuhu ka keddi, 'Uli kad e diye te inged nu wey karumaan nu, wey egpanalanginan ku sikeykew.' <sup>10</sup>Kena a ne likes te langun ne keupiya nu wey pegsalig ne impakita nud keddi te suluhuanen nu. Te pegligkat ku dengan diye te amey ku, miglapas a te Hurdan ne iyan ku re in-uyan ka tuked. Piru kuntee te peg-uli ku, nekeuyan ad te daruwa ne punduk. <sup>11</sup>Pangabangi a nikeykew puun te pegdereet keddi te kakey ku ne si Isaw. Egkaaldek a ke egginguma sikandin wey egpangimatayan key, minsan ka me malitan wey me bate. <sup>12dz</sup>Piru kene nu kalingawi ka insaad nu keddi ne egpanalanginan a nikeykew

dy. 32:2 Te Hibruwanen: "daruwa ne kampu" ka kaluwasan te lalag ne "Mahanaim."

dz. 32:12: Hin 22:17.

wey egpamasalihen nu ka kabuhalan ku ne egpekeiling te lelanek diye te ilis te dahat ne kene egkaseel."

<sup>13</sup>Ne diye de mig-aran si Hakub te seeye ne karusileman. Mig-alam sikandin te me ayam ne iggusey rin te kakey rin ne si Isaw: <sup>14</sup>daruwa ne gatus (200) ka beyan ne kambing wey daruwa ne pulu (20) ka lukesan ne kambing, daruwa ne gatus (200) ka beyan ne karniru wey daruwa ne pulu (20) ka lukesan ne karniru, <sup>15</sup>tatelu ne pulu (30) ka eggatasan ne kamilyu, lagkes e ka me nati, hep-at ne pulu (40) ka beyan ne baka wey sapulu ka lukes ne baka, daruwa ne pulu (20) ka beyan ne asnu wey sapulu ka lukes ne asnu. <sup>16</sup>Ne impundukpunduk ni Hakub ka me ayam wey due me suluhuanen din ne mig-uyan te tagse punduk. Migkahiyan din sikandan, "Hun-a kew keddi, wey pari-diyuey kew ka tagse punduk ne egmasinsinunduley." <sup>17</sup>Innangenan din ka egpekewun-a, "Ke egkasinug-ung nud ka kakey ku ne si Isaw wey ke eg-inse sikandin, 'Hendei ka egpabulus? Hentew-a ka ahalen nu? Hentew-a me ayam kayi?' <sup>18</sup>Tabaka nu sikandin, 'Ayam seini ni Hakub ne suluhuanen nu wey iggusey rin seini keykew, wey egpakasinundul e sikandin kanami.' " 19Iling ded ka insuhu din te igkarangeb, wey te igkatelu, wey te langun ne eg-uyan te me punduk te ayam, "Ke egkasinugung niyud si Isaw, <sup>20</sup>kahi kew iya, 'Si Hakub ne suluhuanen nu ka egpakasinundul kanami.' " Su migsuman-suman si Hakub ne eggusayen din si Isaw te me ayam ne impewun-a rin. Ne ke egpekeglambag e sikandan, kema ke egpasayluwen din e ni Isaw. <sup>21</sup>Purisu impewun-a rin e ka iggusey, wey migpalunggehaat pad si Hakub diye te mig-aranan din te seeye ne karusileman.

### Due inleheng ni Hakub diye te Piniil

 $^{22}$ Te seeye ne karusileman, mig-enew si Hakub wey induma rin ka daruwa ne asawa rin, wey ka daruwa man-e ne asawa rin ne uripen, wey ka sapulu wey sabeka (11) ne anak din wey impalapas sikandan te Habuk ne Weyig.  $^{23}$ Te nakalapas e sikandan, impasinundul rin e ipalapas ka langun ne karatuan din,  $^{24}$ eawey sikandin naan de ka nahaat.

Ne due lukes ne miglepew ne migleheng kandin, wey napawaan sikandan ka migpaleglehengey.  $^{25}$ Te nakasahimanu ka lukes ne kene din egkeelehan si Hakub, insuntuk din ka igtubu te bubun ni Hakub wey nekeg-isu e ka tinemuwan te bubun din.  $^{26}$ Ne migkahi ka lukes, "Lekei ad nikeykew su egkapawe e."

ea. 32:24-26: Hus 12:3-4.

Piru migtabak si Hakub, "Wey ku re sikeykew eglekaan ke egpanalanginan a nikeykew." <sup>27</sup>Ne mig-inse ka lukes, "Hentew-a ka ngaran nu?" Migtabak sikandin, "Si Hakub."

<sup>28eb</sup>Ne migkahi ka lukes, "Kenad e ne Hakub ka ngaran nu, ke kene, si Israil<sup>ec</sup> e su migpakigsikdel ka te Manama wey te me etew, wey migpanalu ka."

<sup>29ed</sup>Ne mig-inse si Hakub, "Hentew-a ka ngaran nu degma?"

Piru migtabak sikandin, "Mania te eg-inse ka te ngaran ku?" Ne impanalanginan din si Hakub diye.

<sup>30</sup>Purisu, migngaranan ni Hakub te Piniil<sup>ee</sup> ka seeye ne inged su ingkahi rin, "Minsan nakita ku ka ulaula te Manama, piru mania te wara a migpatey." <sup>31</sup>Te pegligkat ni Hakub diye te Piniil, migsile e ka aldew wey migpiang-piang e sikandin tenged te nekeg-isu e ka tinemuwan te bubun din. <sup>32</sup>Purisu, minsan kuntee, kenad e egkeenen te me kabuhalan ni Israil ka sapu te me mananap ne diye te igtubu te bubun, su dutu sumbaha si Hakub.

# 33

#### Ka pegsinug-ung ni Isaw ki Hakub

<sup>1</sup>Te egkilem pad, nakite e ni Hakub si Isaw wey ka hep-at ne gatus (400) ne me lukes ne me etew rin ne diye egpabulus kandan. Purisu, imparuma rin ka me anak din te tagse iney ran ne ensi Liya, Rakil, wey ka daruwa ne asawa rin ne uripen. <sup>2</sup>Ne impewun-a rin ka me asawa rin ne uripen duma te me anak dan, impasinundul rin si Liya duma te me anak din, wey mewuri si Rakil duma te anak din ne si Husi. <sup>3</sup>Ne miggun-a si Hakub kandan wey miglangkeb-langkeb sikandin diye te tane te kapapitu taheed te migmarani e sikandin te kakey rin. <sup>4</sup>Piru migpallahuy si Isaw ka migdugpu kandin ne migkepkep wey miggarek kandin. Ne migpasinehawey e sikandan. <sup>5</sup>Te pegpitew ni Isaw, nakita rin ka me malitan wey ka me bate. Ne mig-inse sikandin, "Hentew-a seini se me duma nu?"

Ne migtabak si Hakub, "Ahalen, me anak ku sikandan ne imbehey keddi te Manama puun te hid-u rin." <sup>6</sup>Ne migdugpu ka me asawa rin ne uripen wey ka me

- eb. 32:28: Hin 35:10.
- ec. 32:28 Te Hibruwanen: "ka egleheng te Manama" ka kaluwasan te lalag ne "Israil."
- ed. 32:29: Tal 13:17-18.
- ee. 32:30 Te Hibruwanen: "ka ulaula te Manama" ka kaluwasan te lalag ne "Piniil."

anak dan wey miglangkeb isip pegtahud ki Isaw. <sup>7</sup>Ne migdugpu e man-e kandin si Liya wey ka me anak din ne miglangkeb. Nataman, migdugpu e man-e kandin si Rakil wey si Husi ne miglangkeb.

<sup>8</sup>Mig-inse man-e si Isaw, "Nekey-a ka karuan te masalig ne ayam ne nekewun-a kaniyu ganna?"

Ne migtabak si Hakub, "Igbehey ku seeye keykew eyew egkewusey kad."

<sup>9</sup>Piru migkahi si Isaw, "Hari, eleg e ka keddi. Kena ad behayi nikeykew."

 $^{10}$ Ne migkahi si Hakub, "Kene, su ke meupiye e ka pegsahipe nu keddi, kua nu ka igbehey ku keykew. Nekeiling te pegpitew ku te ulaula te Manama, te nakita ku ne mahalew-galew e ka ulaula nu.  $^{11}$ Eghangyu a ne kua nu iya ka igbehey ku keykew, su impanalanginan a te Manama wey eleg e ka keddi." Migpabulus si Hakub ka mighangyu ki Isaw taman te nabennalan e sikandin.

<sup>12</sup>Ne migkahi si Isaw, "Kuwa kid e wey eggun-a a keykew."

<sup>13</sup>Piru migtabak si Hakub, "Ahalen. Nakanengneng ka ne mahaan egkabeley ka me bate, wey due degma egtangguwen ku ne me ayam ne manggianak. Ke egpanlampesan ku seini se me ayam, minsan senge kaaldew re, egkapatey sikandan langun. <sup>14</sup>Purisu ahalen, hun-a-wun-a ke re due kanami. Su egpahanadganad key re iling te keiyalan te me ayam wey me bate taman te egpekeuma key keykew diye te Idumiya."

 $^{15}$ Ne migkahi si Isaw, "Ke sika, iyan ku re igparuma keykew ka duma te me etew ku."

Piru migtabak si Hakub, "Warad keilangan. Eleg e ka meupiya ne pegsahipe nu keddi."  $^{16}$ Sikan naa ka mig-uli e si Isaw diye te Idumiya te seeye ne aldew.  $^{17}$ Piru miggendiye ensi Hakub te Sukut. Te pegginguma ran diye, migleleeb si Hakub wey migleleeban din degma ka me ayam din. Sikan naa ka migngaranan te Sukut $^{ef}$  ka seeye ne inged.

<sup>18</sup>Ne nataman, miggingume e ensi Hakub diye te siyudad te Sikim diye te inged te Kanaan puun te Padan-aram ne ware neyitabu. Ne migpasasindeg sikandan te me balungbalung dan diye te lihawangan te siyudad. <sup>19eg</sup>Imbeli rin ka tane ne mig-ugpaan din diye te me anak ni Hamur ne amey ni Sikim. Mahatus (100) ne pelata ne mahal ka kentiddad. <sup>20</sup>Ne diye miggimu sikandin te altar ne egunturan te egtutungen, wey migngaranan din seeye te Il, ka Manama ni Israil.

ef. 33:17 Te Hibruwanen: "leeb" ka kaluwasan te lalag ne "Sukut."

eg. 33:19: Huswi 24:32; Huw 4:5.

# 34

### Ka pegleheng ki Dina

<sup>1</sup>Ne due sabeka ne malitan ne anak ni Liya ki Hakub ne egngaranan ki Dina. Sabeka ne aldew, migpanumbaley si Dina te me malitan ne mahinged diye. <sup>2</sup>Nakita sikandin ni Sikim ne Hibihanen. Anak sikandin ni Hamur ne pangulu te seeye ne inged. Indakep din si Dina wey impehes din lehenga. <sup>3</sup>Piru naalihan e sikandin ki Dina wey inggeyinawaan din e, purisu ingguluan din e si Dina. <sup>4</sup>Ne migkahiyan ni Sikim ka amey rin, "Ame, ipaasawa nu keddi ka seini ne mengebay."

<sup>5</sup>Te pegkarineg ni Hakub ne inleheng ka anak din ne si Dina, ware pad miggimu sikandin te minsan nekey su intaharan din pad ka me anak din ne lukes ke egpekeuli ka migpepanabtab te me ayam dan. <sup>6</sup>Ne migpamalay e si Hamur ne amey ni Sikim diye te engki Hakub. <sup>7</sup>Ne nanguli e ka me anak ni Hakub te pegkarineg dan te neyitabu. Amana neepes sikandan wey nabelu tenged te innimu ni Sikim ne pegpeyilew te pamilya ni Hakub. In-isip te me kabuhalan ni Israil ne makaalat-halat sika ne sale. <sup>8</sup>Piru migkahiyan ni Hamur ensi Hakub, "Dakel ka geyinawa te anak ku ne si Sikim diye te anak nu ne si Dina. Sikan naa ka eghangyuen ku ne ipaasawa nud sikandin ki Sikim. <sup>9</sup>Egkaayun ne igpaasawa niyu ka me mengebay niyu te me kanakan ney, wey igpaasawa ney degma ka me mengebay ney te me kanakan niyu. <sup>10</sup>Egpekeugpe kew kayi te inged ney te minsan hendei. Egpakanigusyu kew kayi wey egpakakuwa kew pad man-e te tane."

 $^{11}$ Ne migkahiyan ni Sikim ka amey wey ka me maama ni Dina, "Ke egkeyidu kew keddi, ipaasawa niyud sikandin keddi wey minsan nekey ka igpantun niyu, igbehey ku.  $^{12}$ Pantuni e re nikaniyu te minsan nekey su igbehey ku kaniyu, basta ipaasawa niyu re keddi ka atebey niyu."

<sup>13</sup>Piru mig-ubatan te me anak ni Hakub si Sikim wey ka amey rin ne si Hamur tenged te pegpeyilew ni Sikim te atebey ran ne si Dina. <sup>14</sup>Migkahiyan dan sikandan, "Kene ney igpaasawa ka atebey ney te ware natulii, su egpekeyilew sika kanami. <sup>15</sup>Wey key re eg-uyun ke egpatuli iling kanami ka tagse sabeka ne lukes. <sup>16</sup>Ke iling ma rue, eg-uyun key ne egmaas-asaweey ki. Eg-ugpe key kayi te kaniyu wey egkasabeka kid e. <sup>17</sup>Piru ke kene kew eg-uyun te igkeupii ney wey ke kene egpatuli, eg-angayen ney si Dina wey eg-awe key e kayi."

<sup>18</sup>Ne nabennalan si Hamur wey ka anak din ne si Sikim te lalag te me anak ni Hakub. <sup>19</sup>Ware miglangan-langan si Sikim ka miggimu te inlalag te me anak

ni Hakub su amana sikandin naalihi ki Dina. Ne si Sikim, subla ne egtahuren te pamilya rin.

<sup>20</sup>Sikan naa ka miggendiye sikandin wey ka amey rin te gumawan te siyudad ne libulunganan te me etew wey migkahiyan dan ka me igdatu diye te siyudad dan, <sup>21</sup>"Maal-alukuy seini ne me etew. Egpeugpeen ta perem sikandan kayi te inged ta wey egpakanigusyu minsan hendei, su maluag ma seini se tane. Egpangasaween ta ka me mengebay ran wey igpaasawa ta degma kandan ka me mengebay ta. <sup>22</sup>Piru, wey re eg-ugpe sikandan kayi te kanta eyew egkasabeka ki kandan ke egpatuli ki langun ka me lukes iling kandan. <sup>23</sup>Piru ke iling due, kante e ka langun ne ayam dan wey karatuan dan. Purisu, eg-uyun ki su eyew egpekeugpe sikandan kayi te kanta." <sup>24</sup>Ne mig-uyun ka langun ne me lukes diye te siyudad te ingkahi ni Sikim wey te amey rin. Sikan naa ka migpatuli e ka tagse sabeka ne lukes.

<sup>25</sup>Te igkatelu ne aldew, te egkasakitan pad sikandan ka intulian, due daruwa ne anak ni Hakub ne ensi Simyun wey si Libi ne maama ni Dina ne migkuwa te kampilan dan wey inlusuran dan e ka me lukes diye te siyudad ne ware nakangilam. Impangimatayan dan sikandan langun, <sup>26</sup>wey inlagkes dan si Hamur wey ka anak din ne si Sikim. Ne in-angey ran si Dina diye te baley ni Sikim wey miggipanew e sikandan. <sup>27</sup>Nataman, nangendiye te nangimatayan ka duma ne me anak ni Hakub wey impangahew ran ka me karatuan te seeye ne siyudad tenged su impeyilawan ma ka atebey ran. <sup>28</sup>Impangahew ran ka me karniru, me baka, me asnu, wey ka langun ne diye te siyudad wey ka diye te me kamet. <sup>29</sup>Impangahew ran man-e ka langun ne malitan wey me bate, wey impanguyan dan ka langun ne karatuan te siyudad, lagkes ka me kasangkapan diye te seled te baley.

<sup>30</sup>Ne migkahiyan ni Hakub si Simyun wey si Libi, "Impeyirapan a nikaniyu su kuntee igkeepes ad te langun ne mahinged te seini ne inged ne iyan ka me matig-Kanaan wey ka me Pirisihanen. Ke egpasabutey sikandan ne eglusuran ki, egkeyimatayan ki langun su deisek ki re."

<sup>31</sup>Piru migtabak sikandan, "Egbalaharen ney naa ka lukes ne migleheng te atebey ney ne impeiling din de te malitan ne egkabaley-baley?"

35

Ka pegpanalangin te Manama ki Hakub diye te Bitil

<sup>1eh</sup>Ne migkahiyan te Manama si Hakub, "Halin ka kuntee diye te Bitil. Diya a nikeykew himuwi te altar, su sikeddi ka Manama ne migpakita keykew te pegpallahuy nu ki Isaw ne kakey nu."

<sup>2</sup>Sikan naa ka migkahiyan ni Hakub ka pamilya rin wey ka langun ne duma rin, "Awaa niyu ka me diyus-diyus ne egsimbeen niyu. Linisi niyu ka pegkeetew niyu wey saluub kew te meupiya ne manggad. <sup>3</sup>Eggalin ki diye te Bitil. Diya a eggimu te altar te Manama ne migpangabang keddiey te neyirapan a wey migduma keddiey te minsan hendei a migbaye." <sup>4</sup>Sikan naa ka impamehey ran e ki Hakub ka langun ne diyus-diyus dan wey me eritis dan, wey inlebeng e seeye ni Hakub diye te lenged te lebut te matulus ne kayu ne marani te Sikim.

<sup>5</sup>Te peggipanew ran, ware ded sikandan lupuha te me etew ne mig-ugpe te me siyudad te seeye ne inged, su impeyinalatan te Manama ka mahinged. <sup>6</sup>Nataman, nekeume e ensi Hakub diye te Lus (wey ke Bitil) diye te inged te Kanaan. <sup>7</sup>Diye miggimu sikandin te altar ne eg-unturan te egtutungen. Migngaranan din te Il-Bitil ka inged, su diye migpakita ka Manama kandin te migpallahuyan din ka kakey rin. <sup>8</sup>Te seeye ne timpu, migpatey e ka buyag ne talagtanggu ki Ribika ne si Dibura. Ne diye ilebeng sikandin lenged te lebut te kayu ne matulus ne diye te diralem te Bitil. Purisu, ingngaranan te Alun-bakut<sup>ei</sup> ka seeye ne kayu.

<sup>9</sup>Te pegginguma ni Hakub diye te Bitil puun te Padan-aram, migpakite e man-e ka Manama kandin wey impanalanginan sikandin. <sup>10ej</sup>Migkahiyan sikandin te Manama, "Kenad e ne si Hakub ka ngaran nu kuntee, su Israil e." Sikan naa ka migngaranan e sikandin ki Israil. <sup>11ek</sup>Ne migkahiyan man-e sikandin te Manama, "Sikeddi ka Manama ne Amana ne Maresen. Kabuhal ka wey egmannenasud ka me kabuhalan nu, wey due me kabuhalan nu ne egkeyimu ne me Hari. <sup>12</sup>Igbehey ku keykew wey peendiye te me kabuhalan nu ka tane ne imbehey ku ki Abraham wey ki Isaak dengan." <sup>13</sup>Te sikan de, mig-awe e ka Manama. <sup>14el</sup>Ne migpes-ek si Hakub te batu ne eglimlimuan diye te inged ne inlalahan sikandin te Manama. Imbusbusan din seeye te binu wey in-itisan din man-e te lana te ulibu su palinneu

- eh. 35:1: Hin 28:11-17.
- ei. 35:8 Te Hibruwanen: "kayu ne miglungkuan" ka kaluwasan te lalag ne "Alun-bakut."
- ej. 35:10: Hin 32:28.
- ek. 35:11-12: Hin 17:4-8.
- el. 35:14-15: Hin 28:18-19.

te imbehey rin diye te Manama.  $^{15}$ Migngaranan ni Hakub te Bitil $^{\rm em}$  ka seeye ne inged su diye lalahi sikandin te Manama.

#### Ka pegpatey ni Rakil

<sup>16</sup>Nataman, mig-awe e sikandan diye te Bitil. Te mariyu pad sikandan te inged ne Iprata, migbaletikan e si Rakil wey miglehenan sikandin. <sup>17</sup>Te nabaybayaran e amana sikandin ka egkasakitan, migkahi ka mangnguyamu, "Kene ka kalaggew su lukes ded man-e ka anak nu." <sup>18</sup>Piru hapit e egkapatey si Rakil. Te egpalumbibigtew e sikandin, migngaranan din ki Bin-uni ka bate, piru Binhamin ka ingngaran te amey te bate.

 $^{19}$ Nakatapil iya si Rakil wey diye de sikandin ilebeng te dalan ne iggendiye te inged te Iprata (wey ke Bitlihim).  $^{20}$ Ne impes-ekan ni Hakub ka lebeng ni Rakil te batu ne talektek, ne diye ded kuntee.  $^{21}$ Migpabulus pad si Hakub ka miggipanew wey migtagtaheed pad mig-ugpe diye te limang te titikangi ne baley ne diye te Idir.

#### Ka me lukes ne anak ni Hakub

#### (1 Kru. 2:1-2)

<sup>22en</sup>Te diye pad mig-ugpe si Hakub te seeye ne inged, nakalibug si Rubin ki Bilha, ka duwey te amey rin ne uripen. Nataman, nakanengneng e si Hakub.

Sapulu wey daruwa (12) ka anak ni Hakub ne lukes. <sup>23</sup>Seini ka me lukes ne anak dan ki Liya—si Rubin (ka panganey ne anak ni Hakub), si Simyun, si Libi, si Huda, si Isakar, wey si Sabulun. <sup>24</sup>Seini man-e ka me lukes ne anak dan ki Rakil—si Husi wey si Binhamin. <sup>25</sup>Seini man-e ka me lukes ne anak dan ki Bilha, ka uripen ni Rakil—si Dan wey si Naptali. <sup>26</sup>Seini man-e ka me lukes ne anak dan ki Silpa, ka uripen ni Liya—si Gad wey si Asir. Sikandan sika ka me lukes ne anak ni Hakub ne miglesut diye te Padan-aram.

### Ka pegpatey ni Isaak

em. 35:15 Te Hibruwanen: "baley te Manama" ka kaluwasan te lalag ne "Bitil." en. 35:22: Hin 49:4.

<sup>27</sup>eo</sup>Te seeye ne timpu, nekeuli e si Hakub diye te amey rin ne si Isaak ne diye te Mamri, ne marani te Kiriyat-arba ne egngaranan ded degma te Hibrun. Ka seini ne inged mig-ugpaan dengan enni Abraham wey ni Isaak. <sup>28</sup>Te miggingume e te 180 ka idad ni Isaak, <sup>29</sup>migpatey e sikandin ne nabuyag e amana, wey ka gimukud din, diyad e degma te me apu din ne migpatey e. Ne insabal sikandin te me anak din, ne ensi Isaw wey si Hakub.

36

#### Ka me kabuhalan ni Isaw

(1 Kru. 1:34-37)

<sup>1</sup>Ne seini ka itulan te me kabuhalan ni Isaw (wey ke Idum). <sup>2ep</sup>Due daruwa ne mengebay ne matig-Kanaan ne in-asawa ni Isaw ne ensi Ada ne anak ni Ilun ne Hitihanen, wey si Uhulibama ne anak ni Ana wey apu ni Sibyun ne Hibihanen. <sup>3eq</sup>Due degma induwey ni Isaw ne anak ni Ismail ne anggam din ne egngaranan ki Basimat ne atebey ni Nibayut. <sup>4-5</sup>Seini ka me anak ni Isaw ne miglesut diye te Kanaan: si Ilipas ka anak dan ki Ada, si Riyuil ka anak dan ki Basimat, wey ensi Hiyus, si Halam, wey si Kura ka me anak dan degma ki Uhulibama.

<sup>6</sup>Nataman, impanguyan ni Isaw ka me asawa rin, me anak, me suluhuanen, me ayam, wey ka langun ne karatuan din ne nakuwa rin diye te Kanaan, wey migdiyu-diyu sikandin te hari rin ne si Hakub. <sup>7</sup>Su kenad egkaayun ne egpalemungey pad sikandan ka eg-ugpe tenged te subla ne dakel ne kasangkapan dan wey ka inged ne in-ugpaan dan kenad eleg tenged te kasalig te me ayam dan. <sup>8</sup>Sikan naa ka miggalin e ensi Isaw diye te me bubungan te Idumiya.

<sup>9</sup>Seini ka itulan te me kabuhalan ni Isaw ne migligkatan te me matig-Idumiya ne diye te bubungan te Siir. <sup>10-13</sup>Due lukes ne anak ni Isaw ki Ada ne egngaranan ki Ilipas. Ne si Ilipas, due lalimma ne anak din ne lukes: si Timan, si Umar, si Sipu, si Gatam, wey si Kinas. Duen pad si Amalik ne anak ne lukes ni Ilipas ki Timna, ka duwey rin ne uripen.

- eo. 35:27: Hin 13:18.
- ep. 36:2: Hin 26:34.
- eq. 36:3: Hin 28:9.

Due degma sabeka ne lukes ne anak ni Isaw ki Basimat ne egngaranan ki Riyuil. Ne si Riyuil, due hep-at ne anak din ne lukes: si Nahat, si Sira, si Sama, wey si Misa.

 $^{14}$ Due degma me lukes ne anak ni Isaw ki Uhulibama: si Hiyus, si Halam, wey si Kura. Si Uhulibama ka anak ni Ana ne apu ni Sibyun.

 $^{15}$ Seini ka me kabuhalan ni Isaw ne neyimu ne me pangulu te nalein-lein ne me tribu: si Timan, si Umar, si Sipu, si Kinas,  $^{16}$ si Kura, si Gatam, wey si Amalik. Me anak sikandan ni Ilipas ne panganey ne anak ni Isaw ki Ada. Ne diye sikandan nangugpe diye te inged te Idumiya.

<sup>17</sup>Ka me anak ni Riyuil ne anak ni Isaw ki Basimat, neyimu degma ne me pangulu. Sikandan ensi Nahat, si Sira, si Sama, wey si Misa. Nangugpe degma sikandan diye te inged te Idumiya.

 $^{18}$ Ne neyimu degma ne me pangulu ka me anak ni Isaw ki Uhulibama ne ensi Hiyus, si Halam, wey si Kura. Sikandan ka me apu ni Ana ne amey ni Uhulibama.  $^{19}$ Sikandan langun ka me kabuhalan ni Isaw (wey ke Idum) ne me pangulu te tribu ran.

#### Ka me kabuhalan ni Siir

(1 Kru. 1:38-42)

<sup>20</sup>Due mahinged diye te Idumiya ne si Siir ne Hurihanen. Seini ka ngaran te me anak din ne me lukes: si Lutan, si Subal, si Sibyun, si Ana, <sup>21</sup>si Disun, si Isir, wey si Disan. Neyimu sikandan ne me pangulu te me Hurihanen ne tribu diye te Idumiya. <sup>22</sup>Seini ka me lukes ne anak ni Lutan: si Huri wey si Himan. Ne atebey iya ni Lutan si Timna. <sup>23</sup>Seini man-e ka me lukes ne anak ni Subal: si Alban, si Manahat, si Ibal, si Sipu, wey si Unam. <sup>24</sup>Seini man-e ka me lukes ne anak ni Sibyun: si Aya wey si Ana. (Si Ana ka nakakita te meinit ne me sebseb ne diye te mammara ne inged ne kene egkeugpaan te migpepanabtab sikandin te me asnu te amey rin.) <sup>25</sup>Seini ka me anak ni Ana: si Disun ka lukes wey si Uhulibama ka malitan. <sup>26</sup>Seini man-e ka me lukes ne anak ni Disun: si Himdan, si Isban, si Itran, wey si Siran. <sup>27</sup>Seini man-e ka me lukes ne anak ni Disan: si Us wey si Aran. <sup>29</sup>Ka me pangulu te me Hurihanen ne tribu diye te Siir iyan ensi Lutan, si Subal, si Sibyun, si Ana, <sup>30</sup>si Disun, si Isir, wey si Disan ka me pangulu te me Hurihanen ne tribu ne mahinged diye te inged te Siir.

### Ka me Hari te Idumiya

(1 Kru. 1:43-54)

<sup>31</sup>Seini ka guhuren meyitenged te me Hari ne migmandu diye te Idumiya te ware pad Hari diye te inged te Israil. <sup>32</sup>Si Bila ne anak ni Biur ka migmandu diye te Idumiya ne migligkat te siyudad te Dinhaba. <sup>33</sup>Te pegpatey ni Bila, iyan nakasubal kandin te migmandu si Hubab ne anak ni Sira ne mahinged diye te Busra. <sup>34</sup>Te pegpatey degma ni Hubab, iyan e man-e nakasubal migmandu si Husam ne matig-Timan. <sup>35</sup>Te pegpatey degma ni Husam, iyan e man-e nakasubal migmandu si Hadad ne matig-Abit ne anak ni Bidad. Sikandin ka migpanalu te pegpabunbunuey ran te me matig-Midiyan diye te inged ne Muwab. <sup>36</sup>Te pegpatey degma ni Hadad, iyan e man-e nakasubal migmandu si Samla ne matig-Masrika. <sup>37</sup>Te pegpatey degma ni Samla, iyan e man-e nakasubal migmandu si Saul ne matig-Rihubut ne marani te Iyupratis ne weyig. <sup>38</sup>Te pegpatey degma ni Saul, iyan e man-e nakasubal migmandu si Baal-Hanan ne anak ni Akbur. <sup>39</sup>Te pegpatey degma ni Baal-Hanan, iyan e man-e nakasubal si Hadad ne matig-Pau. Due asawa ni Hadad ne si Mihitabil ne anak ni Matrid wey apu ni Misahab.

<sup>40</sup>Seini ka ngaran te me pangulu ne kabuhalan ni Isaw ne nangugpe diye te me inged ne impasangey kandan: si Timna, si Alba, si Hitit, <sup>41</sup>si Uhulibama, si Ila, si Pinun, <sup>42</sup>si Kinas, si Timan, si Mibsar, <sup>43</sup>si Magdiil, wey si Iram. Sikandan ka me pangulu ne kabuhalan ni Idum ne nangugpe diye te me inged ne impasangey kandan. (Si Idum ka dangeb ne ngaran ni Isaw, ka migligkatan te me matig-Idumiya.)

37

### Si Husi wey ka me kakey rin ne lukes

 $^{1}$ Ne migpalunggehaat si Hakub mig-ugpe diye te Kanaan ne mig-ugpaan te amey rin dengan.  $^{2}$ Ne seini ka guhuren meyitenged te me kabuhalan ni Hakub.

Te sapulu e wey pitu (17) ka idad ni Husi, migtanggu sikandin te me karniru wey me kambing duma te me kakey rin ne me lukes ne anak enni Bilha wey ni Silpa, ka daruwa ne uripen ne asawa te amey rin. Ne innangen ni Husi diye te amey rin ka maddeet ne eggimuwen te me kakey rin.

<sup>3</sup>Ne si Husi ka indakelan te geyinawa ni Hakub te langun ne me anak din su miglesut sikandin te nabuyag e si Hakub. Sikan naa ka imbehayan din si Husi te malayat ne kumbale ne due belad. <sup>4</sup>Piru te nakita te me kakey ni Husi ne sikandin ka amana indakelan te amey ran, nalangetan sikandan ki Husi wey warad lalag dan diye te kandin ne meupiya.

<sup>5</sup>Te sabeka ne karusileman, nakataheinep si Husi. Nataman, impangguhuran din ka me kakey rin, ne puun due, subla pad ne nalangetan sikandan kandin. <sup>6</sup>Migkahiyan din sikandan, "Pammineg kew su due taheinep ku. <sup>7</sup>Migpamagkes ki kun te me trigu diye te kamet, ne dutu, migsasindeg kun ka binagkes ku wey inlingutan te me binagkes niyu ne mig-unduk diye te keddiey ne binagkes."

<sup>8</sup>Ne migkahiyan si Husi te me kakey rin, "Ew, kahiyen nu buwa ne egkeyimu ka ne Hari wey egmandu kanami?" Ne subla pad ne nalangetan sikandan kandin tenged te taheinep din wey te guhuren din.

<sup>9</sup>Nataman, nakataheinep e man-e si Husi wey impangguhuran din e man-e ka me kakey rin. Migkahi sikandin, "Nakataheinep ad man-e. Ne diye te taheinep ku, nakita ku kun ka aldew, ka bulan, wey ka sapulu wey sabeka (11) ne bituen ne miglangkeb kun diye te tangkaan ku."

<sup>10</sup>Piru te pegpangguhud din diye te amey rin wey te me kakey rin, indew-ey sikandin te amey rin ne migkahi, "Nekey-a ka igpasabut nu te sika ne taheinep? Ka iney nu naa, ka me kakey nu wey sikeddi, egdani-rani ne eglangkeb diye te tangkaan nu?" <sup>11er</sup>Ingkasekel si Husi te me kakey rin, piru ware naawe diye te suman-suman te amey ni Husi ka guhuren din.

### Ka pegbelegye ki Husi te me kakey rin

<sup>12</sup>Sabeka ne aldew, miggendiye ka me kakey ni Husi te Sikim eyew egpepanabtab te me ayam te amey ran. <sup>13</sup>Ne migkahiyan ni Hakub si Husi, "Egpasundulen ku sikeykew te me kakey nu ne diye te Sikim ka egpepanabtab te me ayam ta."

Ne migtabak si Husi, "Uya, ame."

<sup>14</sup>Ne migkahiyan pad man-e sikandin te amey rin, "Hendiye ka kuntee. Leuya nu ka me kakey nu ke ware ded neyitabu kandan wey te me ayam. Egkataman, uli ka kayi wey guhuri a." Sikan naa ka impaligkat e si Husi te amey rin diye te napu te Hibrun.

er. 37:11: Him 7:9.

Te pegginguma rin diye te Sikim, <sup>15</sup>due etew ne nakakita kandin te migleug-leug pad diye te me kamet. Mig-insaan sikandin te etew, "Nekey-a ka egpammitawen nu?"

<sup>16</sup>Ne migtabak si Husi, "Egpammitew a te me kakey ku. Kema ke nakanengneng ka ke hendei sikandan migpepanabtab te me ayam ney?"

 $^{17}$ Ne migtabak ka etew, "Warad e sikandan kayi. Narineg ku ne eggendiye kun sikandan te Dutan." Sikan naa ka insundul e ni Husi ka me kakey rin, wey nakita rin sikandan diye te Dutan.

 $^{18}\mathrm{Te}$  madmariyu pad si Husi, nakita ran e sikandin. Te ware pad nekeuma sikandin, miglelalis e sikandan ne eggimatey kandin.  $^{19}\mathrm{Migpalalahey}$  sikandan, "Sikan e ka mapanpannaheinep.  $^{20}\mathrm{Na}$ , kuntee eggimatayan ta sikandin wey eguluhen ta ka lawa rin kayi te belun. Egkataman, egkahi ki re te indawi sikandin te dakel ne mahintalunan. Pitawen ta ke egkatuman pad ka me taheinep din."

<sup>21</sup>Piru te pegkarineg ni Rubin dutu, egpangabangan din perem si Husi wey migkahi, "Kene te re eggimatayan sikandin. <sup>22</sup>Kene te re egpalangeseen su eguluhen te re sikandin te belun kayi te inged ne ware mahinged. Piru kene niyu re himatayi sikandin." Su nakasuman-suman si Rubin ne egpangabangan din si Husi wey iglibed din ded diye te amey rin. <sup>23</sup>Te nekeume e si Husi diye te me kakey rin, impehes dan luunga ka malayat ne kumbale din ne binelaran. <sup>24</sup>Miggen-genan dan si Husi wey in-ulug dan e diye te belun ne warad weyig.

<sup>25</sup>Nataman, naminnuu e sikandan eyew egkeen. Ne dutu, due nakita ran ne me etew ne mig-untud te me kamilyu. Me Ismailita seeye ne migdurulan te me peemut wey me peemis ne migligkat diye te Giliad wey igpeendiye te Ihiptu. <sup>26</sup>Ne migkahiyan ni Huda ka me suled din, "Nekey naa ka egkaangey ta ke eggimatayan ta ka hari ta wey iggeles ta ka pegpatey rin? <sup>27</sup>Meupiya pad ke igbelegye ta sikandin te me Ismailita. Kene te re eggimatayan sikandin su kene pad iya egkahuhud ne hari ta sikandin." Ne nabennalan ka me suled din. <sup>28es</sup>Te eglihad e ka me Ismailita ne nigusyanti ne matig-Midiyan, ingkuwa te me suled din si Husi diye te belun wey imbelegye dan sikandin diye te me Ismailita te daruwa ne pulu (20) ne pelata ne mahal. Nataman, impehes e uyana si Husi te me Ismailita diye te Ihiptu.

<sup>29</sup>Te ware de naluhey, miglibed si Rubin diye te belun wey nakita rin ne warad e si Husi diye. Seeye de iya, inggisi din e ka kumbale din tenged te laggew rin. <sup>30</sup>Miglibed sikandin diye te me suled din ne migkahi, "Warad si Husi! Nekey naan e ka eggimuwen ku?"

es. 37:28: Him 7:9.

 $^{31}$ Ne miggimatey sikandan te kambing wey in-eled dan te langesa ka kumbale ni Husi.  $^{32}$ In-uyan dan ka kumbale ni Husi diye te amey ran wey migkahi, "Nakita ney seini. Pitawa nu ke kumbale naa ni Husi seini wey se kene."

<sup>33</sup>Neila te amey ran ka kumbale wey migkahi, "Kumbale din iya sika! Etuwey, miggimatayan bes si Husi te mabulut ne mahintalunan! Indeesan bes e iya mule ka lawa rin!" <sup>34</sup>Ne inggisi ni Hakub ka kumbale din wey migsaluub sikandin te saku te pegpeila ne miglungku sikandin. Naluhey sikandin ka miglungku tenged te pegkapatey te anak din. <sup>35</sup>Inliwang sikandin te langun ne me anak, piru migapul sikandin ne migkahi, "Balahara a nikaniyu! Eglungku a taman te egkapatey ad wey egpakasundul ad kandin diye te Hadis ne inged te me gimukud." Ne migsinehawan e man-e nikandin si Husi.

<sup>36</sup>Ne ensi Husi degma, nekeume e sikandan diye te Ihiptu wey imbelegye e sikandin te me matig-Midiyan diye ki Putipar. Sikandin ka sabeka ne upisyal wey ahalen te me talagtameng te palasyu te Hari te Ihiptu.

38

#### Si Huda wey si Tamar

<sup>1</sup>Te seeye ne timpu, mig-awe e si Huda diye te me suled din wey diyad e miglemung sikandin ki Hira te matig-Adulam. <sup>2</sup>Ne diye nakakita si Huda te mengebay ne anak ni Sua ne matig-Kanaan, wey in-asawa rin e. <sup>3</sup>Nataman, naberes e ka asawa rin wey nakaanak e te lukes, wey migngaranan ni Huda ka bate ki Ir. <sup>4</sup>Nataman, naberes e man-e ka asawa rin wey lukes ded man-e ka anak din. Migngaranan din ka bate ki Unan. <sup>5</sup>Nataman, nakaanak e man-e sikandin te lukes wey migngaranan din ka bate ki Sila. Diye ensi Huda te Kisib te peglesut ni Sila.

<sup>6</sup>Ne migtulin e si Ir, ka panganey ne anak ni Huda, wey impaasawa rin e te mengebay ne egngaranan ki Tamar. <sup>7</sup>Piru mareet ka batasan ni Ir diye te tangkaan te Magbebaye ne Manama. Sikan naa ka miggimatayan sikandin te Magbebaye ne Manama. <sup>8</sup>Ne migkahiyan ni Huda si Unan ne hari ni Ir, "Keilangan ne egpamaluwen nu si Tamar sumale te batasan ta eyew duen ded anak te kakey nu ne migpatey e." <sup>9</sup>Piru nakanengneng si Unan ne kene ne kandin ka panganey ne anak dan ke eglesut. Sikan naa, mesi eggulid e sikandin ki Tamar, igpalihawang din ka muntus din su eyew kene egpakaanak sikandin te anak te kakey rin. <sup>10</sup>Piru

ingkeepes te Magbebaye ne Manama ka himu rin. Sikan naa ka miggimatayan ded degma te Magbebaye ne Manama si Unan. <sup>11</sup>Ne migkahiyan ni Huda ka ambey rin ne si Tamar, "Uli ke pa diye te amey nu wey igpepamalu ku red sikeykew ke egkanakan e si Sila." Piru inlalag de seeye ni Huda ki Tamar su naaldek sikandin ne egpatey red si Sila iling te daruwa ne kakey rin ke egpamaluwen din ded si Tamar. Sikan naa ka nekeuli pad iya si Tamar diye te amey rin.

<sup>12</sup>Te pile e ne leg-un ka miglihad, migpatey e ka asawa ni Huda. Te natuman e ka peglungku ni Huda, miggendiye sikandin te Timna duma te alukuy rin ne si Hira ne matig-Adulam eyew egpangabulug te me karniru rin. <sup>13</sup>Ne due nakahuhud ki Tamar ne miggipanew e ka anuhang din ne eggendiye te Timna eyew te pegtabulug te me karniru rin. <sup>14</sup>Te sikan de, inliwanan din e ka insaluub din ne manggad te pegkabalu wey imbunbunan din ka ulaula rin eyew ware egpekeila kandin. Nataman, diye migpinpinnuu sikandin te gumawan te Inaim, ka lungsud ne diye te dalan te iggendiye te Timna. Su nakatahe e si Tamar ne kanakan e si Sila, piru ware pamaluwa sikandin.

<sup>15</sup>Te pegkakita ni Huda ki Tamar, kahiyen din ne egpabaley-baley ne malitan su imbunbunan ma ni Tamar ka ulaula rin. <sup>16</sup>Indugpu sikandin ni Huda diye te ilis te dalan wey migkahiyan, "Apas kad su egpewulirey ki." Su ware nekeila si Huda ne ambey rin bes seeye.

Ne migtabak si Tamar, "Nekey-a ka igbayad nu keddi?"

<sup>17</sup>Migtabak si Huda, "Egpeuyanan ku sikeykew te nati te kambing ne migligkat te me ayam ku."

Mig-inse si Tamar, "Nekey-a ka igkagerentiya nu keddi taman te igpeuyan nud seini?"

<sup>18</sup>Migtabak si Huda, "Nekey-a ka igkeupii nu ne iggerentiya ku?"

Migkahi si Tamar, "Ka imbebalieg nu ne due igpirma wey ka tuked ne inggen-genan nu." Sikan naa ka imbehey rin e ki Tamar ka inggerentiya rin wey migguliran din e sikandin. Nataman, naberes e si Tamar. <sup>19</sup>Ne mig-uli e si Tamar wey inluung din e ka imbunbun din te ulaula rin. Ne insaluub din e man-e ka manggad te pegkabalu.

<sup>20</sup>Nataman, impeuyan e ni Huda ki Hira ne alukuy rin ka nati te kambing diye te malitan, wey igpaawi e ka inggerentiya rin. Piru ware nakita ni Hira ka malitan. <sup>21</sup>Ne migpanginse si Hira te mahinged diye te Inaim, "Hendeid naa ka egpabaley-baley ne malitan ne migpinpinnuu kayi te lenged te dalan?"

Ne migtabak sikandan, "Ware egpabaley-baley ne malitan kayi."

<sup>22</sup>Purisu miglibed e sikandin diye te ki Huda ne migkahi, "Ware ku nakita ka malitan wey migkahiyan a te mahinged ne ware kun egpabaley-baley ne malitan diye te kandan."

<sup>23</sup>Ne migkahi si Huda, "Balahad e, kandin e seeye su kema ke egngisiyan ki te me etew ke eglibed ki diye ka egpammitew. Maa su impeuyanan kud sikandin te kambing piru ware nu ma kitaa sikandin."

<sup>24</sup>Te peglihad te tatelu ne bulan, nahuhuran si Huda ne egpabaley-baley e ka ambey rin ne si Tamar wey naberes e. Ne migkahi si Huda, "Uyana niyu sikandin diye te lihawangan wey silabi niyu sikandin."

<sup>25</sup>Piru te peg-uyan e ki Tamar eyew eggimatayan e, migpanaha-taha sikandin diye te anuhang din ne migkahi, "Ka kamuney te seini ne balieg ne due igpirma wey ka tuked, iyan nakaberes keddi. Menua, neila nu seini?"

<sup>26</sup>Neila ni Huda ne kandin seeye, purisu migkahi e sikandin, "Matareng pad sikandin kuntere keddiey, su ware kud sikandin ipepamalu te anak ku ne si Sila." Ne warad miggulid sikandin ki Tamar.

<sup>27</sup>Ne miggingume e ka timpu ne eglesutan e si Tamar wey migseseppingan sikandin. <sup>28</sup>Te migbaletikan e sikandin, impalihawang te sabeka ne bate ka belad din wey miggiketan e seeye te mangnguyamu te lanut ne malalab-lalab. Migkahi ka mangnguyamu, "Seini ka egpekewun-a eglesut." <sup>29</sup>Piru inggusud te bate ka belad din wey iyan e nekewun-a nakalesut ka sepping din. Migkahi ka mangnguyamu, "Ingkeyis din bes ka sepping din!" Sikan naa ka migngaranan sikandin ki Piris. <sup>et 30</sup>Nataman, namewuri e nakalesut ka sepping din ne due lanut ne malalab-lalab ne inniket diye te belad din. Migngaranan sikandin ki Sira. <sup>eu</sup>

# 39

#### Si Husi wey ka asawa ni Putipar

<sup>1</sup>Ne si Husi, in-uyan e sikandin te me Ismailita diye te Ihiptu. Imbeli e sikandin ni Putipar ne sabeka ne upisyal te Hari te Ihiptu wey ahalen te me talagtameng te palasyu. <sup>2ev</sup>Migdumaan iya te Magbebaye ne Manama si Husi wey migbulig kandin te langun. Diye mig-ugpe sikandin te baley te ahalen din ne

- et. 38:29 Te Hibruwanen: "egkeyis" ka kaluwasan te lalag ne "Piris."
- eu. 38:30 Te Hibruwanen: "malalab" ka kaluwasan te lalag ne "Sira."
- ev. 39:2: Him 7:9.

matig-Ihiptu. <sup>3</sup>Nakita ni Putipar ne migdumaan te Magbebaye ne Manama si Husi wey migbulihan sikandin te langun ne miggimu rin. <sup>4</sup>Sikan naa ka ingkabennali rin si Husi. Impiyalan din si Husi diye te baley rin wey te langun ne karatuan din. <sup>5</sup>Ligkat te seeye ne timpu, impanalanginan te Magbebaye ne Manama si Putipar tenged ki Husi. Impanalanginan te Magbebaye ne Manama ka langun ne ki Putipar, ka diye te baley rin wey ka diye te me kamet din. <sup>6</sup>Impiyal ni Putipar ka langun ki Husi, wey tenged kandin, warad e lein ne igkasasew rin su ka keenen din naan de iya.

Ne mateles wey makeseg-keseg ne kanakan si Husi. <sup>7</sup>Te ware naluhey, naalihan kandin ka asawa ni Putipar ne migkahi, "Egpewulirey ki." <sup>8</sup>Piru mig-apul si Husi ne migtabak, "Impiyalan a te ahalen ku te langun kayi te baley wey warad e igkabantali rin su kayi ad. <sup>9</sup>Nekeg-iling ka katenged ney te seini ne baley, wey impiyal rin keddi ka langun gawas keykew su asawa ke ma nikandin. Purisu, kena a egpekeyimu te sika ne dereeti ne himu, wey kena a egkeupian ne egpakasale te Manama." <sup>10</sup>Minsan tagse aldew ne egginggaten te asawa ni Putipar si Husi eyew egpewulirey sikandan, piru warad iya sikandin migparuma-ruma.

<sup>11</sup>Piru te sabeka ne aldew, migseled si Husi diye te baley eyew te eggimu diye, wey nakasalengan seeye te ware duma rin ne me suluhuanen. <sup>12</sup>Ne dutu, miggen-genan te asawa ni Putipar ka kumbale ni Husi te migkahi, "Na, huliri a kunteel" Te sikan de, migpallahuy e si Husi ne miglihawang te baley, piru nahaat ka kumbale din ne nahen-genan te malitan. <sup>13</sup>Te nakita te malitan ka kumbale ne nahen-genan din su neengkeran ni Husi te migpallahuy ka miglihawang, <sup>14</sup>in-umew rin e ka me lukes ne suluhuanen dan wey migkahi, "Pitew kew! Egpeyilawan ki te Hibruwanen ne in-uyan te asawa ku kayi te kanta. Migseled sikandin kayi te sinabeng ku eyew egleheng perem keddi, piru migpanguleyi a. <sup>15</sup>Te nasahimanu rin ne migpanguleyi a, migpallahuy e sikandin wey neengkeran din e seini se kumbale din."

<sup>16</sup>Ne intetahu te malitan ka kumbale ni Husi taman te nekeuli e ka asawa rin. <sup>17</sup>Ne migkahiyan din e ka asawa rin ne si Putipar, "Sika se uripen ne Hibruwanen ne in-uyan nu kayi te kanta, migseled sikandin te sinabeng ku eyew eglehengen a perem, <sup>18</sup>piru migpanguleyi a. Te sikan de, migpallahuy e sikandin ka miglihawang wey neengkeran din ka kumbale din kayi te keddi."

<sup>19</sup>Te pegkarineg te ahalen ni Husi te guhuren te asawa rin, nangebel-ebel e se langet din. <sup>20</sup>Imparakep din si Husi wey impalemung diye te impamirisu te

Hari te Ihiptu. <sup>21</sup>ewPiru tenged te indumaan wey ingkeyid-u si Husi te Magbebaye ne Manama, ingkabennali sikandin te talagtameng te prisuwan. <sup>22</sup>Sikan naa ka impiyal te talagtameng ki Husi ka katenged te egtanggu te langun ne naprisu wey te langun ne eggimuwen seled te prisuwan. <sup>23</sup>Warad nabantali ka talagtameng te prisuwan te impiyal rin ki Husi su indumaan ma sikandin te Magbebaye ne Manama, wey imbulihan sikandin te langun ne eggimuwen din.

# 40

#### Ka pegguhud ni Husi te kaluwasan te taheinep te daruwa ne pinirisu

<sup>1</sup>Te pile e ne leg-un ka miglihad, due talag-itis te binu wey talaggilutu te paan te Hari te Ihiptu ne nakasale diye te kandin. <sup>2</sup>Ne nabelu sikandin te sika se daruwa ne upisyal, <sup>3</sup>wey impaprisu rin sikandan diye te prisuwan te ahalen te me talagtameng ne diye degma prisuwa si Husi. <sup>4</sup>Naluhey sikandan ka naprisu, wey si Husi ka impatanggu kandan te ahalen te talagtameng.

<sup>5</sup>Te sabeka ne karusileman, nakataheinep diye te prisuwan ka talag-itis te binu wey ka talaggilutu te paan, wey tagse taheinep dan due kaluwasan. <sup>6</sup>Te pegleuy ni Husi kandan te maselem, nakita rin ne nalaggew sikandan. <sup>7</sup>Sikan naa ka mig-insaan din sikandan, "Mania te mabehat-behat ka ulaula niyu kuntee?"

<sup>8</sup>Migtabak sikandan, "Due me taheinep ney, piru ware egpakanangen kanami te kaluwasan."

Ne migtabak si Husi, "Ka Manama re ka egpakaluwas te me taheinep. Ne kun la, nangeni a te taheinep niyu."

<sup>9</sup>Migpangguhud ka talag-itis te binu te taheinep din. Migkahi sikandin, "Diye te taheinep ku, due nakita ku ne sabeka ne pinamula ne paras diye te tangkaan ku. <sup>10</sup>Due tatelu ne sugpang te seeye ne paras ne migpangabukad wey migpamehas wey sahuhune ne neyinuhan seeye. <sup>11</sup>Kayi kun te belad ku ka ubab te Hari te Ihiptu. Sikan naa ka migpupu a te me behas wey ingkeles ku seini diye te ubab din. Nataman, imbehey ku ka ubab diye te Hari."

<sup>12</sup>Ne migkahi si Husi, "Seini ka kaluwasan te taheinep nu: ka tatelu ne sugpang iyan igpasabut se tatelu ne aldew. <sup>13</sup>Te ikatelu ne aldew, egpalekaan kad te Hari te Ihiptu wey egpasayluwen ka nikandin. Igpalibed ka nikandin diye te katungdanan nu dengan ne talag-itis te kandin ne binu. <sup>14</sup>Piru kena a kalingawi

ew. 39:21: Him 7:9.

nikeykew ke meupiye e ka peg-ugpe nu. Ikeyid-u a nikeykew wey kahii nu ka Hari te Ihiptu meyitenged keddi eyew egpalekaan ad e nikandin. <sup>15</sup>Su impepehes e re uyana kayi puun diye te inged ney te me Hibruwanen, wey kene eleg ne egprisuwen a nikandan kayi su wara a nakasale."

<sup>16</sup>Ne nakarineg ka talaggilutu te paan ne meupiya ka kaluwasan te taheinep te duma rin. Purisu, migkahiyan din si Husi, "Due degma taheinep ku. Diye te taheinep ku, duen kun tatelu ne nihu ne paan ne in-utuk ku. <sup>17</sup>Ka kinaribabewan kun, due nakalkalasi ne me paan ne para te Hari te Ihiptu, piru ingkeen seeye te me manuk-manuk." <sup>18</sup>Migtabak si Husi, "Seini ka kaluwasan te taheinep nu: ka tatelu ne nihu iyan igpasabut se tatelu ne aldew. <sup>19</sup>Te ikatelu ne aldew, egpatamperan ka te Hari te lieg nu wey egbitinen e ka lawa nu diye te kayu wey egkeenen te me manuk-manuk ka sapu nu."

<sup>20</sup>Te igkatelu e ne aldew, migpasahakeen ka Hari te Ihiptu para te me upisyal din tenged su sika ka aldew te pegkeetew rin. Impalekaan din ka talagitis te kandin ne binu wey ka talaggilutu te paan wey impeuyan din sikandan diye te tangkaan din. <sup>21</sup>Impalibed din ka talag-itis te binu te katungdanan din dengan, <sup>22</sup>piru migpeyimatayan din ka talaggilutu te paan sumale te innangen ni Husi kandan. <sup>23</sup>Piru nalingawan te talag-itis te binu si Husi.

### 41

#### Ka pegluwas ni Husi te taheinep te Hari te Ihiptu

¹Te daruwe e ne leg-un ka miglihad, nakataheinep ka Hari te Ihiptu ne migsasindeg kun sikandin diye te ilis te Weyig ne Nilu. ²Duen kun pitu ne me baka ne mallambeg wey mateles se peglelawa ne miggakap puun te weyig wey migpanabtab e te me hilamunen diye te ilis. ³Ne duen e man-e pitu ne baka ne maggase wey me kurulen ne miggakap puun te weyig. Migdani-rani sikandan te me mallambeg ne baka diye te ilis te weyig. ⁴Nataman, impangeen dan e ka mallambeg wey mateles se peglelawa! Te sikan de, napukew e ka Hari te Ihiptu. ⁵Te ware de naluhey, nakalipereng e man-e ka Hari te Ihiptu wey nakataheinep e man-e sikandin. Diye te taheinep din, nakita rin ka sabeka ne lawa te aheley ne migpamehas te pitu ne bahal ne meupiya se behas wey derakel. ⁶Sahuhune ne due man-e nakalepew ne pitu ne bahal te aheley diye te sikan ded ne lawa, piru mareet wey nangiles e ka behas tenged te meinit ne kalamag puun te igsile.

<sup>7</sup>Nataman, in-ameluk e te nangiles ka derakel! Te sikan de, napukew e ka Hari te Ihiptu wey natahaan din ne taheinep din bes de seeye. <sup>8ex</sup>Te peg-enew te Hari te Ihiptu te maselem, nabantalan sikandin. Sikan naa ka impeumew rin ka langun ne egmahehane diye te Ihiptu wey ka langun ne matagseb ne me etew. Ne impangguhuran din e sikandan te me taheinep din, piru ware sabeka kandan ne nakanangen te kaluwasan dutu.

<sup>9</sup>Nataman, migkahiyan te talag-itis te binu ka Hari te Ihiptu, "Kuntee, nasuman-suman ku ka seyyup ku. <sup>10</sup>Dengan, nabelu ka kanami te me suluhuanen nu, ne sikeddi wey ka pangulu te talaggilutu te paan, impaprisu key nikeykew diye te baley te ahalen te me talagtameng. <sup>11</sup>Te sabeka ne karusileman, nakataheinep key se daruwa wey lein-lein ka kaluwasan te taheinep ney. <sup>12</sup>Ne diye degma te prisuwan, due sabeka ne kanakan ne Hibruwanen ne uripen te ahalen te me talagtameng. Impangguhuran ney sikandin te me taheinep ney wey innangen din ka tagse kaluwasan te taheinep ney. <sup>13</sup>Ne natuman iya ka langun sumale te innangen din kanami. Impalibed a nikeykew te katungdanan ku wey impabitin nu ka talaggilutu te paan."

<sup>14</sup>Sikan naa ka impeumew te Hari te Ihiptu si Husi, wey indagdahawan dan palihawanga sikandin te prisuwan. Migdagdahew si Husi migpanumpe wey miggimmimasad, ne miggendiyad te tangkaan te Hari te Ihiptu. <sup>15</sup>Ne migkahiyan te Hari te Ihiptu si Husi, "Due taheinep ku piru ware nakanangen keddi te kaluwasan kayi. Nahuhuran a ne egpakaluwas ke kun te me taheinep."

<sup>16</sup>Ne migtabak si Husi, "Kene ne sikeddi ka egpakaluwas, Mahal ne Hari. Ka Manama ka egnangen keykew te kaluwasan te taheinep nu."

<sup>17</sup>Ne migkahi ka Hari te Ihiptu, "Nakataheinep a ne migsasindeg e kun diye te ilis te Weyig ne Nilu. <sup>18</sup>Due pitu ne baka ne mallambeg wey mateles se peglelawa ne miggakap puun te weyig wey migpanabtab e te me hilamunen diye te ilis. <sup>19</sup>Ne duen e man-e pitu ne baka ne maggase wey me kurulen ne miggakap puun te weyig. Ware e re due nakakita te iling dutu ne baka kayi te Ihiptu. <sup>20</sup>Ne impangeen e te maggase wey me kurulen ne baka ka mallambeg. <sup>21</sup>Piru kene egkeilaan ne nakakeen e sikandan, su maggase man ded wey hendue te ware nakakeen. Seeye de iya ne napukew ad. <sup>22</sup>Nakataheinep ad man-e ne duen kun nakita ku ne sabeka ne lawa te aheley ne migpamehas te pitu ne bahal ne meupiya se behas wey derakel. <sup>23</sup>Sahuhune ne due man-e nakalepew ne pitu ne bahal te aheley diye te sikan ded ne lawa, piru mareet ka behas wey migpangiles tenged te

ex. 41:8: Dan 2:2.

meinit ne kalamag puun te igsile. <sup>24</sup>Nataman, in-ameluk e te nangiles ka derakel! Impangguhud kud e seini te egmahehane, piru ware minsan sabeka kandan ne nakanangen keddi te kaluwasan kayi."

<sup>25</sup>Ne migkahiyan ni Husi ka Hari te Ihiptu, "Nekeg-iling de ka kaluwasan te daruwa ne taheinep nu, Mahal ne Hari. Impakita keykew te Manama ka eggimuwen din keureme. <sup>26</sup>Nekeg-iling ne pitu ne leg-un ka igpasabut te pitu ne baka ne mallambeg wey ka pitu ne bahal te aheley ne meupiya. <sup>27</sup>Nekeg-iling ne pitu ne leg-un te bitil ka igpasabut te pitu ne baka ne maggase ne miglepew, wey ka pitu ne bahal te aheley ne mareet wey nangiles se behas tenged te meinit ne kalamag puun te igsile. <sup>28</sup>Sumale te ingkahi ku keykew, Mahal ne Hari, impakita te Manama keykew ka eggimuwen din keureme. <sup>29</sup>Egginguma ka pitu ne leg-un ne matubung amana ka intiru ne inged te Ihiptu. <sup>30</sup>Piru egpakasubal ka pitu ne leg-un ne bitil wey egkalingawan e te me etew ka miglihad ne katubung, tenged su egkabitil e ka intiru ne Ihiptu. <sup>31</sup>Ne kenad egkasuman-suman ka me timpu ne matubung pad, tenged su egkasublaan e ka bitil ne egpakasubal. <sup>32</sup>Impataheinep ka te kararuwa, Mahal ne Hari, su eyew egkatahaan nu ne intahahe e seini te Manama ne eggimuwen din, wey egkeyitabu iya seini te kene egkaluhey.

<sup>33</sup>"Sikan naa, alam ka te etew ne malayat se suman-suman wey matagseb ne egpiyalan nu te intiru ne Ihiptu. <sup>34</sup>Alam ka te me upisyal kayi ne egpanguwa te igkalimma ne baad te langun ne eg-uma kayi seled te pitu ne leg-un ne egmatubung pad ka Ihiptu. <sup>35</sup>Ipalimud nu kandan ka egkakuwa ran ne baad te langun ne eg-uma seled te seeye ne me leg-un. Ne pinaahi te keykew ne katenged, ipatahu nu naa diye te me siyudad ka egkalimud dan wey patamengi nu kandan. <sup>36</sup>Igtahahe te langun ne etew ka sika ne egkakeen te egpakasubal ne pitu ne leg-un ne bitil kayi te Ihiptu, su eyew kene egkapatey ka me etew te gutas."

### Ka pegpiyal ki Husi te inged ne Ihiptu

 $^{37}$ Ne nabennalan ka Hari te Ihiptu wey ka me upisyal din te inlalag ni Husi.  $^{38}$ Ne migkahiyan sikandan te Hari te Ihiptu, "Kene ki egpakakita te duma ne etew iling ki Husi ne due Panisingan te Manama."  $^{39}$ Seeye naa, migkahiyan te Hari te Ihiptu si Husi, "Tenged su ka Manama ma ka migpanengneng keykew te langun ne innangen nu, ware etew ne malayat se suman-suman wey matagseb ne egpekeiling keykew.  $^{40}$ eyEgpiyalan ku sikeykew te palasyu ku, wey egtumanen te

ey. 41:40: Him 7:10.

langun ne sakup ku ka me suhu nu. Labew e re keykew tenged su Hari a. <sup>41</sup>Kuntee, egpiyalan ku sikeykew kayi te intiru ne inged te Ihiptu." <sup>42ez</sup>Ne inluung te Hari te Ihiptu ka sising din ne igpirma wey insaluub din e te kemel ni Husi. Insaluuban din man-e si Husi te mateles ne kumbale wey balieg ne bulawan. <sup>43</sup>Impeunturan man-e te Hari te Ihiptu ki Husi ka igkarangeb ne karwahi rin, wey due egguna kandin ne egpangpanguleyi ka egkahi, "Panimbuel kew kandin!" Seeye naa, impiyalan e si Husi te intiru ne inged te Ihiptu. <sup>44</sup>Migkahiyan man-e te Hari te Ihiptu si Husi, "Sikeddi ka Hari. Ware etew kayi te intiru ne inged te Ihiptu ne egpekeyimu te minsan nekey ke kene ka egkabennalan." <sup>45</sup>Migngaranan din e si Husi ki Sapinat-paniya. <sup>fa</sup> Ne impaasawaan din si Husi ki Asinat ne anak ni Putipira ne talagpanubad diye te Un. Ne inlingut e ni Husi te egleuy ka intiru ne inged te Ihiptu isip impiyalan kayi.

<sup>46</sup>Ne tatelu e ne pulu (30) ka idad ni Husi te migbunsud sikandin ne migpamakey te Hari te Ihiptu. Sikan naa, mig-awe si Husi diye te palasyu wey inlingut din te egleuy ka intiru ne inged te Ihiptu. <sup>47</sup>Nekey naan iya te seled te pitu ne leg-un, dakel amana ka mig-uma diye te me kamet. <sup>48</sup>Te seeye ne me leg-un, impepanlimud ni Husi ka baad te langun ne mig-uma diye te Ihiptu wey impatines e diye te me siyudad. Impatines din diye te tagse siyudad ka baad te mig-uma te me kamet ne nakalingut. <sup>49</sup>Nataman, dakel e amana ka nalimud ni Husi ne egkakeen wey ware din e seela ka nalimud din, su suble e ne dakel ne nekeiling e te lelanek diye te ilis te dahat.

<sup>50</sup>Te ware pad migginguma ka bitil, nakaanak te daruwa ne lukes ensi Husi wey Asinat ne anak ni Putipira ne talagpanubad diye te Un. <sup>51</sup>Migngaranan ni Husi ka panganey ki Manasis,<sup>fb</sup> su migkahi sikandin, "Impalingawan e te Manama keddi ka langun ne keyirapan ku dengan wey ka pegkaalimengawi ku te pamilya ku." <sup>52</sup>Migngaranan din ka inggiba ki Ipraim,<sup>fc</sup> su migkahi sikandin, "Impaanak a te Manama te seini ne inged ne neyirapan a dengan."

 $^{53}$ Nataman, napenge e ka pitu ne leg-un ne matubung amana diye te Ihiptu,  $^{54 \rm fd}$ wey nakasubal e ka pitu ne leg-un ne bitil, sumale te innangen ni Husi. Te

- ez. 41:42: Dan 5:29.
- fa. 41:45 Te Ihiptuhanen: "eglalag wey neuyag pad ka Manama" ka kaluwasan te lalag ne "Sapinat-paniya."
- fb. 41:51 Te Hibruwanen: "pegpalingew" ka kaluwasan te lalag ne "Manasis."
- fc. 41:52 Te Hibruwanen: "egpaanak" ka kaluwasan te lalag ne "Ipraim."
- fd. 41:54: Him 7:11.

seeye ne timpu, due bitil diye te duma ne me inged. Piru diye te Ihiptu, dakel mule ka egkakeen. <sup>55fe</sup>Nataman, nabitil e degma ka me matig-Ihiptu wey migbuyu sikandan te egkakeen diye te Hari te Ihiptu. Ne migkahi ka Hari, "Pangendiye kew ki Husi. Tumana niyu naa ka igkahi rin kaniyu." <sup>56</sup>Ne neempet e nabitil ka intiru ne Ihiptu, wey impalukatan e ni Husi ka langun ne inlimuran te egkakeen wey impamelegye e ka egkakeen diye te me matig-Ihiptu. <sup>57</sup>Ka me etew te lein-lein ne me nasud, nangendiye te Ihiptu eyew egbeli te egkakeen diye te ki Husi, su nabitil ne masumpit ka minsan hendei ne inged.

### 42

#### Ka peggendiye te me suled ni Husi te Ihiptu

<sup>1</sup>Te seeye ne timpu, nakarineg si Hakub ne dakel ka egkakeen diye te Ihiptu. Sikan naa ka ingkahiyan din ka me anak din, "Mania te egmatengtengey kew re due? <sup>2ff</sup>Su due narineg ku ne dakel kun ka egkakeen diye te Ihiptu. Na, hendiye kew wey beli kew te egkakeen su eyew kene ki egkapatey te gutas." <sup>3</sup>Sikan naa ka miggendiye te Ihiptu ka sapulu ne kakey ni Husi eyew egbeli te egkakeen. <sup>4</sup>Piru ware iparuma ni Hakub ka hari ni Husi ne si Binhamin, su napanseb sikandin kema ke due egkeyitabu kandin.

<sup>5</sup>Ne miggendiyad ka me anak ni Hakub te Ihiptu ne nekegtemu te duma ne me etew ne miggendiye degma te Ihiptu eyew egbeli te egkakeen, su due bitil diye te Kanaan. <sup>6</sup>Si Husi ka gubirnadur diye te Ihiptu wey sikandin ka migpepameligye te egkakeen diye te me etew ne migpuun te langun ne nasud. Sikan naa ka miggendiye ki Husi ka me kakey rin ne miglangkeb diye te tangkaan din. <sup>7</sup>Te pegkakita ni Husi kandan, nekeile e sikandin ne me kakey rin sikandan. Piru miglilibat ubag sikandin ne ware nekeila kandan wey miglangit-langit mig-inse, "Hendei kew ne mahinged?"

Ne migtabak sikandan, "Matig-Kanaan key. Miggendini key su egbeli key te egkakeen."

<sup>8</sup>Ne minsan nekeila si Husi kandan, piru ware sikandan nekeila kandin. <sup>9fg</sup>Ne nasuman-suman din e ka me taheinep din dengan meyitenged kandan wey

- fe. 41:55: Huw 2:5.
- ff. 42:2: Him 7:12.
- fg. 42:9: Hin 37:5-10.

migkahi sikandin, "Me tahasiliban kew! Miggendini kew ka eg-iipat ke hendei lenged ne mahuye ka nasud ney."

<sup>10</sup>Migtabak sikandan, "Kene, ahalen! Iyan ney innendini ka egbeli te egkakeen. <sup>11</sup>Talaari key te amey. Kene key ne tahasiliban, ahalen, wey kene key ne me ubaten."

<sup>12</sup>Migkahi si Husi, "Kene! Iyan niyu iya innendini ka eg-iipat ke hendei lenged ne mahuye ka nasud ney."

<sup>13</sup>Migtabak sikandan, "Ahalen, sapulu key wey daruwa (12) ne talaari. Sabeka re ka amey ney ne matig-Kanaan. Diye ded te amey ney ka igkalitan wey migpatey e ka sabeka."

<sup>14</sup>Piru migtabak si Husi, "Nakahi kud e ne me tahasiliban kew iya. <sup>15</sup>Seini ka ig-eleg-eleg ku te inlalag niyu: mengeyibet te ngaran te Hari te Ihiptu, wey kew re egpekeuli ke egpekeendini ka igkalitan ne hari niyu. <sup>16</sup>Due sabeka kaniyu ne egpaangayen te hari niyu. Ne sikaniyu se nasame, palunggehaat kew kayi te prisuwan taman te egkapamalehetan ku ne malehet ka inlalag niyu. Piru ke ware, malehet bes iya ne me tahasiliban kew." <sup>17</sup>Nataman, imprisu rin sikandan langun seled te tatelu ne aldew.

<sup>18</sup>Te igkatelu e ne aldew, migkahiyan ni Husi sikandan, "Egkaaldek a te Manama. Ke egtuman kew te iglalag ku kuntee, egkeuyag kew. <sup>19</sup>Ke kene kew ne me ubaten, sabeka re kaniyu ka egpalunggaat kayi te prisuwan, wey ka duma egpekeuli diye te miggutasan ne pamilya niyu ne eg-uyan te nabeli niyu ne egkakeen. <sup>20</sup>Piru uyana niyu kayi te keddi ka igkalitan ne hari niyu eyew igpakapapitew niyu ne malehet ka inlalag niyu wey eyew kene ku egpeyimatayan sikaniyu." Ne mig-uyun sikandan. <sup>21</sup>Migpalalahey ka me kakey ni Husi ne miggenendue, "Neyitabu seini kanta su nakasale ki dengan te hari ta. Nakita ta ka keyirapan din te pegpeyid-u-hid-u rin kanta, piru ware ta pammineha. Purisu egkeyirapan kid kuntee."

<sup>22fh</sup>Ne migkahi si Rubin, "Insaparan ku sikaniyu ne kene egdereetan ka bate, piru ware kew migpammineg keddi. Ne kuntee, egpabayaren kid te kamatayen din." <sup>23</sup>Nakasabut si Husi te lalag dan, piru ware sikandan nakanengneng, su nekeglalag sikandan pinaahi te talaggalin. <sup>24</sup>Ne mig-awe si Husi diye te kandan wey migsinehew sikandin. Nataman, miglibed e sikandin wey miglalag man-e diye te kandan. Ne ingkuwa rin si Simyun wey impabaku din diye te tangkaan dan.

#### fh. 42:22: Hin 37:21-22.

#### Nekeuli ka me kakey ni Husi diye te Kanaan

<sup>25</sup>Ne impeyipenu ni Husi te egkakeen ka me saku dan wey impatahu din ded ka me seleppi ne imbayad dan diye te me saku dan wey impabewuwan din degma sikandan te egkakeen para te kandan ne peggipanew. Ne natuman ka langun ne insuhu ni Husi. <sup>26</sup>Ne indulanan dan e te egkakeen ka me asnu ran wey migligkat e sikandan. <sup>27</sup>Te nakaaran e sikandan te seeye ne karusileman, imbukalasan te sabeka kandan ka saku din su egsunggud te asnu rin. Te sikan de, nakita rin ka seleppi din diye te be-be te saku din. <sup>28</sup>Migkahiyan din ka me suled din, "In-uli bes ka seleppi ku kayi te saku ku!" Te sikan de, naaldek wey ingkelkel e sikandan. Migpalalahey sikandan, "Nekey buwa seini se innimu te Manama kanta?"

<sup>29</sup>Te pegginguma ran diye te Kanaan, impangguhuran dan e ka amey ran ne si Hakub te langun ne neyitabu kandan. <sup>30</sup>Migkahi sikandan, "Ka gubirnadur diye te Ihiptu, nabelu sikandin ka miglalag kanami wey migbayungan key ne tahasiliban key kun. <sup>31</sup>Piru migtabak key, 'Kene key ne me ubaten wey kene key ne tahasiliban. <sup>32</sup>Sapulu key wey daruwa (12) ne talaari, wey sabeka re ka amey ney. Namatey e ka sabeka ne suled ney wey ka igkalitan, diye ded kuntee te Kanaan duma te amey ney.' <sup>33</sup>Ne migtabak sikandin, 'Eg-el-elehan ku sikaniyu ke malehet iya ne kene kew ne me ubaten: ihaat niyu ka sabeka kaniyu kayi te keddi wey uyana niyu ka egkakeen diye te eggutasan ne me pamilya niyu. <sup>34</sup>Piru uyana niyu kayi te keddi ka igkalitan ne hari niyu eyew egkanengnengan ku ne malehet ka inlalag niyu ne kene kew ne me tahasiliban. Ke egtumanen niyu seini, ig-uli ku kaniyu ka suled niyu wey egpakabebeli kew red kayi te Ihiptu.'"

<sup>35</sup>Ne imbusbus dan ka me saku dan, wey diye ded te seled ka puntil te tagse sabeka kandan ne nakapenu te seleppi ne igbayad perem te egkakeen. Te pegkakita ran te seleppi, naaldek sikandan langun. <sup>36</sup>Ne migkahiyan sikandan te amey ran ne si Hakub, "Migpalungku kew keddi tenged te me suled niyu ne naawe. Warad si Husi; warad e si Simyun; wey kuntee, si Binhamin e perem ka egkuen niyu. Keyyey! Neyitabu seini se langun kayi te keddi." <sup>37</sup>Ne migkahiyan ni Rubin ka amey rin, "Egpeyimatayan ku keykew ka daruwa ne anak ku ne lukes ke kene ku egkaruma si Binhamin te eg-uli kayi te keykew. Ipiyal nu re sikandin keddi wey egdumeen ku red iya sikandin te eg-uli kayi te keykew." <sup>38</sup>Piru migtabak si Hakub, "Kene ku igparuma kaniyu ka anak ku, su napatey e ka kakey rin wey sikandin naan de ka nasame. Ke due egkeyitabu kandin te peggipanew niyu, egpalaggawan ad man-e nikaniyu wey egkapatey ad su buyag ad e wey kena ad egpakaantus te dakel ne peglungku."

### 43

#### Ka peglibed te me kakey ni Husi diye te Ihiptu ne migduruma ki Binhamin

<sup>1</sup>Te seeye ne timpu, migmasumpit pad ka bitil diye te Kanaan, <sup>2</sup>wey naamin e ka egkakeen ne naangey ran diye te Ihiptu. Ne migkahiyan ni Hakub ka me anak din, "Libed kew diye te Ihiptu wey bebeli kew naa ubag te deisek ne egkakeen ta."

<sup>3</sup>Piru migtabak si Huda, "Impegpehetan key panpanayi te gubirnadur ne kene key egpakita kandin ke kene egpakaruma kanami ka hari ney. <sup>4</sup>Ke igparuma nu kanami ka hari ney, eglibed key red ka egbebeli te egkakeen. <sup>5</sup>Piru ke kene nu igparuma sikandin kanami, kene key eggendiye. Su migkahiyan key nikandin ne wey key re egpakita kandin ke egpakaruma kanami ka hari ney."

<sup>6</sup>Ne migkahi si Hakub, "Mania iya mule te egpeyirapan e red iya nikaniyu pinaahi te pegkahi niyu kandin te duen pad hari niyu?"

<sup>7</sup>Ne migtabak sikandan, "Mig-inse-inse ma iya sikandin kanami meyitenged kanta. Mig-inse sikandin ke neuyag ke naan pad Ame. Mig-inse man-e sikandin ke duen naan pad hari ney. Ne intabak ney re degma ka me inse din. Hentew naa iya ka egsuman-suman ne igparuma rin bes kanami ka hari ney?"

<sup>8</sup>Ne migkahiyan ni Huda ka amey rin, "Iparuma nu keddi si Tatu su egtaggel key e eyew kene ki red egkaamin egpatey te gutas. <sup>9</sup>Sikeddi ka egpanabak keykew ke egkamenu sikandin. Sikeddi ka senditi nu te ware egtamanan ke kene ku egkeuyan sikandin te eg-uli kayi te keykew. <sup>10</sup>Su ke ware key perem natalehen, kararuwa key buwad perem nakalibed diye."

<sup>11</sup>Ne migkahi si Hakub, "Ke sikan de ka egkaayunan, seini ka himuwa niyu: kuwa kew te me subla ne meupiya ne egkakeen te seini ne inged wey ipanahu niyu diye te me saku eyew eg-uyanen niyu ne igdasag te seeye se etew. Seini uyana niyu: me peemut, me peemis, deisek ne teneb, wey behas te me kayu ne pistasiyu wey almindras. <sup>12</sup>Kararuwaa niyu ka kentiddad te seleppi ne eg-uyanen niyu. Su keilangan ne eg-uyanen niyu red te eggendiye ka seleppi ne inlibed itahu diye te me saku niyu. Su kema ke naseyyup de sikandan ka egtahu. <sup>13</sup>Dumaa niyud e ka hari niyu wey dagdahew kew libed diye te seeye ne etew. <sup>14</sup>Igkeyid-u kew perem te Amana ne Maresen ne Manama ke diye kew e te tangkaan te seeye se etew ne eyew egpalekaan din si Simyun wey egpeulien din ded degma si Binhamin. Piru ke egkaawaan ad iya te me anak ku, balahad e su nekey naan pad iya ka egkeyimu ku."

<sup>15</sup>Sikan naa ka migpanguyan e sikandan te igdasag dan wey ingkararuwa ran ka kentidad te seleppi dan, wey miggendiyad e sikandan te Ihiptu duma ki Binhamin. Te nekeuma ran e diye, migpakigkita ran e ki Husi. <sup>16</sup>Te pegkakita ni Husi ne nakaruma red kandan si Binhamin, migkahiyan din ka suluhuanen ne impiyalan din te langun diye te baley rin, "Uyana nu sika ne me etew diye te baley ku. Lape ka te ayam wey hilutua nu su igpalagpu ku sikandan keddi te egpaniudtu." <sup>17</sup>Ne intuman te suluhuanen ka innangen ni Husi wey in-uyan din ka taltalaari diye te baley ni Husi.

<sup>18</sup>Naaldek ka taltalaari te in-uyan sikandan diye te baley ni Husi. Migpalalahey sikandan, "In-uyan ki kayi tenged te seleppi ne in-uli diye te me saku ta dengan. Egbayungan ki nikandin ne impanakew ta seeye wey egdakepen kid nikandin. Eg-uripenen kid nikandin wey eg-ahawen e ka me asnu ta." <sup>19</sup>Te pegginguma ran diye te gumawan te baley ni Husi, migkahiyan dan ka suluhuanen ne impiyalan ni Husi te langun diye te baley rin, <sup>20</sup>"Ahalen, nekeendini key e dengan eyew te pegbeli te egkakeen. <sup>21</sup>Diye te in-aranan ney te peg-uli ney e, imbukalasan ney ka me saku ney. Mania mule te nakaampew man ded te me saku ney ka seleppi ne imbayad ney perem te egkakeen. Ware nasalini minsan deisek. Sikan naa ka in-uyan ney red man-e kayi. <sup>22</sup>Ware key nakataha ke hentew ka migtahu te seleppi ney diye te me saku ney. Ne mig-uyan key e man-e te seleppi ne igbeli ney te egkakeen." <sup>23</sup>Ne migtabak ka suluhuanen, "Kene kew kapanseb wey kene kew kaaldek. Ka Manama niyu buwa ne Manama degma te amey niyu ka migtahu te seeye ne seleppi diye te me saku niyu. Nakuwa kud en iya ka imbayad niyu dengan." Nataman in-uyan din e si Simyun diye te kandan.

<sup>24</sup>Ne impaseled e te suluhuanen ka taltalaari diye te baley ni Husi. Imbehayan din sikandan te weyig eyew egpakapanlu-lu te paa ran wey insungguran din degma ka me asnu ran. <sup>25</sup>Ne in-ayun-ayun dan e ka me dasag dan ki Husi ke eg-uli te meudtu, su narineg dan ne eglagpu dan kandin te egpaniudtu diye. <sup>26</sup>Te peg-uli e ni Husi, impaseled dan e diye te baley ka igdasag dan wey imbehey ran e kandin, wey nangunduk sikandan diye te tangkaan din. <sup>27</sup>Mig-inse si Husi kandan meyitenged te peg-ugpe dan. Ne mig-inse e man-e sikandin, "Menua ka amey niyu, ka buyag ne innangen niyu keddi? Ware pad sikandin migpatey?"

<sup>28</sup>Ne migtabak sikandan, "Manekal pad ka amey ney ne suluhuanen nu, wey meupiya red ka peglelawa rin." Ne miglangkeb e man-e sikandan diye te tangkaan din ka egtahud kandin.

<sup>29</sup>Te pegkakita ni Husi te hari rin ne si Binhamin, mig-inse sikandin, "Seini ka hari niyu ne innangen niyu keddi?" Ne migkahiyan din si Binhamin, "Tatu, egpanalanginan ka te Manama." 30Ne migdagdahew mig-awe si Husi su egpakasinehew e sikandin tenged te amana ne alimengew rin te hari rin. Migseled sikandin diye te sinabeng din wey diyad e migsinehew. <sup>31</sup>Nataman, migpandepug e sikandin ne henduen pad ne miglihawang. Ne migtigkel naan de sikandin ka migsuhu te me suluhuanen din, "Ipangenat niyud e ka egkakeen." 32 Innenatan si Husi diye te sabeka ne lamisa wey diye degma te lein ne lamisa ka taltalaari. Due degma me matig-Ihiptu ne migsuwey ka migkeen, su kene ne meupiya ne batasan diye te kandan ka eglemung egkeen te me Hibruwanen. <sup>33</sup>Ne diye te egkatangkaan ni Husi ka lamisa te taltalaari, wey immegsinsinundul sikandan immapinnuu ligkat te panganey peendiye te igkalitan. Sikan naa ka migmasilsilapey ka taltalaari ka neinu-inu. <sup>34</sup>Innenatan sikandan te keenen ligkat te lamisa ni Husi piru ka innenat ki Binhamin, egkalalimmeen mule ka karakel du te innenat diye te me kakey rin. Ne miglagpu sikandan ki Husi te migkeen wey mig-inum te ware pegkehe.

# 44

#### Ka ubab ne natarin

<sup>1</sup>Ne insuhu ni Husi ka suluhuanen din ne impiyalan din diye te baley, "Hipenua nu te egkakeen ka me saku te sika ne me etew taman te egkeelehan dan te eg-uyan, wey iampew nu red te me saku dan ka seleppi ne imbayad dan. <sup>2</sup>Itahu nu degma ka ubab ku ne mahal diye te saku te igkalitan duma te seleppi ne imbayad din." Ne intuman din ka innangen ni Husi. <sup>3</sup>Te maselem-selem pad, impaligkat e ka taltalaari duma te me asnu ran. <sup>4</sup>Te ware pad nakariyu-diyu sikandan te siyudad, impalupug e ni Husi te suluhuanen din ka taltalaari te migkahi, "Lupuha nu sikandan wey kahii nu te mania te mareet ka igsuli dan te keupiya ku kandan? <sup>5</sup>Mania te intakew ran ka mahal ne ubab ne eg-in-inuman ku wey eggamiten ku te pegpangantuk? Mareet seini se innimu ran!"

<sup>6</sup>Sikan naa, te neumaan e te suluhuanen ka taltalaari, ingkahiyan din e sikandan te inlalag ni Husi. <sup>7</sup>Ne migtabak sikandan, "Ahalen, mania te nakakahi ka te iling due? Kene key egpekeyimu due! <sup>8</sup>Nakanengneng ka ne inlibed ney keykew ka seleppi ne nakita ney ne nakaampew te me saku ney puun te Kanaan. Ne kuntee

egpepanakawen key e nasi nikeykew te seleppi wey ke bulawan naa diye te baley te ahalen nu? <sup>9</sup>Na, ke hentew kanami ka egkakitaan nu te ubab din, himatayi nu sikandin wey uripena key e degma."

<sup>10</sup>Ne migtabak sikandin, "Uya, egkabennalan a due. Piru ka migtakew re ka egkeyimu ne uripen, ne egpekeyipanew red ka duma kaniyu." <sup>11</sup>Sikan naa ka indagdahew ran e ipalegsad ka me saku dan wey impambukelasan dan e. <sup>12</sup>Impaneilang ay-ayari te suluhuanen ni Husi ka me saku dan ligkat te panganey ne anak taman te igkalitan, ne diye din kitaa ka ubab te saku ni Binhamin. <sup>13</sup>Te sikan de, nanggisi te taltalaari ka kumbale dan su nalaggew ran amana. Indulan dan e man-e ka me saku dan diye te me asnu ran wey nanlibed diye te siyudad.

<sup>14</sup>Te peggingume e enni Huda diye te baley ni Husi, diye pad iya sikandin. Ne miglangkeb sikandan diye te tangkaan din. <sup>15</sup>Migkahiyan sikandan ni Husi, "Mania te neyimu niyu seini? Ware kew buwa nakanengneng ne egpakaantuk a mule ne etew?"

<sup>16</sup>Ne migkahi si Huda, "Ahalen, nekey naan pad iya se iglalag ney keykew? Nekey naan pad iya se igpakapangatarengan ney keykew ne ware key nakasale? Ka Manama en iya ka migpanengneng te nakasale key iya. Ne kuntee, uripena key e langun nikeykew duma te seeye se nakitaan te ubab."

<sup>17</sup>Piru migtabak si Husi, "Kena a egpekeyimu te iling due! Sikandin de se migtakew te ubab ku ka eg-uripenen ku. Piru sikaniyu se duma, egpekeuli kew diye te amey niyu ne ware igkabantali."

### Ka pegpeyimmimenew ni Huda ki Husi

<sup>18</sup>Ne migdani-rani si Huda diye te ki Husi ne migkahi, "Ahalen, palalahe e pa ubag nikeykew se suluhuanen nu. Ne kene ke re ubag kabelu keddi, minsan nekeiling ka te Hari te Ihiptu. <sup>19</sup>Ahalen, in-insaan key nikeykew ke duen pad amey ney wey ke duen pad hari ney. <sup>20</sup>Ne migtabak key, 'Uya, duen pad amey ney ne egkabuyag e, wey duen pad hari ney ne neetew te egkabuyag e ka amey ney. Napatey e ka kakey rin wey sikandin naan de ka nasame ne anak te iney rin, wey amana ne inggeyinawaan sikandin te amey ney.' <sup>21</sup>Ne migkahiyan key nikeykew, 'Uyana niyu sikandin kayi eyew egpakakita a kandin.' <sup>22</sup>Piru migtabak key, 'Ahalen, kene egpakasuwey sikandin te amey ney, su ke egpakasuwey sikandin, egkapatey ka amey ney.' <sup>23</sup>Piru ahalen, migkahi ka man-e, 'Wey kew re pakita keddiey ke egpakaruma kaniyu ka igkalitan ne hari niyu.'

<sup>24</sup>"Te peg-uli ney diye te amey ney, ingkahiyan ney e sikandin te impanahataha nu kanami. <sup>25</sup>Ne insuhu key nikandin, 'Libed kew red diye wey bebeli kew te deisek ubag ne egkakeen ta.' <sup>26</sup>Ne intabak ney sikandin, 'Kene key egpakalibed ke kene egpakaruma kanami ka igkalitan ne hari ney. Su wey key re egpakita te gubirnadur ke egpakaruma sikandin kanami.' <sup>27</sup>Ne migkahiyan key e man-e te amey ney, 'Nakanengneng kew e ne nakaanak de te daruwa ne lukes ka asawa ku ne si Rakil. <sup>28</sup>Miggipanew ka sabeka piru warad e nekeuli. Malehet ne indeesan sikandin te mahintalunan wey ware kud iya nakita sikandin. <sup>29</sup>Ke eg-uyanen niyu ka hari rin ne due egkeyitabu kandin, egkapatey ad iya te peglungku su egkabuyag ad e.'

<sup>30-31</sup>"Purisu ahalen, kena a egpekeuli diye te amey ney ke kene egpakaruma ka hari ney kanami. Su nakaruma diye te kandin ka geyinawa te amey ney. Ke egkakita te amey ney ne ware sikandin nakaruma kanami, egkapatey iya sikandin te peglungku su buyag e sikandin. <sup>32</sup>Ahalen, sikeddi ka egpanabak te amey ney ke egkamenu sikandin. Migkahiyan ku sikandin, 'Emun kene ku egkaruma ka hari ney te eg-uli kayi te keykew, sikeddi ka senditi nu te ware egtamanan.' <sup>33</sup>Purisu ahalen, sikeddiey e ka uripena nu ne liwan kandin. Peulia nud ubag sikandin duma te me kakey rin. <sup>34</sup>Su kena a egpekeuli diye te amey ney ke kene sikandin egpakaruma keddi. Kene ku egkaantus ka mareet ne egkeula-ula te amey ney."

# 45

#### Ka pegpeila ni Husi te me suled din

<sup>1fi</sup>Kenad e egkatigkel ni Husi ka eggeramen din diye te tangkaan te me suluhuanen din, sikan naa ka impaawe din sikandan. Te sikandan naan de se taltalaari ka nahaat, migpeile e si Husi te me suled din ke hentew sikandin. <sup>2</sup>Ne migpanaman migsinehew si Husi wey nakarineg ka me matig-Ihiptu wey nahuhuran e degma ka diye te palasyu te Hari te Ihiptu. <sup>3</sup>Migkahiyan ni Husi ka me suled din, "Sikeddi si Husi! Menua, manekal pad ka amey ta?" Piru natanengan de iya sikandan tenged te liyas dan kandin. <sup>4</sup>Sikan naa ka migkahiyan e man-e ni Husi sikandan, "Ne dani-rani kew pa ubag keddiey." Ne migparani sikandan, wey migkahi si Husi, "Sikeddiey si Husi, ka suled niyu ne imbelegye niyu wey neuyan e kayi te Ihiptu. <sup>5</sup>Ne kene niyu ikalaggew wey kene niyu senditi ka pegbelegye niyu

#### fi. 45:1: Him 7:13.

keddi kayi. Su ka Manama ka migpeendini keddi ne egpekewun-a kaniyu su eyew egkapangabangan ka me etew. <sup>6</sup>Su ikarangeb pad seini ne leg-un te gutas. Duen pad lalimma ne leg-un ne ware egpakararu wey ware eg-umeen. <sup>7</sup>Impewun-a a te Manama kaniyu kayi su eyew egkapangabangan kew duma te me anak niyu wey eyew egkeyimu kew ne dakel ne nasud. <sup>8</sup>Purisu, kene ne sikaniyu ka migpeendini keddi, ke kene, ka Manama. Innimu a nikandin ne talagtambag te Hari te Ihiptu wey impiyalan a nikandin te langun diye te baley rin wey te pegmandu te intiru ne inged te Ihiptu.

<sup>9fj</sup>"Na, apas kew uli diye te amey ta wey pangguhuri niyu sikandin te seini ka innangen te anak din ne si Husi, 'Innimu a te Manama ne talagmandu te intiru ne inged te Ihiptu. Hendini kew te keddi te mahaan. <sup>10</sup>Egpekeugpe kew kayi te inged te Gusin ne marani re keddi, sikeykew wey ka me anak nu, me apu nu, me karniru nu, me kambing, me baka, wey ka langun ne keykew. <sup>11</sup>Egtangguwen ku sikeykew diye te Gusin, su duen pad lalimma ne leg-un ne gutas. Su egkeyirapan kew ke kene kew eggendini, sikeykew wey ka me anak nu wey ka langun ne keykew.' <sup>12</sup>Ne migkahi man-e si Husi, "Kuntee, nekeila kew e, minsan ka hari ku ne si Binhamin, te sikeddi seini se migpakiglalag kaniyu iyan iya si Husi. <sup>13</sup>Pangguhuri niyu ka amey ta te kabantug ku kayi te Ihiptu wey te langun ne nakita niyu. Ne uyana niyu ka amey ta kayi te mahaan."

 $^{14}$ Ne migkepkepan din e ka hari rin ne si Binhamin te migsinehew. Ne migsinehew degma si Binhamin.  $^{15}$ Te egkalihet pad ne egsinehew si Husi, in-atul rin te egpangarek ka me kakey rin. Ne henduen pad ne nakalalag sikandan kandin.

<sup>16</sup>Te nakarineg e ka diye te palasyu te Hari te Ihiptu te nekeume e ka me suled ni Husi, nahale amana ka Hari wey ka me upisyal din. <sup>17</sup>Nataman, migkahiyan te Hari te Ihiptu si Husi, "Parulani nu te me suled nu ka me asnu ran wey peulia nud e sikandan diye te Kanaan. <sup>18</sup>Ipaangey nu te me suled nu ka amey niyu wey ka me pamilya ran wey ipalibed nu sikandan kayi. Su igbehey ku kandan ka subla ne meupiya ne tane kayi te Ihiptu wey egpakakeen sikandan te meupiya ne ig-uma kayi. <sup>19</sup>Kahii nu sikandan te egpeuyanen te me karumata puun kayi te Ihiptu eyew due egpeunturan te me asawa ran, me anak dan, duma te amey niyu ne egpeendiniyen. <sup>20</sup>Kahii nu sikandan ne kene egkatiglingey te me karatuan dan ne egkahaat diye, su kandan e ka langun ne subla ne meupiya kayi te Ihiptu."

<sup>21</sup>Intuman te me anak ni Hakub ka innangen kandan. Imbehayan sikandan ni Husi te me karumata sumale te insuhu te Hari te Ihiptu, wey imbehayan din

fj. 45:9-11: Him 7:14.

pad man-e te bewu te eggipanew. <sup>22</sup>In-atul rin pad man-e sikandan pamahayi te me manggad ne egkeilisan dan. Piru si Binhamin ka imbehayan te lalimma ne manggad ne egkeilisan din wey tatelu ne gatus (300) ne pelata ne mahal. <sup>23</sup>Ne impeuyanan din ka amey rin te sapulu ne asnu ne indulanan te subla pad ne meupiya ne mig-uma diye te Ihiptu wey sapulu pad man-e ne asnu ne indulanan te trigu, paan, wey duma pad ne egkakeen ne igpabewu te amey rin te peggipanew rin. <sup>24</sup>Ne impaligkat e ni Husi ka me suled din ne impanagtahaan, "Kene kew pasenditey ke diye kew e te dalan."

<sup>25</sup>Sikan naa ka migligkat e sikandan puun te Ihiptu wey miglibed e diye te amey ran ne si Hakub diye te Kanaan. <sup>26</sup>Te pegginguma ran, migkahiyan dan e sikandin, "Ware bes ded migpatey si Husi! Ne migmandue kuntee sikandin te intiru ne inged te Ihiptu!" Natanengan si Hakub wey ware nakapalintutuu te ingguhud dan.

<sup>27</sup>Piru te napangguhuran dan e sikandin te langun ne innangen ni Husi, wey te nakita rin e ka me karumata ne impeuyan ni Husi eyew egpeunturan kandin te eggendiye te Ihiptu, henduen pad ne naalipaspasan sikandin ka natanengan. <sup>28</sup>Ne migkahi sikandin, "Eleg e! Ware bes ded iya migpatey ka anak ku ne si Husi! Eggendiya a kandin eyew egkakita ku pad sikandin te kene e pad egpatey."

# 46

#### Miggendiyad ensi Hakub te Ihiptu

<sup>1</sup>Sikan naa ka miggipanew e ensi Hakub wey impanguyan dan ka langun ne kasangkapan dan. Te nekeume sikandan diye te Birsiba, migpanubad sikandin te Manama te amey rin ne si Isaak. <sup>2</sup>Te seeye ne karusileman, migpakiglalag ka Magbebaye ne Manama ki Hakub pinaahi te taheinep. Migkahi sikandin, "Hakub, Hakub!"

Ne migtabak sikandin, "Seini e red." <sup>3</sup>Ne migkahi man-e ka Manama, "Sikeddi ka Manama, ka Manama te amey nu. Kene ka kaaldek ne eggendiye te Ihiptu, su eggimuwen ku ne dakel ne nasud ka me kabuhalan nu diye. <sup>4</sup>Egdumaan ku sikeykew diye te Ihiptu, wey igpalibed ku red kayi te Kanaan ka me kabuhalan nu. Te pegpatey nu, diye te lenged nu si Husi."

<sup>5</sup>Sikan naa ka miglihad e si Hakub diye te Birsiba. Impeuntud e te me anak din si Hakub, ka me anak dan ne deisek pad, wey ka me asawa ran diye te me karumata ne impeuyan te Hari te Ihiptu kandan. <sup>6fk</sup>Impanguyan dan man-e ka ayam dan wey ka langun ne karatuan ne nakuwa ran diye te Kanaan. Miggendiye si Hakub te Ihiptu ne impanduma rin ka langun ne kabuhalan din; <sup>7</sup>ka me anak din wey me apu din, lukes wey malitan.

<sup>8</sup>Seini ka listaan te me ngaran te me kabuhalan ni Hakub ne migduma kandin diye te Ihiptu: si Rubin ka panganey ne anak ni Hakub. <sup>9</sup>Ka me lukes ne anak ni Rubin ne ensi Hanuk, si Pallu, si Hisrun, wey si Karmi. <sup>10</sup>Si Simyun wey ka me anak din ne lukes ne ensi Himuwil, si Hamin, si Uhad, si Hakin, si Suhar, wey si Saul. Si Saul ka anak din te malitan ne matig-Kanaan. <sup>11</sup>Si Libi wey ka me anak din ne lukes ne ensi Girsun, si Kuhat, wey si Mirari. <sup>12</sup>Si Huda wey ka me anak din ne lukes ne ensi Sila, si Piris, wey si Sira. (Duen pad daruwa ne lukes ne anak ni Huda ne ensi Ir wey si Unan, piru migpatey e sikandan diye te Kanaan.) Ka me lukes ne anak ni Piris ne ensi Hisrun wey si Hamul. <sup>13</sup>Si Isakar wey ka me anak din ne lukes ne ensi Tula, si Puwa, si Hasub, wey si Simrun. <sup>14</sup>Si Sabulun wey ka me anak din ne lukes ne ensi Sirid, si Ilun, wey si Haliil. <sup>15</sup>Sikandan ka me lukes ne anak ni Hakub ki Liya duma ki Dina ne anak din ne malitan ne miglesut te diye pad sikandan mig-ugpe te Padan-aram. Miggingume e te tatelu ne pulu wey tatelu (33) ka kabuhalan din ki Liya.

<sup>16</sup>Si Gad wey ka me anak din ne lukes ne ensi Sipiun, si Hagi, si Suni, si Isbun, si Iri, si Arudi, wey si Arili. <sup>17</sup>Si Asir wey ka me anak din ne lukes ne ensi Imna, si Isba, si Isbi, si Biryas, wey ka atebey ran ne si Sira. Ka me anak ni Biryas ne ensi Ibir wey si Malkiil. <sup>18</sup>Sikandan se sapulu wey hen-em (16) ka me kabuhalan ni Hakub ki Silpa, ka uripen ne imbehey ni Laban diye te anak din ne si Liya.

<sup>19</sup>Ensi Husi wey si Binhamin, ka me anak ni Hakub ki Rakil. <sup>20fl</sup>Ka me anak ni Husi ki Asinat iyan ensi Manasis wey si Ipraim ne diye neetew te Ihiptu. Si Asinat, anak ni Putipira ne talagpanubad diye te Un. <sup>21</sup>Ka me lukes ne anak ni Binhamin iyan ensi Bila, si Bikir, si Asbil, si Gira, si Naaman, si Ihi, si Rus, si Mupim, si Hupim, wey si Arid. <sup>22</sup>Sikandan se sapulu wey hep-at (14) ka me kabuhalan ni Hakub ki Rakil.

<sup>23</sup>Si Dan wey ka anak din ne lukes ne si Husim. <sup>24</sup>Si Naptali wey ka me anak din ne lukes ne ensi Hasiil, si Guni, si Hisir, wey si Silim. <sup>25</sup>Sikandan se pitu ka me kabuhalan ni Hakub ki Bilha, ka uripen ne imbehey ni Laban diye te anak din ne si Rakil.

- fk. 46:6: Him 7:15.
- fl. 46:20: Hin 41:50-52.

<sup>26</sup>Migginguma te hen-em ne pulu wey hen-em (66) ka me kabuhalan ni Hakub ne miggendiye te Ihiptu, gawas te me ambey rin. <sup>27fm</sup>Tenged te duen e daruwa ne anak ni Husi ne miglesut diye te Ihiptu, miggingume e te pitu ne pulu (70) ka me kabuhalan ni Hakub ne diye te Ihiptu.

#### Ka pegginguma enni Hakub diye te Ihiptu

<sup>28</sup>Ne impewun-e e ni Hakub si Huda diye ki Husi eyew egpatemu sikandan kandin diye te Gusin. Te nekeume e ensi Hakub diye te Gusin, <sup>29</sup>impataggel e ni Husi ka unturanan din wey miggendiyad e sikandin te Gusin eyew te pegtemu te amey rin diye. Te nekeume e sikandin, migkepkepan din e ka amey rin wey migsinehew sikandin ne mananey mig-engked. <sup>30</sup>Ne migkahiyan ni Hakub si Husi, "Egkaayun e ne egpatey ad, su nakita kud e ka ulaula nu wey nakataha ad ne ware ke bes ded migpatey."

<sup>31</sup>Ne migkahiyan ni Husi ka me suled din wey ka me pamilya ran, "Eggendiya a te Hari te Ihiptu wey egkahiyan ku sikandin te nekeuma kew e puun te Kanaan. <sup>32</sup>Egkahiyan ku degma sikandin te talagtameng kew te me ayam, wey impanguyan niyu kayi ka ayam niyu wey ka langun ne kaniyu. <sup>33</sup>Ne emun ke igpeumew kew te Hari te Ihiptu wey eg-insaan ke nekey ka himu niyu, <sup>34</sup>tabaka niyu sikandin te talagtameng kew te me ayam puun pad dengan, iling te me apu niyu. Ne puun due, egpeugpeen kew te Hari te Ihiptu kayi te Gusin, su kene ne meupiya te me matig-Ihiptu ne eglemung te talagtameng te me ayam."

 $47\,$   $^1{\rm Sikan}$  naa ka miggendiyad e si Husi te Hari te Ihiptu wey migkahi, "Nekeume e ka amey ku wey ka me suled ku ne migpuun diye te Kanaan ne impanguyan dan ka me karniru wey me baka ran wey ka langun ne kandan. Ne kuntee, diyad e sikandan te Gusin."  $^2{\rm Ne}$  lalimma ka suled ni Husi ne induma rin wey impeila-ila rin te Hari te Ihiptu.  $^3{\rm Ne}$  mig-insaan sikandan te Hari te Ihiptu, "Nekey-a ka himu niyu?"

Ne migtabak sikandan, "Ahalen, talagtanggu key te me ayam, iling te me apu ney. <sup>4</sup>Miggendini key eyew kayid eg-ugpe su warad egkapanabtaban te me ayam ney diye te Kanaan su masumpit amana ka bitil. Ahalen, eghangyuen ney sikeykew ne diye key peugpaa nikeykew te Gusin." <sup>5</sup>Ne migkahiyan te Hari te

fm. 46:27: Him 7:14.

Ihiptu si Husi, "Tenged te kayid e te keykew ka amey nu wey ka me suled nu, <sup>6</sup>egpekeugpe sikandan te minsan hendei ne igkeupii nu. Diye nu iya peugpaa sikandan te Gusin, su seeye ka subla ne meupiya ne tane kayi te Ihiptu. Ke due nanengnengan nu due te kandan ne amana egkateu ne egtanggu, iyan nu patangguwa te me ayam ku."

<sup>7</sup>Ne nataman, indume e ni Husi ka amey rin ne si Hakub wey impeila rin te Hari te Ihiptu, wey in-ampuan ni Hakub ka Hari eyew egpanalanginan sikandin te Manama. <sup>8</sup>Ne mig-insaan te Hari te Ihiptu si Hakub, "Pile e ka idad nu?"

<sup>9</sup>Ne migtabak si Hakub, "130 e ka idad ku. Malepet de wey meyirap ka peg-ugpe ku. Ne kene seini egpakalepeng te idad te amey ku wey te me apu ku dengan." <sup>10</sup>Ne impanalanginan e man-e ni Hakub ka Hari te Ihiptu wey miggipanew e sikandin. <sup>11</sup>Sikan naa ka impeugpe e ni Husi ka amey rin wey ka me suled din diye te Ihiptu. Imbehayan din sikandan te subla ne meupiya ne tane ne diye te marani te siyudad ne egngaranan te Ramasis, sumale te insuhu te Hari te Ihiptu. <sup>12</sup>Imbegbehayan ni Husi te pegkeen ka intiru ne pamilya te amey rin, wey ka me suled din, sumale te kasuluhan te me anak dan.

#### Ka pegmandu ni Husi te timpu te bitil

<sup>13</sup>Ne tenged te masumpit amana ka bitil, warad egkakeen te me etew ne mig-ugpe diye te inged te Ihiptu wey Kanaan wey migmagguye e ka me etew. <sup>14</sup>Sikan naa ka nangendiye ki Husi ka me matig-Kanaan wey me matig-Ihiptu eyew egpameli te egkakeen. Impanlimud ni Husi ka langun ne seleppi ne imbayad dan wey in-uyan din diye te palasyu te Hari te Ihiptu. <sup>15</sup>Ne nataman, naaminan e te seleppi ka me etew diye te Ihiptu wey Kanaan. Ne nangendiyad e man-e ki Husi ka langun ne me matig-Ihiptu ne migkahi, "Warad seleppi ney. Ne behayi key ubag te egkakeen wey kene key papataya nikeykew te gutas."

<sup>16</sup>Ne migtabak si Husi, "Tenged te warad e seleppi niyu, ibehey niyu keddi ka me ayam niyu su egsaliyuwan ku te egkakeen." <sup>17</sup>Sikan naa ka impanguyan dan ka me ayam dan diye te ki Husi, wey insaliyuwan din te egkakeen ka me kudde, me karniru, me kambing, me baka, wey ka me asnu ran. Te seeye ne legun, impanaliyuwan ni Husi te egkakeen ka langun ne ayam dan.

<sup>18</sup>Te seup e ne leg-un, nangendiyad e man-e sikandan ki Husi ne migkahi, "Ahalen, kene ney iggeles keykew ne naaminan key en iya te seleppi wey diyad e te keykew ka langun ne ayam ney. Warad nasame ne igpakabehey ney keykew

angin te lawa ney wey te tane ney. <sup>19</sup>Kene key ubag papataya nikeykew! Saliyuwi nud e ka lawa ney wey ka tane ney te egkakeen. Egpeuripen key e te Hari te Ihiptu wey kandin e ka tane ney. Behayi key degma te beni eyew egkeuyag key red wey kene egbenesan ka me kamet ney."

<sup>20</sup>Sikan naa ka impamelegye e te me matig-Ihiptu ka langun ne tane dan tenged te masumpit ne bitil. Ne impameli e seeye ni Husi para te Hari te Ihiptu ne iyan e kamuney te katantanaan te Ihiptu, <sup>21</sup>wey impeuripen e kandin ka langun ne matig-Ihiptu. <sup>22</sup>Ka tane naan de te me talagpanubad ka ware nakuwa ni Husi. Kene ne keilangan ne igbelegye dan ka tane dan su imbegbehayan de sikandan te Hari te Ihiptu te seleppi. <sup>23</sup>Ne migkahiyan ni Husi ka me etew, "Kuntee ne aldew, nabeli kud e sikaniyu wey ka tane niyu para te Hari te Ihiptu. Seini red ka beni ne igpamula niyu te me kamet niyu. <sup>24</sup>Ke eg-umeen kew e, ibehey niyu te Hari te Ihiptu ka igkalimma ne baad. Kaniyud e ka egkasame eyew egbenien niyu wey egkeenen te taltalaanak."

<sup>25</sup>Ne migkahi sikandan, "Ahalen, impangabangan key nikeykew! Ke egkeupian ka, egpeuripen key e te Hari te Ihiptu." <sup>26</sup>Sikan naa ka miggimu si Husi te balaud diye te Ihiptu ne ka igkalimma ne baad te eg-uma igbehey te Hari te Ihiptu. Minsan kuntee, duen pad ka sika ne balaud. Ka tane naan de te me talagpanubad ka ware nakuwa te Hari te Ihiptu.

### Ka impanaha-taha ni Hakub

<sup>27</sup>Ne diye mig-ugpe ka me anak ni Israil<sup>fn</sup> te Gusin, wey migmeyaman sikandan diye wey nabuhal amana. <sup>28</sup>Diye mig-ugpe si Hakub te Ihiptu seled te sapulu wey pitu (17) ne leg-un taman te migpatey e sikandin ne migginguma te 147 ka idad din. <sup>29fo</sup>Te mahaan e egkapatey sikandin, impeumew rin ka anak din ne si Husi wey ingkahiyan, "Ke inggeyinawaan e red nikeykew, ipataliware nu ka belad nu te daruwa ne bubun ku wey saad ka keddi ne eg-ay-ayaran a nikeykew wey kene eg-ang-anggaan. Kena a ilebeng nikeykew kayi te Ihiptu. <sup>30</sup>Su igkeupii ku ne diya a igsabal te insabalan te amey ku wey te apu ku. Ke egpatey ad, uyana a nikeykew puun kayi te Ihiptu wey diya a isabal te insabalan kandan."

Ne migtabak si Husi, "Egtumanen ku ka ingkahi nu."

fn. 47:27 Si Israil ka ingngaran te Manama ki Hakub te migpaleglehengey sikandan diye te Piniil. (32:28)

fo. 47:29-30: Hin 49:29-32; 50:6.

 $^{31}$ Ne migkahi e man-e si Hakub, "Pahunlibet ka keddi ne egtumanen nu iya seini." Sikan naa ka migpahunlibet si Husi. Ne miglangkeb si Hakub diye te hibatanan din eyew egpasalamat te Manama.

## 48

### Ka pegpanalangin ni Hakub engki Ipraim wey Manasis

<sup>1</sup>Te ware naluhey, nahuhuran si Husi ne migderalu ka amey rin. Sikan naa ka inleuy rin si Hakub wey induma rin ka daruwa ne anak din ne ensi Manasis wey Ipraim. <sup>2</sup>Te nahuhuran e si Hakub te miglepew e ka anak din ne si Husi, migtehel-tehel sikandin mig-enew wey migpinnuu diye te miggibatan din. <sup>3fp</sup>Ne migkahiyan ni Hakub si Husi, "Ka Amana ne Maresen ne Manama migpakita keddi diye te Lus, diye te tane te Kanaan wey impanalanginan a nikandin. <sup>4</sup>Migkahiyan a nikandin, 'Egbehayan ku sikeykew te masalig ne me kabuhalan eyew egkeyimu sikandan ne masalig ne me nasud. Ne igbehey ku kandan ka seini ne tane wey sikandan e ka kamuney kayi te ware egtamanan.' <sup>5</sup>Ne ka daruwa ne anak nu ne si Ipraim wey si Manasis ne miglesut kayi te Ihiptu te ware e pad miggendini, eg-anaken kud e sikandan. Eg-isipen kud sikandan ne me anak ku iling engki Rubin wey Simyun. <sup>6</sup>Kene kud eg-anaken ka me hari ran, su keykew e sikandan. Ke egkapatey ad, diyad e sikandan egpakakuwa te karatuan engki Ipraim wey ki Manasis. <sup>7fq</sup>Te pegligkat ku diye te Padan-aram, migpatey e ka iney nu ne si Rakil diye te Kanaan te mariyu key pad te Iprata. Amana a miglungku te pegpatey rin wey dive ku ilebeng sikandin te ilis te dalan peendiye te Iprata (wey ke Bitlihim)."

<sup>8</sup>Te pegkakita ni Hakub te me lukes ne anak ni Husi, mig-inse sikandin, "Hentew-a seini se me lukes-lukes?"

<sup>9</sup>Ne migtabak si Husi, "Seini ka me anak ku ne imbehey te Manama keddi kayi te Ihiptu."

Ne migkahi man-e si Hakub, "Ipeparani nu sikandan kayi te keddi su egpanalanginan ku sikandan." <sup>10</sup>Te seeye ne timpu, kenad e egpakameleg-meleg si Hakub su buyag e amana sikandin. Seeye naa, impeparani e ni Husi ka me anak din diye ki Hakub, wey migkepkepan wey migpangarekan din sikandan. <sup>11</sup>Ne migkahiyan ni Hakub si Husi, "Wara ad mig-iman-iman ne egkakita ku

fp. 48:3-4: Hin 28:13-14. fg. 48:7: Hin 35:16-19.

pad sikeykew, piru kuntee, mania te kene ne sikeykew re ka impakita keddi te Manama, su minsan degma ka me anak nu?" <sup>12</sup>Ne impeensig ni Husi ka me lukeslukes ligkat te buel ni Hakub wey miglangkeb sikandin diye te tangkaan te amey rin.

<sup>13</sup>Ne nataman, inggen-genan ni Husi ka me anak din wey ingkitkit din peendiye ki Hakub. Ne diye din si Ipraim te kawanan din wey diye te gibang din si Manasis, su eyew si Ipraim ka diye te igkahibang ni Hakub wey si Manasis ka diye te igkakawanan din. <sup>14</sup>Piru impegsaliyu ni Hakub ka belad din. Diye din itel-eb ka kawanan ne belad din te ulu ni Ipraim ne iyan ka hari, wey diye din itel-eb ka gibang ne belad din te ulu ni Manasis ne iyan ka kakey. <sup>15-16</sup>Ne impanalanginan din ensi Husi ne migkahi,

"Egpanalanginan ka seini se me anak nu te Manama,

ne insimba te apu ku ne si Abraham wey te amey ku ne si Isaak,

ne iyan ded degma ka Manama

ne layun migpanulu keddi.

Egpanalanginan degma sikandan,

te panalihan te Manama ne migpangabang

te langun ne egpakarereet keddi.

Ne egkasuman-suman te me etew ka ngaran ku,

ka ngaran te apu ku ne si Abraham,

wey ka ngaran degma te amey ku ne si Isaak

pinaahi kandan.

Egkabuhal-buhal sikandan

wey egnenasud dan e."

<sup>17</sup>Te pegkakita ni Husi ne ka ulu ni Ipraim ka intel-eban te kawanan ne belad te amey rin, neepes sikandin. Sikan naa ka inggen-genan din ka belad te amey rin eyew eggalinen din perem diye te ulu ni Manasis. <sup>18</sup>Ne migkahiyan ni Husi ka amey rin, "Kene, Ame! Seini ka panganey ne anak ku. Kayi nu itel-eb ka kawanan ne belad nu te ulu rin." <sup>19</sup>Piru mig-apul ka amey rin ne migkahi, "Tatu, nakanengneng a. Ka me kabuhalan ni Manasis, egnenasud ded degma te dakel. Piru ka hari rin ka egpakasubla kandin wey egnenasud te dakel ka me kabuhalan din."

<sup>20fr</sup>Sikan naa ka impanalanginan din sikandan te seeye ne aldew te migkahi,

"Egkarawit ka me ngaran niyu te me Israilita

ke egpanalangin sikandan te duma.

Egkahi sikandan keureme, 'Egpanalanginan kew

te Manama iling te panalangin din

ki Ipraim wey ki Manasis.' "

Sikan naa ka impewun-a ni Hakub ka ngaran ni Ipraim ki Manasis.

<sup>21</sup>Ne migkahiyan ni Hakub si Husi, "Mahaan ad egkapatey, piru egdumaan kew te Manama wey igpalibed kew nikandin diye te Kanaan ne inged te me kaap-apuan niyu. <sup>22</sup>Ne sikeykew ka egbehayan ku te inged te Sikim, kene ne me suled nu. Naahew ku seeye ne tane dengan puun te me Amurihanen pinaahi re te kampilan wey me busug ku."

# 49

Ka pegpataha ni Hakub te egkeulaula te me anak din

fr. 48:20: Hib 11:21.

 $^{1}$ Nataman, impeumew e ni Hakub ka me anak din wey migkahiyan, "Libulung kew kayi su igpangguhud ku kaniyu ka egkeulaula niyu keureme.

<sup>2</sup>"Hendini kew wey pammineg kew,

me anak ku;

pammineg kew keddi

te amey niyu.

<sup>3</sup>"Rubin, sikeykew ka panganey ne anak ku,

sikeykew ka keseg ku,

wey ka an-anayan ne palinneu te pegkalukes ku.

Subla ka bantug nu

wey katenged nu te langun ne me anak ku.

 $^4\mathrm{Piru}$  iling ka te baggiyu ne kene egkabalabahan.

Purisu kenad e ne subla ka bantug nu,

su miggulid ke ma

te sabeka ne asawa ku ne uripen,

wey inlinditan nu ka hibatanan ku.

<sup>5</sup>"Si Simyun wey si Libi, talaari, wey nasabeka ka isip dan.

Inggamit dan ka me kampilan dan eyew egpanlusud.

<sup>6</sup>Kena a eg-ambag-ambag te me planu ran,

wey te me pegliblibulung dan.

Su emun egkabelu sikandan,

eggimatey iya te etew,

wey ke egkasakat sikandan ne egpanggepuan dan ka me baka,

egpanggepuan dan iya.

<sup>7</sup>Egdilusen sikandan

tenged te masumpit ne belu dan,

wey te egmangebel-ebel degma ne langet dan.

Purisu, egpegsugsuwayen ku sikandan

diye te inged te Israil,

wey diye ku degma egpegsugsuwaya ka me kabuhalan dan.

8"Huda, egdayanen ka te me suled nu.

Egkareeg nu ka me kuntere nu.

Eg-unduk ka me suled nu

diye te tangkaan nu.

9<sub>fs</sub>Iling ka, Huda, te nati te liyun

ne nakarawi e,

ne eg-uli e diye te helesanan din

wey egbuluku e.

Ne ware egpakarani-rani kandin.

10 Eggen-genan nu, Huda, ka tuked te Hari,

wey egpakamandu

ka me kabuhalan nu

### taman te peglepew

te Hari ne malehet ne kamuney,

ne iyan egtumanen te langun.

 $^{11}$ Iggiket din ka nati ne asnu rin

## fs. 49:9: Num 24:9; Imp 5:5.

diye te subla ne meupiya ne pinamula ne paras.

Iyan din igpi-pi te kumbale din ka binu,

su neuralan e sikandin.

 $^{12}$ Subla pad ne meitem ka mata rin

te binu,

wey subla pad ne maangkag ka ngipen din

te gatas.

13"Sabulun, diye ka eg-ugpe te ilis te dahat.

Meupiya ne tuhunanan te me barku

ka lenged te tane nu,

wey diye egkataman te Sidun ka tane nu.

<sup>14</sup>"Isakar, iling ka te manekal ne asnu

ne egbuluku minsan indulanan.

 $^{15}$ Ke egkakita nu ne meupiya ka eggimelayan nu

wey meupiya degma ka tane,

```
egkeenat nu ka dulan nu wey egkapehes eggimu isip uripen.
```

16"Dan, egpakamandu ka

te me etew nu,

iling te duma ne tribu te Israil.

 $^{17}$ Iling ka, Dan, te uled

diye te ilis te dalan,

iling te mammiley

ne egkahat te paa te kudde

eyew egkewulus ka mig-untud."

 $^{18}\mathrm{Ne}$  migkahi si Hakub, "Egtetahad a te kaluwasan

ne egligkat keykew, Magbebaye ne Manama."

 $^{19}$ "Gad, eglusuran ka wey egpangahawan te me kuntere nu,

piru eglupuhen nu sikandan te egsuli.

20<sub>"Asir,</sub>

### mananam ka egkeenen nu,

wey eg-andam ka te egkakeen

ne eleg te Hari.

<sup>21</sup>"Naptali, iling ka te usa ne kuleping

ne inlekaan,

wey eg-anak te mateles ne me nati.

22"Husi, iling ka te mahintalunan ne asnu

ne diye te sebseb;

iling te nati te asnu ne mahintalunan

ne diye te masandig.

 $^{23}$ In-atangan ka te me tummawan ne egpane

te ware pegkeyid-u.

Ne impane ka nikandan

wey in-ehetan.

 $^{24}$ Piru kene degma egkasanggel ka pegsuli nu pegpane kandan,

wey manekal layun ka belad nu

tenged te geem te Maresen ne Manama ni Hakub,

ka Talagtameng

wey ka Dakel ne Batu ni Israil.

<sup>25</sup>Ka Manama te amey niyu

ka egbulig kaniyu,

ka subla ne Maresen ne Manama

ne egpanalangin kaniyu.

Egpanalanginan kew nikandin te uran,

wey te weyig ne egligkat diye te diralem te tane.

Egbehayan kew nikandin te masalig ne me anak.

<sup>26</sup>Ka me panalangin te amey niyu,

subla pad ne dakel

te katubung te ware egtamanan ne me bubungan,

wey subla pad ne meupiya

te katubung te tapey ne me bubungan.

Egkarawat nu seini, Husi,

ne labew

te me suled nu.

27"Binhamin, iling ka te bubuluti ne singgalung.

Te maselem pad, egkeenen nu

ka impammued nu,

wey te maapun e, egpanalaren nu ka same."

<sup>28</sup>Sikandan sika ka 12 ne tribu ni Israil. Seeye ka inlalag te amey ran te pegpanalangin din kandan te panalangin ne eleg te tagse sabeka kandan.

## Ka pegpatey ni Hakub wey ka pegsabal kandin

<sup>29</sup>Ne nataman, impanpanayan sikandan ni Hakub, "Hapit ad egkapatey. Isabal a nikaniyu diye te sulung ne diye te kamet ni Iprun ne Hitihanen ne insabalan te amey ku wey apu ku. <sup>30ft</sup>Sika ka sulung ne diye te Makpila ne diye dapit te igsile ligkat te Mamri, diye te inged te Kanaan. Nabeli ni Abraham diye ki Iprun ka sika ne sulung wey kamet eyew eggimuwen ne sabalanan. <sup>31fu</sup>Diye isabal si Abraham wey si Sara ne asawa rin. Ne diye degma isabal si Isaak wey si Ribika ne asawa rin, wey diye ku red degma isabal si Liya. <sup>32</sup>Nabeli e diye te me Hitihanen ka sika ne kamet wey ka sulung ne naseled dutu." <sup>33fv</sup>Te nekeimpus e si Hakub ka migpaney-paney te me anak din, miggibat e man-e sikandin. Ne migpatey e sikandin wey nakalemung e te me karumaan din ne nammatey.

- ft. 49:30: Hin 23:3-20.
- fu. 49:31: a Hin 25:9-10; b Hin 35:29.
- fv. 49:33: Him 7:15.

 $50^{-1}$ Te sika, migkepkepan e wey miggarekan e ni Husi ka amey rin wey migsinehew.  $^2$ Ne nataman, migsuhu si Husi te talagbalsamar ne igpabalsamar ka lawa te amey rin. Seeye naa ka imbalsamar e si Hakub.  $^3$ Mighep-at ne pulu (40) ne aldew ka pegbalsamar kandin su sika ka kaluhayan te pegbalsamar. Ne miglungku ka me matig-Ihiptu te pegpatey rin seled te pitu ne pulu (70) ne aldew.

<sup>4</sup>Te napenge e ka peglungku dan, migkahiyan ni Husi ka me upisyal te Hari te Ihiptu, "Ke ingkeyid-u e red nikaniyu, ikahi niyu ubag seini te Hari: <sup>5fw</sup>'Te mahaan e egpatey ka amey ku, impasaad a nikandin ne diye ku igsabal sikandin te sabalanan ne intahahe din diye te Kanaan. Purisu, peendiyaa a nikeykew eyew te pegsabal te amey ku. Ke egpekeimpus ad, ne eg-uli ad e.'"

<sup>6</sup>Ne nabennalan ka Hari te Ihiptu te inhangyu ni Husi te migkahi, "Hendiye kad wey isabal nu ka amey nu sumale te impasaad din keykew."

<sup>7</sup>Sikan naa ka migligkat e ensi Husi duma te langun ne upisyal te Hari te Ihiptu wey te igdatu diye te Ihiptu. <sup>8</sup>Migduma degma ki Husi ka pamilya rin, ka me suled din wey ka me pamilya ran. Ka anak dan naan de ne deisek pad wey ka ayam dan ka inggaat diye te Gusin. <sup>9</sup>Sikan naa ka masalig sikandan se migduma ki Husi. Due nanguntud te kudde wey due degma nanguntud te unturanan ne kerumata.

<sup>10</sup>Nataman, migginguma ran e diye te diekanan te trigu diye te Atad ne diye dapit te Weyig ne Hurdan. Ne migpandalawit amana sikandan diye, wey miglungku si Husi te amey rin te pitu ne aldew. <sup>11</sup>Te pegkakita te me matig-Kanaan ne subla ka pegpandalawit diye te Atad, migkahi sikandan, "Seini ka masumpit ne pegpandalawit te me matig-Ihiptu." Purisu, migngaranan dan ka seeye ne inged te Abil-misraim.<sup>fx</sup>

<sup>12</sup>Ne dutu, intuman te me anak ni Hakub ka impanaha-taha rin kandan. <sup>13fy</sup>Su in-uyan dan ka minatey diye te Kanaan wey diye dan isabal te sulung diye te Makpila, ne diye dapit te igsile ligkat te Mamri. Seeye ka sulung ne diye te kamet ni Iprun ne Hitihanen ne imbeli ni Abraham eyew eggimuwen ne sabalanan. <sup>14</sup>Ne nataman, mig-uli e si Husi diye te Ihiptu duma te me suled din wey ka langun ne migduma kandin te migsabal te amey rin.

fw. 50:5: Hin 47:29-31.

fx. 50:11 Te Hibruwanen: "pegpandalawit te me matig-Ihiptu" ka kaluwasan te lalag ne "Abil-misraim."

fy. 50:13: Him 7:16.

### Ka peggulu ni Husi te me suled din

<sup>15</sup>Te nakasabal e ka amey ran, migpalalahey ka me suled ni Husi, "Kema ke egdumutan ki pad ni Husi wey ke egsulian ki nikandin tenged te mareet ne neyimu ta kandin dengan." <sup>16</sup>Sikan naa ka migpanaha sikandan ki Husi meyitenged te impanaha-taha kun te amey ran te ware pad sikandin migpatey ne migkahi, <sup>17</sup>"Te wa pad migpatey ka amey ta, egpakahiyan ka nikandin te egpasayluwen key nikeykew se me suled nu te sale ne neyimu ney keykew. Ne kuntee, pasayluwa key ubag te sale ney se me suluhuanen te Manama te amey ta." Te pegkarineg ni Husi te impanaha ran, nakasinehew sikandin.

<sup>18</sup>Ne nataman, miggendiye te kandin ka me suled din ne miglangkeb diye te tangkaan din ne migkahi, "Uripen key e nikeykew."

<sup>19</sup>Piru migkahiyan sikandan ni Husi, "Kene kew kaaldek, su kene ne sikeddi ka Manama. <sup>20</sup>Mareet ka tuyu niyu te pegbelegye niyu keddi, piru nakanengneng e ka Manama ne meupiya ka egpangkusan dutu ne iyan se egkapangabangan ka masalig ne etew, ne ka seinid en iya. <sup>21</sup>Purisu, kene kew kaaldek. Egtangguwen ku sikaniyu wey ka me anak niyu." Ne ingguluan din sikandan wey inliwang din.

## Ka pegpatey ni Husi

<sup>22</sup>Migpabulus si Husi ka mig-ugpe diye te Ihiptu duma te langun ne me kabuhalan te amey rin. Migginguma te 110 ka idad ni Husi, <sup>23</sup>ne nakita rin pad ka me anak wey me apu ni Ipraim wey ka me anak te apu din ne si Makir ne anak ni Manasis. In-isip ni Husi ne me anak din mismu ka me anak ni Makir. <sup>24</sup>Migkahiyan ni Husi ka me suled din, "Hapit ad egkapatey, piru kene kew egbalaharen te Manama, wey eg-uyanen kew nikandin puun kayi te Ihiptu peendiye te inged ne insaad din ki Abraham, Isaak, wey ki Hakub. <sup>25fz</sup>Na, saad kew keddi ne eg-uyanen niyu red ka me tul-an ku ke eg-uyanen kew e te Manama diye te seeye se inged." Ne migsaad sikandan. <sup>26</sup>Ne migpatey si Husi diye te Ihiptu te 110 e ka idad din. Impabalsamar pad nikandan ka lawa rin wey intahu te lungun.

fz. 50:25: Iks 13:19; Huswi 24:32; Hib 11:22.